

Mateu Deuxu Rybe Wihikỹ Tỹmyra, Mateu Tyyritidỹỹdu

¹ Kaheka Jesuisi Kristu labiehekỹ rare. Juhuu tahe Abraõ heka Davi labiehekỹ rare. Iribi tahe Davi heka Jesuisi Kristu labiehekỹ rare.

² Ibutumy ilabiebohonimy arelyykre. Juhuu tybynimy arelyykre idi iriòrenimy: Abraõ, Ijai, Ijaò, ³ Juda, Peresi, (Peresi seriòre tahe Zera inire. Isereny tahe Tamara inire.) Esraõ, ⁴ Araõ, Aminadabe, Nasaõ, Salmaõ, ⁵ Boasi, (Raabe, Boasise rare.) Obede, Rute, Ijese, Kie.

⁶ Davi hãwyy heka Uria hãwyy juhUU raremyhỹ. Iribi Davi-wana roire. Salomaõ iriòre rare. Tii heka Roaboã tyby rare. ⁷ Idi Abia reare. ⁸ Idi Asa, Josafa, Joraõ, ⁹ Uzia, Jòtaõ, Aka, Ezekia, ¹⁰ Ezekia, Manase, Amo, ¹¹ Josia, Jekonia, taseriòre-wana.

¹² Babilonia-ribi rohonyreu tahe tiiboho reare, Jekonia riòre wahe: Salatieli (Tii Babilonia-ki reare.) Zorobabe, ¹³ Abiude, Eliaki, Azo, ¹⁴ Sadòki, Aki, Eliude, ¹⁵ Eliaza, Matỹ, Ijaò, ¹⁶ Ijaò tahe Jyje tyby rare, Jyje tahe Marie hãbu. Jesuisi tahe Kristu Deuxu deòdỹỹna rare.

¹⁷ Kia labiehekỹ sòwe tahe 14my rare, Abraõ-ribi Davi-ò wahe. Tule labieboho 14my rasòwerenyre Davi-ribi Babilonia hãwã-ò ridyreny ixideewimy aòkò ròte-ò. Ixyby 14my rasòwerenyre. Iribi tahe Jesuisi reare.

¹⁸ Kawese heka Jesuisi Kristu reare. Juhuu Marie Jyje-wana roikremy rare. Tii ijadòmaule

tahe Deuxu Tyytybytyhy ribòtònyre. ¹⁹ Jyje hābu òbiti rare. Tai tahe riixāwididỹnykemy rōhōtinyre. Kia òmo-ò rarybeōlere tuu. ²⁰ Kiau ýju tamy rarybere tarasina-ki: —Jyje, Davi riòre riòre. Ahāwy, Marie, biteònyōke. Tuu bexihāwyynykre. Iriòre dori Deuxu Tyytybytyhy riòre rare. ²¹ Jesuisimy raninykre. Kiani tahe irybereny rare: tarasadu. Ibutumy iny dori iòraruna-ribi ritakre.

²² Iwese Deuxu rybe ihetxiu rarybere wese tahe tii wiji riwinyre. Kia wese ihetxiu rybe rare:

²³ —Ijadòma rabòtònykre. Iriòreni heka Emanueli rarekre.

Kiani tahe irybe-ki kia rare:

Deuxu iny-wana ratxireri.

²⁴ Iribi tahe Jyje dexixade tarasina-ribi. Iwese Inynyryreny tuu tamy rarybere wesemy heka tii riwinyre. Tii-wana ratxiòre. Tii aōhe risỹnyōre.

²⁵ Uladu reare xiery tii aōhe rira. Tamy niō riwahinyre, Jesuisi wahe.

2

¹ Belē hāwā-ki Jesuisi reare, Judeia bedeki wahe. Iòlò Herodi iòlòmy raremyhỹ. Iu reareu, Hābu Erytyhy mahādu taina tỹmyramy robirenyre. Tai tahe iòlò mahāduō doidenyde biura-ribi Jerusalē hāwā-ò. ² Tiiboho rỹraxyreny: —Iule judeu mahādu iòlò aōbo kaki reare. Jiarỹboho itainamy rabirenyre tahe nadoidenyde riwowydynyrenykemy. Kaiboho teertytenyte aōbo titxibo ratxireri?

³ Tahe inyō Herodiko relyyreny. Herodi kia roholareu sōwemy riòtiinyre. Tule ibutumy Jerusalē hāwā mahādu riòtiinyreny. ⁴ Tahe

Herodi ibutumy dinodu mahādu ributunyre: Xiwena wahidỹdu dinodu, bedē ywina tyyriti erydu mahādu tule. Tahe tamyreny rỹraxyre: —Titxibo Kristu reakemy timybo tyyriti-ki ròritidỹmy roire? ⁵ Tiiboho tamy rarybere: —Judeia bedē-ki, Belē hāwā-ki wahe. Kia tahe ihetxiu rybedu riritinyre.

⁶—Kai Belē hāwā mahādu. Judeia bedē hāwāō. Kai hāwā yja iny rōhōtinyre. Tahe inatyhy aōkō rare. Kai hāwā nihikỹre. Aribi dori dinoduō ròhōnykre. Wamahādu iòlòmỹ ronykre. Idinodumy rarekre, judeu mahādu dinodu wahe.

⁷ Tahe Herodi heka biura mahādu ributunyre ibutumy iny-ribi wasimỹ. Tamy rỹraxyre: —Tiutxubo taina ròhōnyre? Tahe rirawyōnyre.

⁸ Tamyreny rarybere: —Kaiboho boibenyke Belē hāwā-ò. Idi tahe uladu-ki mahabenykre. Iu wadee manarybebedenykre. Jiarỹ tule tamy arakre ariwowydynykre. ⁹ Biura Hābu Erytyhy mahādu roholarenyre. Tahe roirenyre. Ryki ixityre tainamy robirenyre. Uladu tyrehekỹle ritoosōnyre. ¹⁰ Iu tahe sōwemy reysarenyre.

¹¹ Heto-ò rehemynyre. Tahe ralorenyre. Uladu rare Marie-wana. Tahe tatiowotimỹ reserenyre riwowydynykre. Isarenỹ riraynyre tamy riwahinykre: womati tỹrỹrỹhỹkỹ, hee aderōna, aderōnatyhy wana. ¹² Idi tahe Biura Hābu Erytyhy mahādu rarasiynyre. Deuxu tamy rarybere: —Kaiboho Herodi-ò bòòsebenyōke. Tai tahe rywitxira-di tasubedereny-ò ròòserenyre.

¹³ Biura mahādu tahe ròireny rahudi tahe Inynyryỹ jỹu nade Jyje-ò rybemy, irasina-ki tamy

rarybere: —Ariòre, ise-wana bidyke Egito bede-ò. Herodi dori uladu rubudỹỹmy ratxireri. Adee tiu ararybekreule kaò bòdòòseke. ¹⁴ Tai Jyjaboho rumy rahenyrenyre Egito bede-ò. ¹⁵ Herodi rubusỹtybymy tahe dòòsedenyde. Tii riwinyre iwese ihetxiu tyyriti rarybere wese, Deuxu rybedu rybe wahe:

—Wariòre Egito bede-ribi nadidyde.

¹⁶ Herodi reburere. Biura Hābu Erytyhy mahādu dori tii riitxenanyre. Tai ibutumy uladu rirubunyre Belē hāwā-ki, tule ijō iòhò hāwā-ki. Ibutumy howỹtòdu rirubunyre inataō beòra ijōdikeki tahe rirubunyōre. Tai Jesuisi rirubunykemy risỹnyre, iwese tii rareu Biura Hābu Erytyhy mahādu tamy rarybere. ¹⁷ Kiamy ta rỹire iwese Deuxu rybedu rarybere wese, Jeremia wahe:

¹⁸ —Rama hāwā-ribi ibru-ò iny roholamỹhỹre. Rakeli rare. Tii robumỹhỹre. Ibutumy iriòre ituere. Tai robumỹhỹre. Inyō riteysanyōtyhy iriòre rurureki.

¹⁹ Herodi tahe rurureu, Inynyrỹ j̃ju heka Jyje rasina-ki tamy nade. ²⁰ Tamy rarybere: —Bòòsebenyke judeu bede-ò. Uladu ise-wana bidyke. Kia rirubunykemy risỹnynỹhỹré tahe, rurure.

²¹ Tahe Jyjaboho ròirenyre judeu bede-ò. ²² Akelau tahe Herodi ròire ronyre iòlòmỹ, tyby deròwmy. Tai kowa-ò Jyje ròirenyōre sỹmy. Rasina-ki rybeō rieryre Kalileia-ò ròirenykemy. Tai tahe ròirenyre kowa-ò. ²³ Nazare hāwā-ki rasỹnyrenyre. Kia tahe riwinyre iwese Inynyrỹ rybedu ihetxiu rarybere wese: —Nazare ludu tii rarekre.

3

¹ Kiau Judeia bederahy-ki Joaõ Sebedỹỹdu heka iny-ò rarybemyhỹre: ² —Deuxu Iòlòna bededỹỹnana iòhòmy ratxireri. Aòraruna-ribi biixãwibenyke, bexirãhĩke! ³ Joaõmy heka Isaia ihetxiu riritinyre kawese:

Inyõ bederahy-ki ryryreri: —Inynyrỹ dee ryòbiti biwinyke. Biywinyke ryõ tamy kanakemy. ⁴ Joaõ kamelo radetyy ityy rare. Iròdutyw iwereysanare. Seihikỹle bidi-wana irỹsỹna rare. ⁵ Ibutumy iny tamy ròirenyre irybe-ò roholakemy iòhò hãwã-ribi, Jerusalẽ, Judeia, Jordaõ bero-ribi wahe. ⁶ Tamy òrarunamy relyyrenyke rabadewomy tamy relyyrenyke. Tai tahe Joaõ heka bero Jordaõ-ki tii riratysebenyke. ⁷ Fariseu mahãdu, saduseu mahãdu doide tamy riratysebenykemy. Kiau Joaõ tamyreny rarybere: —Hemylala mahãdu! Deuxu aõhõkỹmydỹỹnana-ribi mahenybenyõtyhy. Aõhe inatyhy? ⁸ Juhuu aõwiwihikỹ widỹỹna biwinybeny. Tai tahe iny rierykre kaiboho aòraru-ribi inatyhymy texihutenyke. ⁹ Fariseu mahãdu, kaiboho tahõtintytenyke: Abraõ heka inylabiehekỹreny rare. Rikirãhĩõtyhy. Deuxu-ò kia aõ aõkõ rare. Tamy wikeki mana-ribi Deuxu heka Abraõ riòkòreõ riwinykre. ¹⁰ Woma tahe òwòru-ribi iòhòmy rỹira. Òwòru bederaty wiwihikỹ ihoõkeki, kedeseke. Rasõkre. Woma heka Deuxu aõhõkỹmydỹỹnana wese rare. ¹¹ Jiarỹ bedi araratisebedỹỹnyra

aòraruna-ribi texirãhĩteki. Jesuisi tahe Deuxu Tyytybytyhy-di ròratisebedỹỹkre heòty-wana riratysebenykre. Tii waratyre awityhymy ratxireri. Jiarỹ riwaixỹrunymy watxireri iwa ariwykeki. ¹² Tii maixõmo risykre. Maixõmo ributunyre tahyna-ò. Irỹnysi heòty-di riworonykre. Heòty itueõna heka rare.

¹³ Idi tahe Kalileia bede-ribi Jesuisi nade bero Jordaõ-ò. Tii Joaõ-ò nade riratysebenykre.

¹⁴ Joaõ aõkõmy rarybere: —Jiarỹ tahe aõ aõkõ rare. Kai biwaratysebenyke. ¹⁵ Jesuisi tahe tamy rarybere: —Deuxu deewina heka kia rare. Rikiwinykre. Tahe Joaõ riratisbedỹỹre.

¹⁶ Ròratisebenymy rahudi tahe Jesuisi ròtuòra. Biuwetyy rarayre Jesuisi tahe bòtòenimy robire, itxi dobehede, Deuxu Tyytybytyhy wahe. Rybeõ biu-ribi narybede: ¹⁷ —Kia heka Wariòre rare. Jiarỹ heka sòwemy tukure. Idi wadeysareri.

4

¹ Idi tahe Deuxu Tyytybytyhy heka Jesuisi ridyre bederahy-ò. Tai Satanasi riurihikemy tamy rehe-mynyre. ² Jesuisi heka 40 txumy, 40 rumy heka aõ rirỹsỹòhyy bede idi rỹire. Sòwemy heka rama risamy tai raremyhỹ. ³ Taile Satanasi tamy nade. Tahe iurihiximy tamy rarybere:

—Kai inatyhy Deuxu Riòre ahãte wana heka mana-di orotxumy biwitxiranymy biwinyke ahinamy.

⁴ Tahe Jesuisi dirawyònyde: Deuxu Ritidỹỹna-ki kiamy roire: —Iny heka orotxudile aõkõ irumy rỹirakre. Ibutumy Deuxu rybedile iny irumy

rỹirakre. ⁵ Idi Satanasi heka Jesuisi ridyre Jerusalẽ hãwã-ò. Templo heto ratyre tahe ritidire.

⁶ Tahe tamy rarybere:

—Kai inatyhy Deuxu Riòre ahãte wana heka katyre-ribi ixi-di behukre bede-ò. Buruõtyhy heka besekeki. Deuxu taỹju kiditeònykre aramykemy. Bede-ò aõkõ beseke.

Ijõ tyyriti rarybere:

—Deuxu araywinykre taỹju-di. Tii ýju kiditeònykre tebò-di ariijekemy. Awa ritõmonyõtyhy manatyre-ki.

⁷ Jesuisi rirawyònyre: —Tyyriti tule rarybere:

—Deuxu uritere biurihiõke.

⁸ Iribi Diabo heka Jesuisi ridyre hãwãlòò-ò. Tamy ibutumy bede iòlòna riteòsinyre. ⁹ Tahe tamy Satanasi rarybere: —Beseke atiowotimy tahe biwawowydynykeki, adee kia ibutumy iòlòna wiwihikỹ ariwahinykre. ¹⁰ —Make Satanasi, Jesuisi rarybere: —Tyyriti rarybere:

—Deuxu-ò sohojile deàlàna, wowydyna biwahinyke. Tiile bityhynykre. Deòdu tamy sohojile mabeke.

¹¹ Satanasi tahe Jesuisi-ribi rexitare. Ýju mahãdu rehemynyre iyrubudỹỹmy.

¹² Joaõ òludu heka ròtenawo-ki ritidira. Kia Jesuisi roholareu, Kalileia bede-ò ròòsere.

¹³ Nazare-ribi rare Kafanaõ hãwã-ki rasỹnykremy rare. Tii aho-ki iòhòre, Kalileia aho wahe. Zebulõ bede, Natali bede tahe inatxi hãwã ibiòwa rare.

¹⁴ Kia tahe Isaia Tyyriti rarybere wese:

¹⁵ —Zebulõ bede, Natali bede, Jordaõ bero kowawe-ribi ijà-ò. Ahohokỹry-ki. Kai

judeukõdu mahãdu bede rare, Kalileia wahe.

¹⁶ Iny kowasỹ mahãdu bede luru-ki rasỹnymyhỹre. Tahe tiiboho loosònahakỹmy robirenyre. Bede lurusỹ mahãdu-ki tahe Deuxu loosòna ritoosònyre.

¹⁷ Iribi tahe Jesuisi ritelenyre Deuxu rybe ritỹnynykemy. Tii rarybere: —Aòraruna-ribi bexiràhĩke. Deuxu Iòlòna bededỹỹnana dori iòhòmy ratxireri.

¹⁸ Kalileia aho ijàti-ki Jesuisi rariamy ratximyhỹ. Tahe inatxi waxidu seriòremy robire, Simaõ Pedro, tule Andre ijõre. Rià-di utura rimymyhỹreny.

¹⁹ Jesuisi tamyreny rarybere: —Bodoike wahemy. Iny wadee bimykre. Iwese araerynanykremy bimykre. ²⁰ Aõwesele tahe tarià ririrenyre. Jesuisi-wana roirenyre. ²¹ Roirenyre tahe inatxi ijõ seriòre-ki Jesuisi robire. Txiau ijõni rare. Joaõ ijõre. Tiiboho Zebedeu riòre roire. Tiiboho talawo-ki ronyrenyri rià riywinyrenymy. Jesuisi tamyreny rarybere: —Wahemy bòdòike. ²² Tai tahe tybyreny ririrenyre. Jesuisi hemy ròirenyre.

²³ Ibutumy Kalileia bedey-ki Jesuisi rariamyhỹre. Tii judeu dohodỹỹna heto-ki rarybemyhỹre. Deuxu Iòlònamy ritỹnynymyhỹre, Rybe Wihikỹ Tỹmyra wahe. Sòwemy webinadu mahãdu riteytenyre. ²⁴ Jesusimy iny relyyre ibutumy hãwã hãwã-ki Siria bede ibutumy. Tai tahe sòwemy webinadu mahãdu didydenyde tamy, iny tyytybybina-di, iny iumy imyremyrehekỹ wahe. Jesuisi ibutumy iny riteytenyre. ²⁵ Iny sòwehekỹ riheludunyre, Kalileia bede-ribi,

Debòwìò hāwā-ribi, Jerusalē-ribi, Judeia bedè-ribi,
tule Jordaō bero kowa-ribi.

5

¹⁻² Jesuisi inymy sōwemy robireu, raòwònyre
hāwālò ratya-ò, lerydỹyna mahādu tamy
doidenyde. Taile rierynadỹynymy rononymhỹre.
³ Deuxuko-ki iny ibinamy rỹimyhỹre. Kia iny
tuu rexierymyhỹre, teysatyhy rare. Tii deysana
sōwemy tai ratximyhỹre, Deuxu Iòlòna heka
ihōrōrenymy rarekre.

⁴ Robumy rỹirakeki teysamy heka rỹirakre. Ibede-
wona wiòhedỹyna rybe-di heka tamy kanakre.

⁵ Kia inytyhy-di widee ratxireri, tii heka
teysahyymy ratximyhỹre. Ibutumy heka iny
ihōròlehekỹle rỹirakre. Bede bede heka ihōrōmy
rarekre teysamy rarekre.

⁶ Inyō-ò òbitinamy lobiximy rurukeki
tahe teysamy rarekre. Deuxu tamy òbitina
riwahinykre.

⁷ Inyō ruxetòena-di ratxireri. Deuxu heka tamy
ruxetòena-di rarekre.

⁸ Inyō irayky òbitimy ratxikeki tii heka teysamy
rarekre. Tii dori Deuxumy robikre.

⁹ Inyō ywina-di wiwana rỹirake teysamy
rarekre. Ywinaō-di rarekré, teysamy rarekre.
Tii dori rarinikre: Deuxu riòremy.

¹⁰ Inyō aōhōkỹmy dỹỹnana reuròkeki, tii dori
òbitimy rurukeki, tii tulesỹ teysamy rarekre.
Deuxu Iòlòna dori ihōrōmy rarekre. ¹¹⁻¹² Inyō
umyreny relyykeki uritere hekỹle. Ruirybe-di
umyreny relyykeki, aōhōkỹmydỹỹnana adee
riwahinykre wana, tai tahe beysakre. Awimy

mohõtinykre. Kai dori biu-ò mahenykre. Tai tahe beysakre kai awimy nohõtikykre. Uritere nohõti rosarenyõmy. Kia wese tule Deuxu rybemy rybedu aõhõkỹmy rotỹỹnyre. ¹³ Kaiboho heka saawesemy atximahãtenyte, jyyra wesemy wahe bedede mahãdu iny-ò, kai dori kiamy bedede mahãdu tewiòhenanyte. Auri tahe urihimyò biõnonykeki tahe aurihixina heka urihimyòlemy releke. Kaa jyyra urile idi adehu rỹikre iny ityre rariakremy. Awiòhedỹỹna biõnonykeki tahe aõma aõkõ beleke. ¹⁴⁻¹⁵ Kai loosõna wesemy atximahãte kabede mahãdu iny-ò. Hãwãõ hãwãlò ratyy-ki roiikeki, tiu heka rexiwòõtyhy itỹnyhy roimyhỹke. Loosõnaõ iny ritoosõnykeki, tule heka tiu heka hyna rawoõ-ki roiõtyhy roosõmy. Aõma roosõnanymyhỹre ibutu heto jurajuramy heka ibutu ritxuxanymyhỹre. Aõma tamana-ki rỹimyhỹreki wahe. ¹⁶ Kaiboho tule amahãdureny awiwihikỹmy robikeki tahe Deuxu-ò wowydyna riwahinykre.

¹⁷ Jiarỹ heka anaõde bedede ywina tuededỹỹmy. Anade aõ Deuxu dee rybedu tuededỹỹmy aõkõ heka anade. Anade ibutumy aõmybo rarybere widỹỹmy. Timybo rarybere wese heka ibutumy tuu rotỹỹnymy rarekre. ¹⁸ Inatyhymy adeereny ararybekre bedede ywina tyryitiy-ribi tiu ijõ iõõtyhy ijõ sohoji ritiwedena yreõ reseõhykre. Ibutumy roikre aõhebo rotỹỹnymyhỹreò bedede konanako-txi. ¹⁹ Inyõ tõhõti urihimyò bedede ywina rosakeki rexidelenymyhỹre iny ribedeerynyõkemy iny ritohonyõmyhỹkemy. Hãbu tahe iyjamy Deuxuko-ò rarekre, Deuxuko-txi. Inyõ rityhynymyhỹre irybe

iny rybedeerynymyhyre. Tii tahe Deuxu Iòlòna-ò nihikỹmy rarekre. ²⁰ Kaiboho aõma fariseu mahãdu-ribi awityhymy ixi-di mohõtinybenykeki. Tiu heka Deuxu Iòlòna-ò aròterenyõmy. Kaiboho heka awi toite aõma fariseu mahãdu judeu mahãdu wedu ratyre heka awi boibeke. Kia aõkõkeki tahe malòbenyõtyhy.

²¹ Ihetxiu bede ywina Tyyriti kawesemy rare:

—Kai inyõ birubunykeki heka iòwynamy iny akanarubunye. Kia heka bede ywina heka rare.

²² Tahe warybe urihimyò iwitxira bede ywina-ribi. Kai inyõ-ò maraykynykeki. Tai tahe brebunahakỹ-ki tate. Abiòwa-ò bininikeki itxỹtemy. Tamy kai marybekeki: —Kai aõki awiõre. Tai tahe akỹnadykre heka aõma ywisidỹỹduko-ò araòwynykre. Inyõ-ò kai makyaranynykeki kai brebuna-ki texilòròmy tate. Kai inyõ deramy mabekeki uriteremy nodu tamy marybekeki, tai brebuna-ki tate. Inyõ òsỹny aradykre wisidỹỹdu mahãdu-ò. Inydee ratyhymy mabeke wana aõkõ raremy marybekeki, heòty kònana bede-ò make lau brebuna-ki tate. Iòhãrure kai heòty bede-ò makemy. ²³ Kaki aõma nieru xiwena wahidỹỹna-ò behemynykeki inyõ-wana aõhe widee botỹỹnykeki òhòti rosaõlemy ahãte wana. ²⁴ Deuxu heka axiwenawahidỹỹna-ò tewahinyõhyymyhyte aõma xiwena bire-ki heka birike. Tahe biijeke aseriòre juhuhu. Aõma wana biòbitinybenyke widee marybebenyke. Iribi tahe tamy bedehemynyke xiwena wahidỹỹna-ò wahe tadevenymy atximahãte wana hãbuõ-ò. ²⁵ Aõma tai tahe iòraru-ki aòludumy relera wana. Tamy behemynyke aõma timybo tii-wana

widi biywinykemy timybo adeve biòwynykemy tamy heka bitobiny òrale heka aõma rieryke urenana. Aradyhemy aõma ywisidỹỹna ube-ò, idi ywisidỹỹna mahãdu, idi soldado. Tai tahe bitobinyke bede rierykemy. ²⁶ Inatyhy heka adee ararybekre ròtenawo-ki malòkeki. Tiu heka aòlòkòmy aõma iòwy mahumy adi rōhōtinykre. Idi mohōtinyke xiery heka bōhōnyke.

²⁷ Juhuu ihetxiu heka kaweselemy Tyyriti-ki rarybere:

—Òtaõmy!

(Bede ywina tyyriti-ki wahe.) Kawesemy heka jiarỹ rebedeerynywãhãre. ²⁸ Òtamy rōhōtinykeki hãwyy-ò retehekeki òtamy rexinohōtinykeki. Tai heka tii òta òraru riwinymyhỹre. Iwese iwitxira hãwyy-wana roireri yrubule taheka òta òraru riwinymyhỹre. ²⁹ Arueõ òraruna-txi araatykeki, bitake. Awityhymy biu-ki malòke kawesekile heka awire, Deuxusỹ-ò malòke wahe. Arue wiòmy tahe awiõmy biu-txi arue yremy heòty bede-ò make tahe ibinatyhyre. ³⁰ Tule eraõ bitake iurelemy era-di make biu-txi. Aumy ibutuhukỹlemy heòty bede-ò rakehãrele tahe awiõre. ³¹ Bede ywina heka kawesemy ròhònyre iny-ò juhUU wahe:

—Inyõ tahãwyy ixi-ribi riteònykeki rixãwididỹỹnyra tamy tyyritiõ riritinymyhỹre. ³² Iwitxira rybe-di jiarỹ arukile tahe hãbu tahãwyy riatyra. Inyõ uritere òta òtana òraru-ki ixi-ribi tahãwyy riteònymyhỹre. Tai tahe hãwyy roimyhỹre hãbu witxira hãbuõ-wana. Tai tahe òta òtadumy kia hãwyy rininire. Adỹỹwe òraru-ò riteònyre tahãwyy riteònyre

uritere òhyynaòle. Tai tahe tii adỹỹwe òrarunaòle heka riteònyre. Taile heka hãwyy hãbu witxiramy heka roimyhỹre ahãbuò tahãwyy uritere hyynaòle riteònymyhỹre mahãdu hãbu heka. Tii heka tule òtadumy relemyhỹre hãwyy òta òtaduò heka roireki wahe.

³³ Juhuu heka ihetxiu kia wesemy Deuxu tamýreny kia rarybere:

—Taholatenyte kiamy Deuxu heka uritere ruiòmy atximahãbenyke Deuxu-ò biwinybenykemy marybemy bimýkeki biwinybenyke.

³⁴ Tahe jiarỹ heka kiamy adeereny ararybekre. Aòwidỹỹmy ixi-di nohòtirenýòmy ryberenýòmy iwidỹỹmy. Ixinohòtidỹỹmy ryberenýòmy ariwinykre biwawiòhenanyke wana biu-ribi wawiòhenanykre wana. Uritere heka tuu ryberenýòmykre kia wesemy biubrò-ki aòkò biu dori Deuxu rynana rare. ³⁵ Kiamy uritere rybeòmy bedebrò-ki aòkò aò biwinykemy aòmy mabekemy. Bede dori Deuxu idi ratximyhỹre rare. Deuxu waa elehyna dori bede rare. Jerusalẽ hãwãbrò-ki tule aòkò, tii dori Iòlòtyhy hãwã rare.

³⁶ Tule arade-di widỹỹmy uritere dori rybeòmy kai dori awitxiranyòtyhy arade iura-ò ilyby-ò urile araykywydynakile tuu ratxike. ³⁷ Aòma araykywydynakile heka tuu riwitxiranykemy idi tahòtinymyhỹte. Kiamy heka tarybemahãte iwidỹỹnamy teuremy tarybemyhỹte: —Kohe, kiale ariwinykremy marybeke ada aòkòre, ariwinyòtyhymy aòbo. Kiamy marybekeki iratylemy kohe, aòkòre myỹ aòbo. Sòwemy

marybekeki tahe aõbina binahakỹle heka ròhònykre.

³⁸ Ihetxiu bede ywina ròhònyre.

Inyõ witxira rueõ ribinadỹnykeki, iny witxira tule iwesele riwinyke. Kia widỹdu rue heka ribinadỹnyke. Rue heka wilemy raòwynyre rueõwilemy. Juhu tasỹ ýjuõlemy raòwynyre. Jiarỹ tahe rebedeerynyre kawesemy.

³⁹ Inyõ aõbinamy adee riwinykeki, aõ aõkõ tamy biwinyke. Inyõ aòsỹny rihetenykeki, tule iwyò-di beake rehetenykemy. ⁴⁰ Uritere aòludu-ò ixiòwydỹỹomy. Aõma ijõ atyy ritakeki heka tule tamy arahana biwahinyke. Inyõ sohoji urixinamy adee ixidinymy reake wana. Inatximy heka tii-wana beake. ⁴¹ Inyõ ixitòedỹỹmy aõ aribi riwykeki tamy biwahinyke tule inyõ aribi aõ huòtemy riwyke wana. ⁴² Abròrò itue-di tamy òkeseõmyke iwòde-ki ihuòtemy biwahinyke.

⁴³ Ihetxiu heka taholatenyde kawesemy:

—Kai heka aõ hãwã ludu mahãdu luumy heka madònymyhỹke.

Aòludumy aki ratxike wana tukumy atxike teramy atximahãke. ⁴⁴⁻⁴⁶ Tahe iwitxiramy ararybekre. Aòludu heka arabedeerynyke. Tukumy mabekemy inyõ aõhòkỹmydỹỹnana rotỹnyreri wana tamy rexitòenyke. Kia wese-ki heka inytyby riòremy mabeke, Deuxu riòremy wahe. Tii dori juu riòlòdỹỹnymyhỹre inybina tyre-ki wahe. Tule iny wiwihikỹ tule-ki aõma biu heka tule riteònymyhỹre. Aõma iny òbitikõdu mahãdu tule-ò. Tule òbiti mahãdu tule riteònymyhỹre. Aõma tukumy ahãte sohoji ratximyhỹre sohojile kai

itukukeki. Kia heka awi aõkõ rare ibutumy òraru mahādu heka tule riwinyremyhỹre kia wese. Aõma urile rybedỹỹ azry mahādu, Aseriòre mahādu. ⁴⁷ Tulesỹ kia aõma aõkõ rare aõma tule heka judeukõdu mahādu dori tule riwinyke, tii Deuxu rierykõre. ⁴⁸ Òbitityhymy kaiboho boibeke. Aõma jiarỹ heka arabedeerynyrenyneri biu-ki inytybyreny ratximyhỹre dori òbitityhy rare.

6

¹ Wahisidỹỹna wiwihikỹ kai hāburu-ki iwahisidỹỹõmy iny-ò. Kai itxerenaõnamy biwahinymyhỹ. Aõkõkeki tiu inytybyreny-ribi bitaõtyhy aõwy awahisidỹỹna.

²⁻⁴ Kai biwahinykeu iny adee aõmybo rurumyhỹreó. Uritere ibutumy iny itxerenamy iwahidỹỹõmyhỹ. Inyõ-ò òbiti mahādumy riwisỹnymyhỹre mahādu, kia wesemy heka tii riwinymyhỹre heka. Dohodỹỹmy heto-ki tuu riwinymyhỹre kia wesemy tule ibutumy hāwāhākỹ ruetyawetyamy tuu riwinyrerimy ihỹre. Inatyhy dori adee rarybereri: —Aõma wahisidỹỹnatyhymy heka adee rarybereri: — Wahisidỹỹnaõ ixidee ritamyhỹre. Aõbo Deuxu wahisidỹỹnaõ heka adee riwahinyõtyhy. Tai heka Deuxu wahisidỹỹnatyhy riwahinyõtyhy tamyreny. Iny-ò aõ biwahinykeki, abiòatyhy-ò belyyõke. Wasilemy tamyreny awiòhedỹỹna biwahinyke. Iny tybyreny dori ibutumy aõna aõna ròtena rieryre aõwahisidỹỹna adee kidiwahinykre.

⁵ Iwese budu mahādu riwinymyhỹre wese uritere iwidỹỹõmyke. Kia wesemy aõkõ heka bexitòenyke. Ibuturu-ò rexitòenymyhỹre

dohodỹña hetowo-ki heka lamamy rex-
itòenymyhỹre. Hãwã-ki dori rexitòenymyhỹre
ibutu itxerenakemy. Inatyhymy heka adee
rarybere: —Atarasana ibutumy ritare. ⁶ Inatyhy
dori ritare.

—Bexitòenykeu malòke aheto jurawo-ò.
Ixi-di biijòtòbònyke. Ierykõnamy boo
ratximyhỹreò heka bexitòenymy myike.
Ibutumy heka boo aõbo wasimy iny
riwinyriwinymyhỹremy robimyhỹre.
Tai-ki tahe bede ywina wihikỹ heka adee
kidiwahinykre. ⁷ Tule rexitòenymyhỹreu
uritere irehemy idi lamaõmy uritere
ixityre ixityremy tamy ixitòedỹỹõmy
wiwesewesehyyle. Judeukõdu mahãdu
dori kawesemy riwinymyhỹre. Kiamy heka
raraykywydynanymyhỹre aõma rexitòenyre
ehehekỹkeki heka roholatyhykemy
rohõtinyinymyhỹrenyre uritere widỹỹõmy
iwese tii riwinymyhỹre wesemy.
⁸ Inytybyreny dori rierymyhỹre aõmybo
iny raraykynymyhỹré. Inyboho
heka rexitòenymyhỹreu rierymyhỹre
aõmybo inyboho rurumyhỹrenyre.
Iny sõwemy rarybemyhỹrele aõkõ
heka tii roholamymhỹre. Aõmybo iny
rurumyhỹrenyre, heka bexitòenybenyke.
Kia wese:

⁹ Wahareny, biu-ki atximahãte. Anityhy iny
ibutumy rityhynkemy idi rierykemy
watzireri.

¹⁰ Aiòlòna heka wymy kanake. Iny adeewile ri-
winykemy iwese biu-ki relemyhỹre wese.

11 Wadeereny txuõ txuõ rÿsÿna bidiwahinyke.

12 Waòrarunareny òhòti-ribi bitosadÿÿnyke.
Iwese jiarÿ inyõ òraruna wanohòti iribi
aritosadÿÿnymyhÿre wese.

13 Isiratyhy urihixina-ribi heka biwayrubunyke,
òraruna-txi reseke lau. Aõna aõna bina-ò
bidiwaijebenyke. Iòlòna, ruru, loosòna heka
ahòròhyy rare. Kie.

14-15 —Inyõ ariixãwidinykeki iaòbina-ribi. Tule
inytybyreny riwaiixãwididÿÿnyke. Deuxu
iòraruna-ribi riixãwididÿÿnyke. Beinareheke wana.

16 Uritere aòsÿny bedètiidÿÿõmy iwese budu
mahãdu rÿira wesemy. Tai heka byreõmy iny-di
txuu rÿimyhÿremy widi retehemyhÿre. Wiji
òhòtirenny reake. Heka raòwynyra inarehena
irareny. 17 Tai narehereheu tainareheny teu.
Atarina-di ahãtemy beake aòsÿny bisuhòke.

18 Inywitzira heka anaeryòtyhy kai tenarehemny
atxiteri. Inytybyreny sohojile heka rierymyhÿre.
Inyõ tuu robiòtyhy. Tii tahe ibutumy aõna
aõnamy robimny wasimny rÿiramy. Iribi tahe tii
araòwynyrennyke.

19 Aõna aõna butudÿÿõmy tyy, nieru, aõna aõna
wiwihikÿ butudÿÿõmy kabede-ki. Txudòera
dori ibutumny kabede-ki tuu riroxike aõna
aõnamy. Aõma rararÿÿnyke iaòmydÿÿna
ibutumny rararÿÿnyke rahuke. Wasidu tamny
ralòke. Iaòmydÿÿna-ò sòweò wyremny rasinyke
iaòmydÿÿna-di. 20 Kaki ibutudÿÿlemy heka biu-ò
bibutunyke. Tai heka txudòera aõ riròòtyhy
tule rararyòtyhy. Tule wasidu aòkò rare.

21 Titxibo aòmydÿÿnana ratxireri iwesele taheka
arayky ratximyhÿre. Biu-ki aòbo ada bedè-ki

aõbo. Aõma bedeki araykywydyna ratxireri wana heka kakile taraykywydynanyte. Biu-ki araykywydyna ratxireri wana heka biu-ki heka arayky aõmydõõna butuna raykywydyna ratximyhõre. ²² Arue heka loosõna wesemy rare. Aumy dee itõnykeki heka aumy ibutumy loosõna-di tõximy rarekre. ²³ Aumy ibinakeki tahe bedeki loro-ki matxike. Aumy bedeki lorohokõ-ki ratxikeki ibinatyhymy matxike aõma butunale-di iny rõhõtynykeki heka tiu Deuxu iny riwiõhenyõtyhy. Deòdumy heka releõtyhy. ²⁴ Inatxi wedu-ki dori inyõ rityynyõtyhy. Tule heka tii roholamyhõre ijõ-ribi tahe tõhõti rosamyhõre. Inyõ Deuxu deòdumy releõtyhy tii aõna aõna butunadile rõhõtynyhõreki. ²⁵ Tai heka tuu rarybereri adeereny. Uritere nohõtiryõmy arõsõnamy tule atyymy, idi matykynykemy. Aumy dori rõsõna ratyre aõnityhymy ratximyhõre. Tule aumy tyky ratyre aõniny ratximyhõre. ²⁶ Nawii-di inihe betehebentyke. Tiiboho heka aõòworumy aõkõ ròbròmyhõreny. Aramyre heka aõma tarõsõna wydymy bederahymy tarõsõna riyrubunyõhyymyhõre heto nihikõ-õ. Deuxu biu-ki ratximyhõre heka nawii riyrubunymyhõre irõsõna tamy riwahinymyhõre. Kaiboho tahe iratyretyhy toite, Deuxu-ki wahe. ²⁷ Sõwetyhymy maraykywydynanykeki aõbohe, arumy aõbo arirarehemy mariake. Aõkõre. ²⁸ Uritere nohõtiryõmyke atyymy. Betehehymy inihe noijasa-di. Aõma tiiboho heka raaõmysõdõõhykymyhõre. Tai tyky wihikõ-di rexytyynyke. Tyy ixidee riwinyõtyhy.

Ihãre tahe Deuxu rityynywihikỹre heka tyy wihikỹ tamy riwahinyreri. ²⁹ Salomaõ heka itykynihikỹra. Ihãre tahe ityky heka awityhy aõkõ rare. Noijasa heka iratyre ityky wityhyre. ³⁰ Deuxu heka noijasa ritykynymyhỹre aõma noijasa heka wijilemy idi ihỹre. Biurasòmy tahe ixãwilemy reamyhỹre, risõra. Tii heka tyky adee kidiwahinykre. Nohõtityreõmy tahe. Tii dori adee kidiwahinykre tykyõ. Aityhyna dori ibutetyhyre heka. ³¹ Tahe raykyõmy nohõtĩõmy titxiribibo arỹsỹna bidiwykré, atyky amona. ³² Tyhydỹỹdukõdu mahãdu heka kiaõle heka ritõhõtĩdỹỹnymyhỹre. Inytybyreny heka rierymyhỹre aõmybo tarumahãte. Ibutumy heka araerymyhỹre aõmybo taruterimahãte. ³³ Tii Deuxu aõma dỹỹnana sohojidile. Manaykynykeki heka tii ibutumy adee riwahinykre. ³⁴ Uritere nohõtityreõmy aõbo biurasò kia aõmydỹỹnana-ò. Rỹire dori sówemy wiji biaõmysỹdỹnanykremy biwinykré. Iwitxiramy bidiwinykre iwitxira aõmydỹỹnanaõ.

7

¹ Iny witxira witxira-di ywisidỹỹõkeki. Aywisidỹỹna wesemy heka Deuxu ruxetõena-di ywisidỹỹmy araywinykre. ² Iny teywinymahãte wesemy heka Deuxu araywinykre. ³ Kai heka òwòru nihikỹereõ arue-ki ijõdikeki, aõherekibo bederarasi sõmo-di inywitxira rue-ribi bitakemy atxiteri. ⁴ Tai heka kai bobiõtyhy itarasa-ki wahe. Arue-ki dori òwòruere ijõdireki heka bobiõtyhy. Òwòru ere dori aòraruna sówemy rỹire

wesemy heka atximahâte. ⁵ Kai texibònyteri. Aòraruna-ribi juhuu bexiòbitinykre. Idi tahe aseriòre òraruna-ki biwiòhenanykre. Aòraruny-di rierymy idi òbitimy betehekre iòraruna-ribi iixitarasadỹỹmy biwiòhenanykemy.

⁶ Inyõ heka utura rati mana wiwihikỹ-di re-huõtyhy aõma ixỹni herina-txi. Ixỹni dori ityre rariake tahe riõnonyke adee heka kanakemy wahe. Iwese tule heka ijòròsa-ò biwahinydỹỹõmyke. Ry-bewiwihikỹ hãbu òrarudutyhy-ò iwahisidỹỹõmyke.

⁷⁻⁹ Rexitòenykeki tahe bitake kia. Biekeki tahe tai mahake. Bihetenyekeki heka iny adee riraynyke ijòtòbòna. Inyõ heka Tyby-ò rỹsỹnaõmy rexitòenykeki, mana heka tyby tamy riwahinyõtyhy. ¹⁰ Uturaõmy rexitòenykeki tahe hemylala binahakỹ tamy tiu riwahinyõtyhy. ¹¹ Kai aõna aõna wiwihikỹ biwahinyke heka teerymyhỹte auladu-ò wahe, hãbu òrarudu hãrele wahe. Aõbo heka tule Deuxu inytybyreny inydeereny riwahinyke aõna aõnaõ wihikỹõ. Rexitòenykeki tahe tamy ariwahinyke. Inytybyreny heka tamy riwahinyke. Iwese iny witxira teyrubunymahâte wesele heka iny araywinymy ixi-di tahõtinyinmahâte wese. ¹² Tule kai aõwiwi inyõ ixidee aõhebo rotỹỹnymyhỹkemy taruterí, kiaweselemy tamy botỹỹnymahãke. Kia heka Moisesi bedede ywina tyyriti-ki roire. Kiale Deuxumy rybedu mahãdu ribedeerynyre.

¹³ Biu bedede wiwihikỹ kia ryỹijòhỹtỹdile malokre. Heòty ijò bederyijò heka nihikỹ rare. Iny kia ryhykỹ irumy rakre heka isirare iny ibute kowa ralore. ¹⁴ Irumy nonona ijò tahe ihỹtỹre. Ryy

heka ihÿtÿre heka ibutere iny ryhÿtÿ-di ròtedu timy bede erydÿÿkõdu-ò.

¹⁵ Bexiijebenyke kia mahãdu lau Deuxu rybe rybedu mahãdu tyhymy aõkõ lau wahe. Budoeni wese ratximyhÿre inytyhy wesemy. Tawo-ki tahe inatyhy rare ahola debore wesemy heka ratximyhÿre. ¹⁶ Teeryte wesemy ibederaty-ò betehekeki. Hede-ò heka uvamy figomy tule tiu iratyõna. Iaõmydÿÿna-ò bierybenyke tibo roiré. ¹⁷⁻¹⁸ Tii heka bierybenyke aõhebo rotÿÿnyre wana teerytenyte. Tii heka riitxenanyõtyhy kia aõma matyty matynimy heka tiu biitxenanyõtyhy. Tule betehekeki, bierybenyke aõwesele heka òwòruõ bierybenyke. Aõma bederatyõ birÿsÿkeki tiu heka bederaty wihikÿõ arÿsÿõna òwòru ratyy-ò, bederatybinahakÿ tule rierykre. ¹⁹ Òwòruõ bederaty wihikÿmy raratynyõkeki heka hemy raòròròke rokoke. ²⁰⁻²¹ Kia weselemy heka iny teerytenyte. Aõhebo iny rotÿÿnyke wahe. Tai tahe terytenyte heka, tetehetenyerikile wahe. Òbiti mahãdu wesemy rarybemyhÿre. Tahe òbitimy aõkõre ihÿre. Sõwemy heka iny tawedumy riwaninire. Ihãrele tahe biu-ò ralòõtyhy. Deuxu tyhydÿÿdule tahe ralokre. Ywisidÿÿnatxu heka kawesemy wadee rarybekre. ²² Sõwemy iny wahe: —Wanyrÿ, Wanyrÿ, jiarÿ hewa iny iwitxira sõwemy aijyy rarybemy rare wahe. Tule heka tyytybybina reteònymy rarewãhã. Tule deytana wiwihikÿ heka ani-di rewinyimyhÿre. ²³ Tai tahe jiarÿ tamy ararybekre heka: —Kõrehe, kaiboho aõ wamahãdumy aõkõ atximahãte. Umy reerykõre. Waribi bexitake. Aòraruna dori sõwere.

²⁴ Kawesemy heka iny bede eryna ratximyhÿre. Warybe-ò roholamyhÿreu heka aõwesele riywinymy rityhynymyhÿre. Kia hãbu hetowidÿÿdu wesemy heka rare. Iheto heka manatyre-ki riwinyre. Tii heka ibedeery sõwemy ihÿre. ²⁵ Biu heka beòra heka rariamyhÿre. Iu tahe biu rejuxunymyhÿre, yhy rebonyre. Tahe tiu reseõtyhy manatyre-ki dori riwinyre. ²⁶ Warybe ijohonadu tahe iwitziramy ihÿre. Hãbu itxÿte tahe warybe-ribi aõwesele tõhõtireny rosamy reamyhÿre. Kaiboho aõbedeeryhykÿ aõkõre roire. Tii heka iwese hãbu ÿnarakile heto riwinymyhÿ wese rare. ²⁷ Biu risebenykeu, beòra rareareu, yhy rebonyreu tahe iheto reseke, ibutumy iõre, rahura.

²⁸⁻²⁹ Ibutumy heka Jesuisi rybe erysydÿÿna-ò bede riõtiniyre. Tii heka hãbu erysydÿÿdu wesemy tii ribedeerymyhÿre. Aõ judeu wedu wesemy aõkõ ribedeerynyre.

8

¹ Tiu hãwãlò-ribi dobehedeu, sõwemy heka iny ihemy doidemide webinadu, tybina heka tamy nade. ² Wowydyna rybe-di heka tamy rarybere: —Adee wikeki heka kai biwateytenyke. Jesuisi dirawyònyde: ³ —Wadee awire, arateytenykre. Tahe tamy tebò ritytere tamy reerimy. Ittybinana riteytenyre. ⁴ Tahe Jesuisi tamy rarybere: — Boholakre, iny-ò uritere rybeõmy.

Kai tahe makre xiwena wahidÿÿdu-ò xiwenaõ biwahinykre. Idi tahe Moisesi bede ywina raryberewesemy xiwenaõ biwahinykre. Kai tahe iny rierykemy heka yteny ratximyhÿre.

⁵ Jesuisi Kafanaõ hãwã-ò rehemynyreu heka hãbu soldado weduõ tamy rehemynyre. Tii tahe Jesuisi-ò rexitòenyre: ⁶ —Wadeòdu biteytenyke raterenymy ratxireri waheto-ki. Sõwemy aõhõkõmy rotỹỹnyreri. Ibinatyhymy roireri rexisiranymy raratykõhykylemy. ⁷ Tai tahe Jesuisi tamy rarybere: —Rakakre, tai ariteyteynykre. ⁸ Idi soldado wedu rariwyònyre: —Aõkõre, Kai hãbu wiwihikỹ tate. Jiarỹ tahe hãbu aõ aõkõmy jiarỹ watxiwãhãre. Waheto-ò manalõõtyhy. Karibile marybekre tamy taile taile tahe wadeòdu reytekre. ⁹ Jiarỹ dori reyryre. Jiarỹ heka tule hãbu weduõmy watxiwãhãre. Soldado heka sõwemy riwatyhynymyhỹre. Iny sohoji-ò aõma rakremy rarybemyhỹré heka, ramymyhỹre. Tule ijõ dee rarybemyhỹre: —Manake, tai tahe namyhỹde. Ijõ dee rarybemyhỹre wana: —Kai biwinyke, idi riwinymyhỹre. ¹⁰⁻¹¹ Tai tahe Jesuisi ribedeõtĩĩdỹỹnyre irybe-ki wahe. Tahe rarybere erydỹỹna mahãdu-ò: —Judeu mahãduy-ki tai rahaõre ijõ-ki kahãbu wesemy inatyhynana sõwereki. Sõwemy heka judeukõdu mahãdu rityynykre kia weselemy. Ijõ txu aõ wiji aõkõ heka riroxirenyke: Abraõ, Ijai, Ijaò-wana biu-ki heka riroxirenyke bedede ludu iny mahãdu-wana. ¹² Judeu mahãduõ ròirenyõkre tamy. Tule kaibohoõ tahe aõhetykrebo. Ijõ mahãdu dori bedede lorohokỹ-txi resekre. Taiki tahe iryname rurykre aõkõmydỹỹnana-ò. ¹³ Taita Jesuisi soldado dinodu-ò rarybere: —Makre, timybo wiji tahõtĩnymy tetyhynyte wesemy heka rarekre. Iurele teòdu reyttere.

¹⁴ Iribi tahe Jesuisi Pedro heto-ò ralòre. Iriòre lahi heka aõma rubuna nihikỹ roimyhỹ. ¹⁵ Tahe Jesuisi rimyre tebò-di tamy rerire. Idi tahe irubuna iribi ròhònyre. Tai tahe tii ronyre. Ronymy tahe rỹsỹna riwinymyhỹ tamyreny. ¹⁶ Txiorotyhymy inyõ didyde aõma tyytybybina nihikỹ-di ratximyhỹ. Iu Jesuisi sohoji rybeõmy rarybereu tahe aõwesele iribi ròhònyre. Kia webinadu didyde, tule reytere. ¹⁷ Iwese ihetxiu Isaia ryberiti rarybere wesemy heka tule riwinyre:

Jesuisi riwinyre. Kiamy wahe. Wabinanareny waribireny riwyre. Inatyhyre.

¹⁸ Iny sõwemy ributunyre. Tai tahe taerydỹna mahãdu-ò tii rarybere: —Rokoirenyhe kanawe-ribi ijà-ò. ¹⁹ Tai judeu mahãdu, bede ywina bederydỹduõ tamy rarybere: —Awana arakre titxibo makreu heka ahekile anakre. ²⁰ Tahe Jesuisi dirawyõnyde tamy heka rarybereri: —Ijòrò heka ihãloo dire, ibỹtỹ dire, nawii bỹtỹ isỹ dire. Tahe jiarỹ, Deuxu Riòre Hãbutyhyhykỹ wahe, wahetoõre, waherinaõre. ²¹ Ka ijõ iheludu mahãduõ tamy rarybere: —Wanyrỹ, waha heka rurura. Tai heka juhuu arituunykre. ²² Tamy rarybere: —Manake, wijile biwaheludunye. Rubuõmy rỹira, rubu mahãdu heka rituunykemy idi ratxireri.

²³ Jesuisi hãworo-ki ronyre tahe reurore. Ieryredỹna mahãdu riheludunyunyre kia lawokile. ²⁴ Ahobetya-ki tahe yhy debore nihikỹ tamyreny rehemynyre. Tahe òbò nihikỹmy resemyhỹre. Uritereribile yhyhykỹ bee riòbònyra hãwò rilỹmynye iòhòtyhyre. Jesuisi tahe rõrõmy roimyhỹ iu. ²⁵ Tai tahe

ierydỹĩna mahãdu heka riixixadỹĩnyre. Tamy raryberenyre: —Biwayrubunyke, Wanyrỹ. Aõkõkeki, rukururenykre. ²⁶ Jesuisi tamyreny rarybere: —Aõherekibo kaiboho taberutenyteri? Aityhyna sõwe aõkõ atxitenyteri. Jesuisi tahe rỹimy reare. Yhy debure-ò, òbò-ò rarybere: —Biyryke, bedede binahakỹ. Tahe aõwesele ibutumy riyryra. ²⁷ Ierydỹĩna mahãdu urile ribedeòtiinyre. Tiiboho raryberenyre: —Aõhãbubo tii ihỹre. Òbò, tahe yhy-wana tamy roholare. Iwese tii rarybere wese rityhynyre. Irybemynale riwinyre.

²⁸ Kalileia aho ijõ weribi ijana-ò ritehemynyre. Kowa bedede heka Kadara inire. Tule hãbu inatxi heka tyytybybina-di tai rasỹnyrenyrene wabedewo-ki. Kiary-ki tahe ibutumy iny ruberure. Iribi tahe ròhònymy reare. ²⁹ Aõwesele heka ryrymy roirenyre Jesuisi-ò rarybekremy: —Aõwe wadireny tate, Deuxu Riòre? Kai aõbina binahakỹmy wahõrõdỹĩõmykre. ³⁰ Tahe kowa-ki ixỹni juramy riroximy rỹimyhỹ. ³¹ Tyytybybina tahe Jesuisi-ò rexitòenyre: —Biwatòenybenykeki, ixỹni jurawomy aralorenykemy biwateònyke. ³² Tahe Jesuisi rarybere: —Bòibenyke hãbuwo-ribi. Tahe ròirenyre ixỹniwo-ò. Ixỹni jura tahe ibutumy rejuxunyrene ijòtira-ribi. Berawo-txi tahe rabòròròre. ³³ Ixỹni-di itxeredu mahãdu tahe hãwã-ò roirenyre ijyymy. ³⁴ Kia hãwã ludu mahãdu tahe roirenyre Jesuisi-ò itxeremy. Tai tahe tamy rarybere ibede-ribi ròhònykemy.

9

¹ Ribererenyrene aõma hãwò nihikỹro-ò reuròrerenykremy kanawe-ribi ijà-ò. Tai tahe

Jesuisi tahāwā-ò rehemynyre. ² Tai tahe didydenyde weryrybòò byre-di idi betyky-di ramyremyrenymy roimyhÿre. Tahe hābu mahādu inatyhyna Jesuisi rieryreu heka hābu dee rarybere: —Waexi, beysake, aòraruna dori reixāwididÿÿnyra. ³ Tai tahe ritidÿÿna bederydÿÿdu mahādu retehereri. Ixideele heka rarybemahā: —Kia heka ibinamy Deuxumy rarybereri. ⁴ Iyky Jesuisi rieryre tahe tamyreny rarybere: —Kai aōbo ibinamy waki tahateri arayky-ki. ⁵ Timybo heka kaiboho tahōtinyteri. Aōma iòraruna ariixāwidinyke aōbo ada iumy ariteytenyke aōbo? Aōbohe isiratyhyre wadee tahōtinyte wahe. ⁶ Deuxu-ribi waruru dire. Kabede-ki heka òraruna ariixāwididÿÿnyke jiarÿ heka Deuxu Riòre Hābu tyhyhykÿ rareki wahe. Tamy rarybekre: —Myike, abyre bimykre ta mariakre asÿ-ò. ⁷ Tai tahe hābu aōwesele rÿimy reare. Tahe taheto-ò rare. ⁸ Tahe bedede inysōwetyhy heka ribedeòtiidÿÿnyre. Deuxu heka wowydyna riwahinyre. Tii iny-ò ruru riwahinyreki wahe.

⁹ Jesuisi iribi rariamy rare. Tai tahe tii Mateu-wana heka witxi reare ryki: —Jiarÿ heka nieru butudÿÿna heto-ki ranymahā. Jiarÿ rebutunymahā aōma inyòwydÿÿna heka rebutunymyhÿre. Iu Jesuisi wadee rarybere: —Manake waerydÿÿnaōmy heka beleke. Tai tahe jiarÿ tii-wana heka rare aōwesele heka ihemy rare.

¹⁰ Tai jiarÿ retobinyre kanakemy waheto-ò. Waheto-ki riroxikemy taerydÿÿna mahādu-wana. Tai tahe sōwemy heka iny waery mahādu dòidenyde, òrarudu nihikÿ mahādu wahe. ¹¹ Tule heka fariseu mahāduō tai ratximyhÿ. Tahe Jesuisi erydÿÿna

mahãduõ kiaõ-ò heka rarybere: —Aõherekibo Jesuisi òrarudu nihikỹ mahãdu-wana riroxireri?

¹²⁻¹³ Tai Jesuisi roholarehe tamy rarybere: —Aõma òhotibedu heka, webinadu mahãdulemy aõnityhymy rarumahãre. Òhotibedu-ò kanakemy. Binadu mahãdu-ò tahe tiu ararariòwyõtyhy aõma òbiti widỹỹdu mahãduòle heka anade. Warurumy rurumyhỹle mahãdu ariwiòhenanykemy anade. Aõ awihikỹmy ixi-di rõhõtynyreriò aõkõ wahe. Deuxu Ryberiti-ki tahe kaweselemy roire:

Ixiwe heka wadee awiõre aruxetòena wadee awire.

Kaiboho bierybenyke aõbo katyyriti rare.

¹⁴ Tahe Jesuisi-ò rarybere Joaõ eryna mahãdu: —Aõherekibo Joaõ Sebedeỹỹdu kia erydỹỹna mahãdu renarehemyhỹre rexitòenykreu. Fariseu mahãdu erydỹỹna heka tule heka renarehemyhỹre. Ihãrele taheka aõherekibo abedeerydỹỹna mahãdu heka tiu iwesemy riwinymyhỹre. Aõherekibo ka. ¹⁵ Taita Jesuisi dirawyònyde: —Iu iny inyhãwyymy roimyhỹreu heka iny reysamyhỹre. Aõma kia weryrybò hãwyw kialiina heka teysamy ratxirerimy ihỹre. Tiu rirubunyõhymyhỹre teti-ò. Tahe aõutxumy tahe weryrybò hãwyymy heridu heka inyò ritakremy ratximyhỹre. Iu tahe renarehekre heka. ¹⁶ Uritere inyò deratyby ritòbònyõtyhy tytytmyra-di. Inyò itòbòna tỹmyra-di ritòbònykeki, raykake heka iura ranihikỹke. Aõma iwesele rare aõma vỹ tỹmyra iròdutyy tỹmyrahakỹle ritidikreu. Aõma itỹmyra-ò heka iròdutyy itỹmyrahakỹle raykake. ¹⁷ Aõhe tiu vỹ tỹmyra iròdutyy tyby-ò rihynyõtyhy. Inyò kia wesemy riwinykeki taheka raykake heka

rejuxunykre irube. Ihyna heka rabinake. Vĩi wihikỹ taheka aõma iròduty tỹmyra hyynawo-ki ka awĩmy rỹike.

¹⁸ Iu dohodỹỹdu hetoõ bedede erydỹỹduõ heka Jesuisi-ò nade tariòre rurureki wahe. Tai ta Jesuisi tãmy reàlãre tãmy heka rarybere: —Aõma wariòre rarurura wahirari wahe. Kai waheto-ò manake wariòre ruru-ribi biixixanykremy. ¹⁹ Tahe Jesuisi taerydỹỹna mahãdu-wana roirenyre tii wana wahe. ²⁰⁻²¹ Tahe hãwyy rõhõtĩnyre heka: —Jikarỹ heka ityky reroti-kò karirikrekule karekytekre. Tii dori ihãlubu rihyõhy raremyhỹre waò inatxi reurò beòramy. Iòhòmy iribi reare. Ireroti wereysanakile rimymy resere. ²² Taita Jesuisi ròðemy reare. Tuu robire tãmy rỹraxire: —Lerỹ, awi heka rare. Aityhyna heka arateyteynyre. Inatyhymy teyteta. Tai tahe hãwyy aõwesele reytemy reare. ²³ Idi tahe aõwesele rehemynymy reare. Judeu wiuna bederydỹỹdu heto-ò rehemynyre. Tai heka hãwyy sòwemy robumy rỹĩmyhỹ rubura-ki rawiunymy rỹĩmyhỹ. ²⁴ Tai tahe Jesuisi tãmyreny rarybereri: —Bòibenyke hewahe. Hirar-ihikỹ heka ruruõhyky roireri. Urile heka rõrõmy roireri. Tahe iny rutxueny. ²⁵ Tai iny sòwemy ròhònyre iribi. Tahe Jesuisi ralòre titxibo hirar-ihikỹ roireriò. Debò-ki rimyre tahe riteytenyre. Rexixare ixyby. ²⁶ Ibutu bedede bedemyhe inina-ò roholare. Kia deytena riwinyraò.

²⁷ Tahe hãbu ruetà inatxi Jesuisi riheludunyre heka. Kia hetoy-ribi wahe. Tãmy heka raryberenyre: —Kai heka iòlò Davi riokore tate. Tai tahe ruxetòena-di biwawotòenyke. ²⁸ Idi tahe Jesuisi taheto-ò ralore tai rasỹnymy ratximyhỹò. Iny

mahādu ihewomy rare tahe ralòre. Tamy rarybere: —Inatyhymy aōbo tetyhynytenyte, ixyby arāitxeredỹnykeò. Tiiboho raryberenyre: —Kohe Wanyrỹ, retyhynyre. ²⁹ Jesuisi rarybere: —Ainytyhynadireki arue tabita. Aōwesele robirenyre. ³⁰⁻³¹ Jesuisi heka rarybere tarurumy tamyreny uritere ijyyōmykremy. Tai tahe aōma ròirenyre ibutuko relyyreny.

³² Idita tako-ò rexidorunymy reareki tasỹ kia hābuō-txi reare tyytybybina-di ratximyhỹ. ³³ Tahe Jesuisi-ò didydenyde hābu irybeōna kia tyytybybina òraru-ki wahe. Jesuisi tuu òlòdỹnyre iribi. Iule tahe hābu aōwesele heka rarybere iroo-ki. Kia iny ibutumy ribedeòtiidỹnyre. Timy heka rarybeōhyyre iko-ki juhuu raremyhỹ. Tuu rabiōhe iwesedỹnadumy. ³⁴ Idi tahe fariseu mahādu rarybere: —Tyytybybina-di ratximyhỹre. Tai heka tyytybybinahakỹ reteònymyhỹre iny-ribi. Ihārele heka Satanasi-di ihỹre. Tyytybybinatyhy wedu heka ratximyhỹre.

³⁵⁻³⁶ Idi tahe ibutumy hāwā hāwā-di Jesuisi rariamy rare ròbedeerydỹmy. Judeu mahādu dohodỹna heto-ki relyymyhỹre, Rybewihikỹmy. Tai Iòlōna kia ritỹnynymy tuu relyymy. Ibutumy iny bina bina kia heka riteytenyre. Iny nade ihewo-ribi. Sōwemy heka iny aōna aōna bina binahakỹ riwinymyhỹre idi rỹimyhỹ. Titxibo rakre heka rieryōhykymyhỹre ta aōna aōna òraru-ki idinoduòreki wahe. Tai tahe Jesuisi riwotòenymyhỹre ibutumy tiiboho dori budoeni wese ratximyhỹre, itxeredu ihoòreki. ³⁷ Tai tahe taerydỹnana mahādu-ò Jesuisi rarybereri: —

Iny heka maixõmo sõwehekỹ rỹira wese heka iny ratximyhỹre. Aõma ibutelemy heka arixidu rỹira. ³⁸ Bexitõenyke Deuxu-ò. Tii heka bederomy maixõmo rỹira wedu rare. Bexitõenyke tamy aõbo maixõmo arixidu-ò kiditeònykemy. Irybe-di heka raaõmysỹdỹỹkre ibedero-ki. Ibutu bedero-ki heka idi raaõmysỹdỹỹkre.

10

¹ Ributunyre Jesuisi aõma tawa-ò inatxi reurò kia bede erydỹỹna mahãdu. Tamy heka ruru riwahinyre. Aõma tyytybybina riteònykemy. Tule tamy riwahinyre ibutu binana deytana heka riwahinyre tamy.

² Kia heka tadeòdỹỹmahãdurenynimy ararybekre. Juhuu heka Simaõ Pedro. Juhuu heka Simaõ inire, ihewomy tahe Pedromy naninide. Andre ijõ. Tii heka Pedro seriòre rare. Txiau, Joaõ-wana heka Zebedeu riòre rare: ³ Filipi tasỹ ijõ rare. Idi tahe Bartolomeu ijõre. Tome ijõre. Mateu ijõre, jiarỹ wahe. Jiarỹ nieru tarasaduõ rare, imposto tarasadu wahe. Ijõ Txiau tasỹ Afeu riòre rare. Tadeu ijõre. ⁴ Simaõ ijõre. Tii Kana bede luduõ rare. Judasi Isariò ijõre. Tii heka Jesuisi tyhedỹỹdu rare.

⁵ Jesuisi taerydỹỹna mahãdu waòinatxi reruòmy riteònyre. Tamyreny rarybere: — Judeukõdu mahãdu-ò aõkõkre reteònyre. Aõma Samaria mahãdu hãwã heka ralòõhyymyhỹre. ⁶ Kaiboho heka bõibenyke judeu mahãdu-ò sohojile. Tiiboho Israeli riokore mahãduõ ihỹre. Aõma budoeni reòsamyhỹre mahadu wesemy tiiboho ratximyhỹrenyre. ⁷ Aõma tamy

marybekenye: —Deuxu Iòlòna biu-ki heka aõwesele kedehemynykemy ihÿre. ⁸ Webinadu mahãdu heka biteytenye. Aõma iny rubu-wana witxi beakeki, biixixadÿÿnye rubu-ribi. Tykybina yjy yjyhykÿ-ribi iny biteytenye. Tytybybina inywo-ribi biteònye. Iwese aõ tetate wese iòwykõ heka ijõ-ò biwahinymahãke, iòwykõ wahe. ⁹ Uritere nieru wydÿõmy, womati tÿrÿrÿhÿkÿ nieru aõkõ, prata womati nieru aõkõ, cobre womati nieru aõkõ wahe. ¹⁰ Aõma anieru hyna nihikÿ wydÿõmy, awa ijõ wydÿõmy, ijõ dera wydÿõmy. Aõma òwòru arirana wiòhedÿÿna wydÿõmy. Aõmysÿdÿÿdu taòwy riwykre. Kia òbitire. ¹¹ Hetoõ malòke. Kia heka arayrubunykre. Adeeriwahinykre ibutumy aõmybo rarumyhÿkre. Iu hãwã-ò malokreu, hãbu ityhydÿÿdu mahãduõ biijekre. Taihyy bonykrehy tahe iwitxira hãwã-ò iribihyymy makre. ¹² Iu hetoõ-ò malòkeu Deuxu ywina tamy marybekre, Deuxu deysanamy wahe. ¹³ Kai awimy ityhydÿÿdu hetomy rÿike wana, biwahinyke aalàna tamyreny. Kai òbitimy aõkõ atxiteri wana tahe uritere tamy Deuxu deysanamy tamy wahidÿÿõmy. ¹⁴ Aõma tii arybe-ò roholaõkeki, kai hãwã-ribi bexitake taheto-ribi wahe. Tahe iribi bòhònykeu tahe awabrybyxi biubÿtÿnymy bòhònyke. Tii tahe tamyreny rioimyhÿre. Aõma tamyreny ibinatyhykre. ¹⁵ Inatyhymy heka adee ararybekre. Sodoma hãwã mahãdu, Komora hãwã mahãdu inatyhymy heka ibinare tamyreny tahe isiraõkre aõhòkÿmy dÿÿnana wahe. Aõma kia hãwã arybe-ò raholara heka kia ratyre heka tamy isiraõkre. Kia hãwã tahe aõnityhymy aõhòkÿmy rotÿÿnykre. Ywisidÿÿna

txu heka r̃yekreu wahe.

¹⁶ Iwese budoeni ijòrò aholay-ki r̃yikre wese heka kaiboho boibekre. Hemylala eryd̃ỹna wesemy heka maraykynykre. Idi tahe s̃owemy aõma ywina-di maraykynybenykre bòtòewesena-di. ¹⁷⁻¹⁸ Uritere inatyhy heka

aramykre araròtenykre dohod̃ỹna hetowo-ò adi ralokre. Waòraru-ki heka bede dinodu mahādu heka araywisid̃ỹnynakre. Judeukōdu mahāduko Rybewihik̃y T̃ymyra rarybekre. Tiiboho arahātenykre. ¹⁹ Aõ heka belyyke ikoreny ibutumy roholakemy. Aramykeu heka uritere nohōtiōmyke

aõmybo marybekremy ywisid̃ỹna-ki wahe. Bede heka ariwahinykre rybe ibeded̃ỹnanau. Rybeōmyke, urile rybeōmyke. ²⁰ Kai ixiwanale aõkō marybeke. Aõma Deuxu Tyytybytyhy arāwiòhenanymyhỹrenyre. ²¹ Inyō heka taseriøre rityhenykre. Tybyō tule tariøre rityhenykre. Aõma iriøre tas̃y tyby-ò iky reakre idi rirubunykre.

²² Ihyy ibyrymy heka aluu aõkōkre waòraru-ki. Ibutumy iny deramy rarehyyke waòraru-ki: Inyō tule òbitimy rarekreki, ikonanatxu-u, Deuxu Iòlòna-ò ralokre. ²³ Tahe anatakre. Aõma hāwāhāk̃yō-ki atxikeki mahenykre ijō hāwā-ò. Ihewoludu ikonana hāwā hāwāhāk̃y-ribi behemynyke-ribi tahe adòòsekre. Judeu hāwāhāk̃yō-ò behemynykre kōule tahe adòòsekre, jiar̃y Hābutyhyhyk̃y wahe.

²⁴⁻²⁵ Aõma bedeeryd̃ỹdu mahādu tahe aõma ieryd̃ỹna mahādu ratyre rare. Tule iwedu deòdu ratyre heka ih̃yre. Iwesereny tahe boibebenykre. Tahe awedu tate. Inyō tahe riwarinimyh̃re Satanasi, Belisibu wahe raremy. Tahe iwesele heka

iny araninikre waweselemy, ibinatyhyre wahe. ²⁶⁻²⁸ Jiarỹ adee wiji relyyleri. Biurasòmý heka tuu bedelyykre ibutu ijohonanamy adeereny relyyleri. Wasimý wijirumý adeereny relyyre. Biurasòmý tahe ibutu ijohonanamy tuu belyy-benykre. Uritere ilau brebuòmý. Aõbo wasimý rỹire heka ibutumý ratỹnykre. Uritere ilau brebuòmýke. Adeelekre rirubunýkre atyytyby ta rirubunýõtýhy. Iruruõre dori atyytyby rirubunýké. Deuxule tahe bityhynyke. Tii dorihe iruru-di heka rare. Tii bede luru-txi heka atyytyby bede luru heòty-txi heka adi rehuke. Bityhynyke idile maraykynyke. Hãbu lau brebuòmý hãbu aõbina bina riwinymyhỹre lau brebuòmý. ²⁹ Nawiiõ iny riwymyhỹre womati nieru iyja-di, iòwy riõre iny heka riwymyhỹre. Ibutumý heka Deuxu nawii rierýre sohoji sohojimy. Tiu heka Deuxu rierýõhyymyhỹre nawii sõmo rurumyhỹreu heka tiu rierýrykõmy idi reteheõtýhy. Kiawese aõbo tahõtínymahâte. Aõkõre, inatyhymý idi retehemyhỹre. Ijõ rurumyhỹreu heka tuu robimyhỹre. Aõma Deuxu heka anaerymyhỹre nawii sõmo ratýre heka aumý rierymyhỹ. ³⁰ Ara erymý heka aõma arati-ki tiwesebo radeti rỹimyhỹre heka rierymyhỹre. ³¹ Breburenykõmykre, kaiboho dori nawii ratýre Deuxu-ò toite. ³²⁻³³ Kai marybeke: —Jiarỹ retyhynyre dori tahe umý arelyyke. Jiarỹ heka umý ararybeke inynyrỹ dee biu-ki wahe. Iny sõwehekỹy-ki riwatxiõnykeki tule aratxiõnyke jiarỹ Wahako-ò. Jiarỹ heka suò anade.

³⁴ Aõ ywina wydymý aõkõre heka anade. Jiarỹ heka ywina aõkõre diwyde. Bedejeiejidỹỹmy

anade iribi wadee wou rŷikremy. Hãbu heka tybe òludumy rarekre.

³⁵ Tule hãwyy tadi òludumy arisynykre. Tule iriokorese tariòrelahi òludumy arisynykre. Aõma inyõ òludu heka tasŷ mahãdu òludumy rarekre.

³⁶ Boluu adireny boreny heka boibekre. Kia lumy heka boibekre. Tai tahe iratyremy boibekre aõkõkeki tahe waluuõkeki tahe wahõrõ mahãdumy aõkõ boibeke.

³⁷⁻³⁹ Kaweselemy boibeõkeki. Tai tahe kai wahõrõ mahãdumy aõkõhe mabekre. Aõma biyrurubunytyhykeki tahe kai ihãrele aõkre. Aõma kai waòraru-ki aõhõkŷmy botŷŷnykeki wadee waaõmysŷdŷŷ òraru-ki inyõ anarubunykeki aõhe adee rutŷŷnykeki. Tai tahe aumy ròhõnykre inyõ tasŷ-ò aradykeki iwese tii tasŷ-ò riwadyra wesele heka aradykre.

⁴⁰ Tii riwadyra wana Deuxu heka ridymyhŷre riwateònyreki wahe. ⁴¹ Deuxu rybeduõ bidybenykeki. Tii Deuxu-ò arãwahinykre. Deuxu adee uriiõno kadiwahinykre. Adeereny kidiwahinykre. Wahisidŷŷna ritakre wese heka tule kai bitakre. Adeereny ararybekre. Deuxu hõrõ mahãdu heka bimymahãbenyke. Aheto-ò bidybenyke hãbuwi ihŷreny. Tiiboho dori wese uriiõno ritarenykre wesele kaiboho bitabenyke.

⁴² Kai uladu-ò bemonao biwahinykeki bedi imonamy. Tai tahe kanakre inatyhymy adee aõ kidiwahinykre. Kai waòraru-ki ityhydŷŷdu-ò bee biwahinykeki, inatyhymy heka aòwy adee kanakre.

11

¹ Jesuisi heka rexihure aõma taerydỹỹna mahãdu waõinatxi bedeerydỹỹna-ribi. Kia bede ywina tamyreny riwahinyre. Rexihureu tahe rare røhønyre iribi hãwã-di. Aõma rybe ritỹnydỹỹmy rakremy hãwã hãwã-ò.

² Idi tahe ròtenywokile heka iu Joaõ roimyhỹ. Aõbo Jesuisi tahe iu aõna aõna wiwihikỹ ritxienymyhỹreu heka Joaõ tamy roholare. Ròtenywo-ki roimyhỹ-ribi. Idi tahe Joaõ taerydỹỹna mahãdu riteònyre Jesuisi-ò dỹỹraximy:

³ —Kohe, anaraòdenyde tate. Aõma Deuxu deòdỹỹna wahe kanakre aõbo ihewo-ribi. Ariraòrenykre aõbo urihimyò.

⁴ Tai Jesuisi rirawònyre: —Aõma bòðsebenyke ixybyle Joaõ-ò. Belyybenykre ikò aõna aõna wiwihikỹ rewinyre arureny-ki tule tabite wamyreny.

⁵ Aõma iruetàhàkỹ heka. Reruedỹỹnymy rare wahe. Itiere tasỹ retinywãhãre dinoduhukỹ ityy reytemyhỹre. Aõma ijõ Rybewihikỹ Tỹmyra roholaõhyymyhỹre tasỹ tule reijohonadỹỹnyre. Aõma rubu tule rubu-ribi reixixadỹỹnyre. Rybewihikỹ Tỹmyramy heka retỹnydỹỹnyre ibutu iny-ò wahe, iny aõkõ mahãdu-ò wahe. Tule Joaõ-ò marybebenyke kaweselemy wahe.

⁶ Maratyhybenykeki, beysabenyke.

⁷ Iribi ròhønyreu tahe Jesuisi heka rarybere Joaõ bededỹỹnanamy. Aõmybo wahe Joaõ-di røhøtinyrenyre aõmy tuu bedi nohøtinyrenyre tamy itxereny bederahy ròirenyreki wahe. Otxirarade wese yhy-ki tahøtinyteri. ⁸⁻⁹ Ada aõma hãbu urimynodutyhymy aõbo idi røhøtinyrenyre. Aõma butòre wesemy idi røhøtinyrenyre. Ada iwitxiramy

aõbo idi tahõtintytenyte hãbu tyywihikỹdiremy idi rahõtintytenyte. Iòlò taheto wihikỹ-ki ratximyhỹre. Aõkõre, kia iny heka aõ Deuxu rybeduõmybo tahõtintytenyte. Inatyhy tii kia rare. ¹⁰ Iratyre heka tii rare. Aõma dori Tyyriti-ki rarybemyhỹre:

—Tii heka wako-ki kadehemynykremy ratximyhỹre, wamy relyykemy, wary riywinymyhỹre.

¹¹⁻¹⁴ Inatyhy heka rare. Tii heka ibutu hãbu ratyre ratximyhỹre. Ihãrele tahe heka Deuxu Iòlòna-ki heka ijõ iny iratyre ratximyhỹre. Hãbu binahakỹ heka Deuxu Iòlòna-ò raaõbinanymyhỹre. Joaõ rexidelenyre rybe itỹnydỹmy rexidelenyreuhyye heka ritelemy ralore. Tule wiji nalòmhyhỹde sõwemy. Iu Joaõ rehemynykõle heka tuu rarybemyhỹre ibutu Deuxu rybedu mahãdu heka tuu rarybemy raremyhỹ. Tule Moisesi bede ywina kia rarybere. Tii Eliasi wesele ihỹre. Tetyhynytenyte aõbo. Iwese Deuxu rarybereri wesemy heka tii nade. ¹⁵ Inyõ ierysmy rurukeki, roholake wiji. Aõmybo ararybekre kainymy tiwesebo rỹimyhỹremy. ¹⁶ Tiiboho heka iwese weryry uladu risinymyhỹre wesemy ihỹrenyre. Kiamy heka tiinamahãdu-ò rarybemyhỹre: ¹⁷ —Jiarỹboho heka aõma wiunawihikỹ-di rawinymyhỹrenyre. Idi tahe teysatenyõhyymãhãtenyte. Tahe wiuna bederarysyna-di heka rawiunymyhỹrenyre. Ta bedewoõhyymahãtenyteri. ¹⁸ Joaõ Sebedỹdu heka riroxiõre. Vĩmy riõõre. Inywesereny tai tarybetenyte: —Tii raitxỹtemy ihỹre. Tyytybybina-di ihỹre. ¹⁹ —Jiarỹ Deuxu Riòre

heka rehemynyre Hābutyhyhykỹ wahe. Jiarỹ reroximyhỹre. Reōmyhỹre tahe kiaboho heka waluu aōkō heka toite. Urile heka wamy tarybemyhỹtenyte wabyre nihikỹremy wabemomohōkỹremy. Aōma òrarudu kia liinatyhy heka jiarỹ rare. Aō ikōkōlemy heka taraykynymyhỹtenyte ihārele taheka òbitilemy ixi-di tanohōtimyhỹtenyte.

20 Jesuisi heka sōwemy aōwiwihikỹmy riwinymy raremy. Ihārele heka imahādu rityhynyōhyymyhỹre heka. Kia Jesuisi heka rarybere kia hāwā mahādumy. 21-22 Orasi hāwā aō heka adee binatyhymy kanakre amahādu-ò wahe. Besaida hāwā mahādu, kaiboho aōna aōna wiwihikỹmy tabitenyte ahāwāreny-ki. Tiu heka ixi-txi ōhōtirenny reaōhykymyhỹre. Jiarỹ aōma Tiro hāwā-ki Sidō hāwā-ki aōna aōna wiwihikỹ ariwinyre wana inihe heka ixi-txi tōhōtirenny reare iniheka saumy tyky rexytyynyre tule brybysi ixityrereny heka rexihumy. Sidō hāwā Tiro hāwā heka urihimyo adeereny isirakre. 23-24 Kafanaō hāwā mahādu! Kaiboho heka tule ixitxirenny ōhōtirenny reaōhykyre. Aōma kaiboho heka awirenny ixidirenny tahoōtinymahātenyte, awityhyremy. Kaiboho heka òhōtenamy bekoabenykre bedebina heōtyhykỹ-ò dori besebenykre. Sōwemy dori aōwiwihikỹmy kaiboho tabitenyte. Deysana wiwihikỹ-di wahe. Tiu heka ixi-txi ōhōtirenny reaōhykymy aōrarurenny-txi. Aō wiwihikỹ Sodoma hāwā-ki rewinyre wana wahe. Tiu heka rabinaōhyre inihe heka wiji-ò. Aōkō botỹỹbenykre aōma Sodoma hāwā ratyre heka aōhōkỹmy botỹỹnybenykre, Deuxu ywisidỹnatxu.

²⁵ Tahe Jesuisi rexitòenyre Deuxu-ò: —Waha, biu bede-wana iweddu atximahâte. Kai uladu-ò aõna aõna tetÿnynyte. Tewòmahâte heka kia ibedeeryhykÿ lau heka tewòmahâte. Kai ixi-di bedeeryhykÿmy rōhōtinymyhÿre lau wahe. ²⁶ Tii heka adeewinare. ²⁷ Ibutumy heka Waha wadee riwahinyre tii heka riwaeryre. Jiarÿ tule tii reeryre. Aõma ixidee wikeki inydee ariteòsinyke. Timybo Waha rare. ²⁸ Elehydÿÿmy buruke aõbo? Manake wadee. Jiarÿ heka araelehynykre. ²⁹ Walòtityreherina ixidee bitidibenyke. Tai tahe wawana maaõmysÿdÿÿbenyke. Arabederynykre heka ywina-di. Aritidiōtyhy heka aõ utxiehekÿ atyreneny. Elehyna adeereny ariwahinykre awo araykyreny-ò. ³⁰ Aaõmysÿdÿÿna adeereny rewahinymyhÿre isiraõre heka. Iutxiemy aõkō rare.

12

¹ Sabado txuu, judeu elehynatxu Jesuisi rariamy ròirenyre maixõmoni oworu-ki. Tahe rekoarenenyre aõma maixõmoni oworuro-di heka irenyre. Kia heka tahe Jesuisi taerydÿÿna mahādu heka riarimyhÿre aõma riyrenykremy rama rahuraki. ² Iu-ki tahe fariseu mahāduō retehemmy ratximyhÿre. Tiiboho tahe rarybere kia Jesuisi-ò rarybere: —Kia hewa brebuna rare aõma sabadotxu riwinymyhÿré: —Aõherekibo aerydÿÿna mahādu iu riwinyrereri. ³ Tahe Jesuisi tamy rÿÿraxire aõma ijyymy ikoreny relyyre iwese Davi riwinyre wesemy heka riwinyrereri ramy rahureu. ⁴ Davi riki heka ralòre Deuxu dohodÿÿna hetowo-ò heka ralore. Tai tahe rirÿsÿmyhÿ kia

aõma xiwena-ki heka riymy. Kia orotxu heka aõma xiwena-ò hidỹỹna mahãduòle rỹimy. Tahe ihãrele heka riymy heka. Taijoi mahãdu-ò riwahinyre. ⁵ Kia wesemy aõma tariakõte bede ywina tyyriti-ki wahe. Aõma xiwena wahidỹỹdu heka rityynyõhyymyhỹre. Aõma sabadotxu kia wahisidỹỹna. Xiwena bede ywina wahe. Iu dohodỹỹna hetowo-ki ratximyhỹu. Tii heka sabadotxu bede ywina rityhynyõhyymyhỹre. Tahe heka aõbina bina riwinyrenyõhyymyhỹre. Kia tahe heka tule heka bede ywina tyyriti heka ritidỹỹna roire. Idi tariatenyõte. ⁶ Inatyhymy heka adee ararybekre. Inyõ kaki ratxikeki jiarỹ heka kaki heka inyõ ratximyhỹre aõma dohodỹỹnahakỹ heto-ki wahe. Dohodỹỹdu mahãdu ratyre heka watximahãre jiarỹ wahe. ⁷ Kiamy heka ritidỹỹna rỹimyhỹre. Jiarỹ heka xiwena luure ihãre tahe sõwemy heka iratyre ruxetõena luure. Jiarỹ aõma xiwena luure ihãre tahe iratyre heka aõma ruxetõena luure sỹ. Kaiboho terytenyte wana. Aõma heka ibinamy tarybehyyynyhỹte inyõ teòsamy ratxikeò. Aõma aõ riwinyrenyõhyymyhỹre. Kiamy wahe. ⁸ Jiarỹ dori Deuxu Riòre Hãbu watximyhỹre. Jiarỹ tule aõma sabadotxu wedu wãhãre.

⁹ Tai tahe Jesuisi nade heka ixyby aõma tohodỹỹnareny heto-ò. Ralòre heka sabadotxu. ¹⁰ Hãbuò ratximyhỹre debò binare. Debò rayjayja ihỹmyhỹre. Tahe fariseu mahãdu heka Jesuisi-di mynamy ratximyhỹre. Aõ rybebinamy rarybeke òraru-ki rymykemy. Tai tahe rỹraxyre Jesuisi-ò: —Timyrebohe brebuna aõbo sabadotxu deytedyỹ ada aõkõre aõbo. ¹¹ Tai ta Jesuisi ri-

rariwònyre: —Kaweselemy rōkōhōtinyrenyke. Kai heka aōmy abudoeni sohojilere. Sabadotxu heka reseke hālooro-txi aribi. Timybo mohōtinyke aōma bitake hālooro-ribi. Inatyhyre aōbo. Sabadotxu hārele bitake. Kohe, inatyhyra. ¹² Hābu heka budoeni ratyre heka iòwy rare. Aōma sabadotxu aōwaxinyre heka reyteke. ¹³ Tai hābu-ò rarybere Jesuisi: —Ebò biditytyke. Debò ritytyra ta wiwesele debò relere awimy. ¹⁴ Fariseu mahādu heka wii ributunyre, iribi rōhòrenyreu wahe. Widee raryberenyre: —Aōma timybo rikisỹnyrenykre rikimyrenykre rikirubunyrenykre.

¹⁵ Tahe Jesuisi rierymyhy kiamy rarybermyhyreny heka roholamyhy. Tahe Jesuisi rierymy heka. Iribi irehemy ratximyhyreny hārele, rierymy heka. Iribi tahe rexitare heka hāwā-ribi wahe. Idi heka ihemy heka rare riheludunyre. Sōwemy heka webinadu ihemy rare. Ibutumy riteytenyre. ¹⁶ Teyteydỹna mahādu-ò rarybere: —Uritere itỹnydỹỹōmykremy tuu ijyyōmykremy inyko-ò. ¹⁷ Ihexiu Isaia tyyriti-ki heka kawesemy rỹimyhỹre. Tii heka Deuxu rybeduō rare.

¹⁸ —Kaheka Wadeòdu rare. Tuure heka jiarỹ, tii heka retare. Rehitzinyre. Tii heka deysana wadee riwahinymyhỹre Tatytybytyhy tamy ariwahinykre. Ywisidỹna txuu heka ibutuko-ò relyykre.

¹⁹ Tii heka rryrōtyhy rebureōtyhy heka inyō-wana widee. Tiu heka inyō roholaōtyhy irybe dee. Ryki heka inyō irybe-ò roholaōtyhy.

²⁰ Aōma bòtòreō irybòhòmy roi eki. Tii raòròōtyhy. Txuheòtyjurà loosòna

urihimyòkeki heka tiu ruriõtyhy eleti-di.
Tii ritakre iaõbinana, inatyhynaõ binana
wahe.

²¹ Ibutumy heka iraròsòna iribi ritakre.

²² Hãbu rybeõ ruetàõ heka iny didydenyde
Jesuisi-ò wahe ralòmhyh̃reki wahe. Tii tyytybybina
iwo-ò ralòmhyh̃reki wahe. Jesuisi tyytybybina
riteònyre. Tai irue heka awimy relere rarybere.

²³ Ibutu iny sòwe heka heka ribedeòtiid̃h̃nyre.
Widee tahe raryberenyre: —Ka heka Davi
riore riòre òsana rare, Deuxu deòd̃h̃na wahe.

²⁴ Tahe fariseu mahãdu-ò roholare. Tahe
rarybere Jesuisimy: —Tii inatyhymy tyytybybina
riteònymyhyre inywo-ribi. Aõma tyytybybina
wedu ruru-di heka riteònymyhyre. Belisibu
ruru-di wahe. ²⁵ Jesuisi heka rieryre iraykyreny.
Tai tahe tamy rarybere: —Ijyymy heka tamy
rarybere. Iòlòna mahãdu wiribi ibutumy
rexihitxinykeki tahe rexihukre ibutumy
wiribireny. Tahe hãwã mahãdu taijoiy-ribi
rexihitxinykeki, awi aõkõ rare tai wahe.

²⁶ Wiribi rexihitxinyke wana. Tule awi aõkõ
rare tai wahe. Aõma Satanasi rexideònykeki
tahe tayreny-ribi rexitake. ²⁷ Belisibu ruru-di
tyytybybina ariteònyke wana aõdibohe aheludu
mahãdu riteònykemy ratximyh̃re. Tiiboho
heka aywisid̃h̃durenymy ratximyh̃re. ²⁸ Jiar̃h̃
Tyytybytyhy ruru-di ariteònykeki heka kaiboho
arurunareny Deuxu-ribi nade. Iòlòna adeereny
rehemynyre. ²⁹ Inyõ heka hãbu rurutere
hetowo-txi ralòõtyhy wasimy wahe. Tai
rawasinymy ratximyh̃keki tahe urile juhuvu hãbu
ritaataake. Idi tahe iheto-ribi aõdibo rawasinyke.

³⁰ Inyõ wabiòwamy aõkõ ihÿre wana heka, waòludu rare. Inyõ wawana ibutumy ratxiõmyhÿre wana tahe raybàtàmÿhÿre. ³¹ Inatyhymy jiarÿ adee anarybekre. Ibutu òraruna kanaixãwididÿÿke. Hãbu aõtxile aõbina bina rarybemyhÿre. Sohojile taruxãwidÿÿòtyhy. Aõtxile inyõ aõbina binamy Deuxu Tyytybytyhy rarybekeki. Tii aòraru rataòtyhy. Kia heka òraruna tiiehyymy rarekemy ihÿre. ³² Hãbutyhyhÿkÿ heka Deuxu riòremy aõbina binamy iny rarybekeki, wamy wahe, tii tahe ixãwidina dire. Deuxu Tyytybytyhyhymy rarybekeki, tii tahe iixãwidinyòhyre. Tiehyy kia òraruna-di rareke. ³³ Jesuisi rawesenanyre iny òwòru wese rare. Òwòru awimy rÿike wana, tai heka iratywihikÿõ-ki iny rahake. Ruru rasunymyhyre raruburerimy ihÿre. Kia tasÿ iratywimy aõkõ rÿike ibinamy. Aõma òwòru iny rierymyhyre aõbo iribi iraty dejuxunymyhyde òraru-ki iny rierymyhyre, awire. ³⁴⁻³⁵ Kaiboho heka hemylala mahãdu wesemy atximyhytenyte. Kaiboho heka abinatyhymy ahãtenyte. Timybo heka kaiboho aõwihikÿmy marybebenyke. Arayky aõbina bina hakÿlemy tõhõtinyteri wana. Tai taheka ary tuu ròhònyke ary tuu rarybeke. Aõma hãbu wihikÿõ ratxiremyhÿre wana aõnana wihikÿle tarayky-ki riyrubunymyhyre. Tii heka rarybemyhÿre. Hãbu bina tahe tarayky-ribi ibinalemy rarybemyhÿre. ³⁶ Ibutumy aõmybo iny rarybemyhÿre heka ywisidÿÿna txu tuu rarybemyhÿre rierymy timykibo tuu rarybere wahe. ³⁷ Òrarukibo rarybere: —Arybe òraru-ki heka ywisidÿÿna-ki atxiteri. Bitakemy aõbo ada

aõkõre aõbo.

³⁸ Bedeerydỹdu mahãdumy heka fariseu mahãduõ tamy rarybereri: —Erydỹdu, wadeereny biteòsinyke awiwihikỹõ. ³⁹ Jesuisi dirawyònyde: —Iny kamahãdu heka ibinatyhy rare aõ awiwihikỹ rexitòenymyhỹre. Abina binale wahe. Aõ wihikỹle bobiòtyhy. Tahe sohoji aõwiwihikỹõmy heka mohòtinyke. Jonasi widỹna wahe. ⁴⁰ Jonasi Deuxu rybeduõ widỹna wahe. Tii inataõ txu inataõ rumy uturahakỹ wona-ki ihỹmyhỹwesemy. Iwese Deuxu Riòre Hãbutyhyhykỹ bede-ki rarekremyhỹ wesemy inataõ txumy inataõ rumy. ⁴¹ Ninive hãwã mahãdu heka roholarenytxi tõhòtirenny reare. Iu Jonasi rybe ritỹnydỹreure wahe. Tahe inyõ kaiboho tamy taholatenyte. Sòwemy heka iny Jonasi ratyremy ihỹre. Ihỹrele kaiboho ixitxirenny òhòtirenny reaõre. Ninive tamahãdu tahe ibinany adeereny rarybekre. Ywisidỹnatxu wahe. ⁴² Iòlò Hãwyyõ heka ibòò irehe-ribi nade. Aõma Salomaõ bede erydỹna-ò roholakemy. Kaiboho heka inyõ-ò taholatenyte. Salomaõ ratyre heka sòwe inihikỹ ihỹre. Ihãrele ta ixitxi nohòtirenny reaõre. Ywisidỹnatxu heka Iòlò hãwyy ibinanamy kỹnarybekre umyrenny wahe. Ywisidỹnatxu. ⁴³ Aõma tyytybybina hãbu-ribi ròhònykreure tahe elehyydỹna riijekre. Aõma bedebinana tòteehekỹ tahe tuu reakre. Ihỹre tahe tai rahaòhykre elehyyna-ki wahe. ⁴⁴ Tai tahe ixidee rybekre: —Aròðsekre kỹhe. Iribi ranywỹhỹreò anakre. Tai tahe kia hãbu-ki rahara. Tyyrahakỹmy iwo-ki iruxeramy. ⁴⁵ Tai tahe ijò-txi reare. Debò inatxi reurò tyytybybina-txi iratyre tyhy wahe ibinare.

Tai tahe ridyke tahâbu-ki rasỹnyrenykemy. Kia hâbu heka iwese juhu raremyhỹre ratyre ibinamy ratximyhỹre. Kaiboho heka kia tyytybybina wese atximyhỹtenyte.

⁴⁶ Jesuisi tahe ijõ-ò rarybere ijõ ijoi-ò, tai tahe ise rehemynyre, iseriòreboho-wana. Sõwemy iny mahâdu-ò heka rarybere. ⁴⁷ Inyõ tamy rarybere: —Inyõ heka arâijereri adi ahelỹỹna. Kie heka rehemynyneri adee rarybekemy adi ratxireri. ⁴⁸ Jesuisi dirawyònyde: —Mota heka nadireri, mota heka waseriòrereri? ⁴⁹ Tai tahe tebòhe riteòsiriteòsinyre taerydỹỹna mahâduõ-ò. Ka heka nadi rare. Ka heka waseriòrere. Ka ijõ heka waseriòre. ⁵⁰ Wahadeewi riwinymyhỹreki tahe, tii heka nadi rare. Waseriòre rare. Waha dori biu-ki ratximyhỹre.

13

¹ Itxu taheka Jesuisi rare heto-ribi Kalileia aho ijà-ò. Tahe tai ronyre. Tahe rexiterenyre Jesuisi iny ribedeernyny. ² Tai ibututyhymy heka iny wirotyre. Tai tahe Jesuisi rexitareny urihimyo hâworo-ò ronymy rexitaranyre. Iny sõwehekỹ mahâdu tahe aho ijàkile heka roholamy rỹimyhỹre. ³ Tii heka relyymyhỹre aõma ijyyõ relyyre: —Aõna aõna wese ijyy rawesenanyre. Hâbu alòbòròmy rara. Tii heka alòbòròna dehuu rare. ⁴ Ijõ heka idi rehumyhỹu heka ijõ ryro-txi resere. Nawii heka riròmyhỹre riore heka. ⁵⁻⁶ Ijõ tahe rejuxunyre aõma manarutysu-txi. Tii tahe raumynyre aõwesele. Iraruxiòlemy heka rỹimyhỹ suu ibutureki. Idi bedetòtee rimodỹỹnyre. Idi tahe rure. ⁷ Òwòrudỹỹ resere edey-txi. Idi ta ruhunyre

edewanale. Idi tahe ede riòdesedỹỹnmyhỹre. Tai heka raratynyõlemyhỹre. ⁸ Ijõ tahe resere suwitxi-rawihikỹ-txi. Tai tahe sõwemy raratynyre. Sohoji òwòruty-ribi tahe 30my raratynyre iraty wahe. Ijõ 60my raratynyre iribi. Ijõ ta 100my raratynyre. ⁹ Tahe Jesuisi heka rarybere: —Kia boholatyhymy bonyke. Òhõtirenydikeki boholabenyke.

¹⁰ Tai tahe ierydỹỹna mahãdu Jesuisi rityỹraxyre: —Aõherekibo kai ijyy-di biernanykemy atxiteri, rawesenanyreri wahe.

¹¹ Tai tahe dirawyõnyde: —Kaiboho aõmybo Deuxu reernanyre kaiboho bierybenyke. Ijõ mahãdu tiu ijyy rieryõtyhy. Kaiboho dori Deuxu Òlõna teerytenyte. ¹² Hãbuõ iaõdikeki ijõ heka iratyre tamy ariwahinyke. Tai tahe sõwemy tamy rauhenyke. Tahe hãbu ihoõkeki ibutelemy ijõdikeki heka kiale iribi ibutumy aritakre.

¹³ Retehe my ihãre tahe robiõhyymyhỹrenyre tahe ririõhyymyhỹre. Tai heka ijyy-di reernanymy watxireri. ¹⁴ Iwese Isaia tyyriti-ki roire wese heka tiiboho ihỹrenyre:

—Roholamyhỹre, roholamyhỹre ihãre tahe rieryõhyymyhỹre. Retehe my ihãre tahe tiu robiõhykymyhỹre.

¹⁵ —Irayky tererenyreki wahe rieryõre heka. Òhõtireny heka ritòbònymyhỹre ta ijohonana-ribi. Tarue ribrenymyhỹre robike lau. Tahe wadee ròðseõtyhy. Aõkõre heka ariteytenykemy idi watximyhỹre. Tibo heka terareny aõkõre.

¹⁶ Jesuisi ijõ relyymyhỹre tamyreny: —Kaiboho heka eysamy atxitenyteri. Kaiboho

heka bobibenyke tahe bierybenyke. Aõmybo kaiboho tabitenyteri heka, taholatenyteri wahe. ¹⁷ Ihetxiu mahādu, hỹỹna mahādu wahe, tuu lobiximy riwisỹnymyhỹre. Aõma aõwobo kaiboho taholamyhỹtenyteò heka roholakemy riwisỹnymyhỹre tahe roholaõhyymyhỹre. ¹⁸ Tahe boholahe heka adee aritỹnynyke aõbo ijyy rare. ¹⁹ Òwòruty ryro-txi resemyhỹre heka iny ijoireny wesemy ihỹre. Ijohona tuuwesemy wahe. Tibo roholamyrenyihỹre tahe rieryõhyymyreny. Aõma Satanasi heka nade tai tahe warybe heka iribireny ritamyhỹre. ²⁰ Ijõ manarutysu-txi resemyhỹ mahādu tahe ijõ ijohonadu wesemy heka roire. Tiiboho heka deysana-di roholamyhỹreny. ²¹⁻²² Tai tahe urihimyòle rityhynymyhỹreny aõhõkỹmy dỹỹnana kanakeu tahe aõwesele riatyke ririmy reake. Kia edey-txi resera tasỹ aõma ijõ ijohonadu mahādu wesemy heka rare. Tiiboho heka aõma 1000 nierule aõnityhymy idi rõhõtinyinmyhỹreny nierudile. Tai tahe rexibedewonymyhỹreny. Tiu heka Deuxu aõmydỹỹna riwinyõhyymyhỹre, Deuxu Rybe riwiòhenanyreny. ²³ Kia suwitxira wihikỹ-txi resera wana tahe iwitxira ijohonadu mahādu wesemy heka rare. Tiiboho heka roholamyhỹreny rityhynymyhỹre sõwemy Deuxu dee roholamyhỹreny heka. Ijõ 100my wesemy raratynyre. Ijõ 60my raratynyre ijõ 30my raratynyre. Iny sohoji sohojiõ heka Deuxu-ò aõ riwinyrerimy ihỹre.

²⁴ Idi tahe iwitxira ijyymy relyyre Jesuisi tamyreny: —Deuxu Iòlòna heka kia wesemy

ihÿre. Oworudu heka aõma alòbòròna wihikÿõ ritòbrònymhÿre taoworuro-ò. ²⁵⁻²⁸ Tahe iòluduõ rumy heka tamy nade. Tahe iu ibutumy iny ròròmyhÿreu, asibinaty-di tamy rehure. Tai tahe alòbòròna asibina-wana ruhunyre kia aõma ede wana wimy urilemy. Taiki tahe kia aõma oworudu kia aõmysÿdÿÿdu mahãdu. Tuu heka ijyy-di nade tuu ijyy. Idinodu rarybere: — Aõma waòludu heka kia riwinyre wadee. Idi oworudu narybede: — Aõhebohe arotÿÿnyrenykre? Ta idile aõbohe arisiherenykre araxirenyre. Tai tahe rirawyònyre: ²⁹⁻³⁰ — Aõkõre wahe, kia ibutumy alòbòròna rirarutxinykre. Ixinamy heka ratybienykre tii-wana wiurilemy kia maixõmo arixina bededÿÿnamy bede relerekeu tahe iribi raarike. Ararybekre heka tamy kia aõma oworu-di raaõmysÿdÿÿkreò. Juhu delemy asi arisykre. Tahe ritoonykre. Idi tahe maixõmo heka riarikre kia maixõmo hetowo-ò riyrubunykre.

³¹ Tahe Jesuisi ijõ ijyy witxiramy relyymhÿre: — Aõma Deuxu Iòlòna heka aõma alòbòròna sòmo sòmo wesemy ratximhÿre. ³² Aõma raumynyneri heka aõma òwòru iyjatyhymy ibutumy òwòruty-ribi rariwesele relemhÿre. Taiki tahe kia nawiile tuu rÿtÿnymhÿre kia òwòru-ò.

³³ Uri paõ uri ixiòlòdÿÿna heka Deuxu Iòlòna wesemy heka kia ihÿre. Hãwyy heka paõ riwinymhÿreu, riurinymhÿreu tahe ibutumy raubÿtÿmyhÿre kia ibemy.

³⁴ Tai tahe rexiòlònymhÿre Jesuisi heka sòwemy tuu relymy raremyhÿ. Iu iny ribedeerynymy raremyhÿu. Tiiemy heka Jesuisi relyhyhÿ

raremyh̃y iu ròbedeeryd̃ỹmy raremyh̃y. ³⁵ Deuxu rybedu dori ihetxiu rarybere:

—Jiar̃y ijyy-di rebedeerynymyhỹre. Aõma tuu relyymyhỹre heka ierykõna rare. Tiuhe rieryõhyymyhỹre. Iu bede rexideelenyrauhyyle.

³⁶ Idi tahe Jesuisi rexitare iny sõwey-ribi rexitare. Hetõ-ò heka ralore. Tai tahe aõmybohe wakoreny inihe bedelyyke. Aòludu inybo aras̃nyremy. Kia ijyy heka aõma hãbu ede-di rehure ioworu-ò, taòludu oworu-ò. Kia inihe wadee bit̃nynyke aõbo rare wahe. Kia ijyy telyyté.

³⁷ Tai tahe Jesuisi tii dirawyònyde: —Kia hãbu alòbòròna wihik̃y ribòrònyre heka Deuxu Riòre Hãbutyhyhyk̃y, rare wahe. ³⁸⁻³⁹ Ioworu heka ibutu bede heka roimyh̃y wesemy roimyh̃yre. Aõma alòbòròna wihik̃yre heka ityhyd̃ỹdu iwese r̃yirawesemy r̃yira. Asi tahe kia ityhyd̃ỹdukõdu mah̃adu wesemy heka ih̃yre. Aõma kia iòludumy rarybereri tahe kia Satanasile heka ih̃yre. Kia iyresynamy rarybereri aõbo bedekonana heka tuu rininimy heka tuu rarybereri. Kia ỹju heka iyresydumyh̃y tuu rarybereri. Kia rimykre ede riorokremy rarybereri heka aõma ityhyd̃ỹdukõdu mah̃adu heka tuu rininimy rarybereri. ⁴⁰ Ritakre heka rihitxinykre. Heòty bedehék̃y heka idi rehukre risòkre iu wahe. Iwesele taheka bedekonana heka rarakre. ⁴¹ Deuxu Riòre, Hãbutyhyhyk̃y heka aõma ỹju riteònykre ibutu iny ributunykre.

Ityhyd̃ỹdukõdu mah̃adu ijõ iny òraruna-txi rityhed̃ỹdu mah̃adu heka ibutumy ributunykre widee. Ibutumy aõbina bina wid̃ỹdu

wahe.

⁴² Idi tii rihukre. Tai tahe ryrykre aōkỹmy rotỹỹnykre tai. Robumyhỹre taju. ⁴³ Kiau aōma

Deuxu hōrō mahādu tahe Waha Iòlòmý ronymyhỹre kie ronykre. Tiiboho loosòny wesemy heka ritoosònanykre txuu loosòna wesemy.

Ōhōtirenýdikeki ibutumý heka boholabenyke.

⁴⁴ Deuxu Iòlòna tahe nieru wesemy ratximyhỹre. Aōma nieru heka hynaō-ki rahara nieru-di tỹximý aōma surawo-ki idi hābu ixyby riwore. Tai tahe tii reysatyhymý ròðsere. Kia ibutumý taaōmydỹỹna-di heka rohonyre. Kia bedero riwykremy.

⁴⁵⁻⁴⁶ Ijō tahe tule Deuxu Iòlòna wesemy ka ratximyhỹre. Iwese ixiura wydydu ihỹre wesemy heka Deuxu Iòlòna ihỹre. Iwydydu heka iijese iijesemy riwymyhỹre. Aōwi riererimý riererimý heka tai rahamyhỹre iruxera-ki tii tahe riwymyhỹre. Kiau tahe tai rahare aō òwyhykỹō-ki heka rahare. Tii idi tahe rohonyre ibutumý taaōmydỹỹna-di idi tahe kia iwydymý idi ratxireriò riwyre.

⁴⁷ Riàō wese heka tule Deuxu òlòna ihỹre. Aōma rià-di iny rehumyhỹre wana heka ibutumý utura rimymyhỹre. ⁴⁸ Kia aōma idi tahe idi raixỹnymyhỹre riarimyhỹre iky-ribi. Aōma awi-di awihe riarirerimý iky-ribi. Ibinare rihitxinymý iribi. ⁴⁹ Kia bedekonana tahe iweselemý heka rarekre. Kia aōma ýju heka riarikre awi heka ibinau-ribi riarikre. ⁵⁰ Rehukre heòty bedebinakỹ-ò wahe. Tai ki tahe rirajuamýhỹkre ta aōhōkỹmy rotỹỹnymyhỹkre. Txuu rikýinymyhỹkre

⁵¹ Tahe Jesuisi tamy rỹřraxire: —Kiamy ibutumy teerymyhỹtenyte? Tiiboho riraòwònyrenyre: — Kohe, reerymyhỹrenyre. ⁵² Idi Jesuisi rarybere: — Inyõ bedede ywina bedeerydỹřna heka rityhynyreu, waheludu rarekreu wahe. Tii tahe iwese hãbu butudỹřdumy ratximyhỹre wese heka ronymyhỹre. Tii heka ibutudỹřna heto-ribi ritamyhỹre, tasỹ mahãdu-ò riwahinykemy. Aõ tyby aõ tỹmyra. Ibutumy heka ritamyhỹre.

⁵³ Tahe iribi Jesuisi rexitareu, ⁵⁴ tahe tahãwã-ò ròòsere. Judeu dohodỹřna heto-ki ribedeerynyre. Tahe ibutumy ribedeòtiidỹřnyre. Tiribibo heka tii bedeeryna rierymyhỹre: —Timyreki bohe aõwiwihikỹ rierymyhỹre. Tii kỹny heka aõma òwòru besedỹřwidỹřdu riòre heka rare. ⁵⁵ Jyje riòre wahe. Marie heka tule rare ise wahe. Txiau, Simaõ, Jyje, Judasi-wana iseriòre ihỹre tule wahe inatyhy? ⁵⁶ —Iseriòre hãwyy heka tule kaki rasỹnymyhỹre inatyhy. Timyrakibohe aõna aõna ikòkò rierymyhỹre. ⁵⁷ Tahe rityhynyõhyymyhỹre heka tai wahe. Jesuisi tamyreny rarybere: — Deuxu Riòre Hãbutyhyhykỹ heka tiu tauludu wijirana hãwã-ki inyõ rityhynyõtyhy rybeduõ ihetomy ijirana-ki. ⁵⁸ Tai tahe aõna aõna wiwihikỹ heka tai riwinyõhyre, rityhynyõmyhỹreki.

14

¹ Kia bedeu tahe Herodi, Kalileia iòlò, Jesusini-ò roholare. Aõikòkò heka riwinymyhỹre. ² My heka rarybere teòdu mahãdu-ò: —Kia Joaõ Sebedỹřdule aõbohe rubu-ribi riixixadỹřnyre. Tai tahe tii aõikòkò riwinymyhỹre. ³ Herodi tahe juhUU Joaõ ròtenawo-ki riteònyre. Tii taseriòre hãwyy òraru-ki

kia wesemy riwinyre, Herodia òraru-ki wahe. Herodia heka Filipi hāwyy rare. ⁴ Juhuu Joaō Herodi-ò rarybere: —Awi aōkō rare. Kai dori aseriòre hāwyy-wana atxiteri. Uritere heriōmyke. ⁵ Tai tahe Herodi heka Joaō rubudỹỹmy riwisỹnyre. Urile ruberumy judeu mahādu lau. Tamyreny Deuxu rybeduōmy rỹiramy Joaō Sebedỹỹdu rare. ⁶ Herodi kai beòramy bede reareu tahe worana bedehesi ritxienyreny. Herodia riòre ijadōma heka iko-ò resemỹhỹre. Iixe-ki tahe awimỹ Herodi rahare, Ijadōma luure wahe. ⁷ Tii tahe tamỹ rarybere kanakemy. Aōmybo wadee bexitòenykre. Inatyhymỹ adee ibutumỹ ariwahinykre. ⁸ Tai ise ijadōma-ò rarybere: —Aōma bexitòenykre: Sebedỹkỹdu ratilemỹ tamỹ bexitòenykre. Tai tahe ijadōma tamỹ rexitòenyre: —Wadeke bidiwyke Joaō Sebedỹkỹdu rati, pratoro-ki. ⁹ Tai tahe iòlòhe rabadewore. Ibutu ijohonaru-ò dori tuu rarybere ijadōma-ò. Tahe ibutumỹ riwinyke rỹire. ¹⁰ Tahe ihārele iòlò heka soldadoō riteònyre ròtenawo-ò kia Joaō rati resymỹ. ¹¹ Inyō diwyde pratoro-ki. Ijadōma-ò heka riwahinyre. Tahe tii tadi-ò idi rare. Riwahinyre. ¹² Idi tahe Joaō erydỹỹna mahādu dioryde iumỹ, riwykremỹ, rituunykremỹ. Iribi tahe roirenyre Jesuisiko relyyre.

¹³ Kia roholareu tahe Jesuisi ròhònyre ixisohojilemỹ bederahu-txi. Hāwò-di rexitaranyre rare. Iny sōwemy bede-di ròirenyre ihemy titxibo iru-ki rakemy. ¹⁴ Rehemynyreu tahe iny sōwehekỹmỹ Jesuisi robire. Tai tahe Jesuisi riwotòenyre. Ibutumỹ riteytenyre webinadu mahādu. ¹⁵ Tahe ratxioronyre. Tahe ierydỹỹna mahādu tamỹ

nade. Tamy rarybere: —Txuu ratxioronyra. Bederahy-ki dori atxiteri. Iny tahe biteònykre hãwãò-ò tai rỹsỹna ixidee riwykemy. ¹⁶ Tahe Jesuisi rirawyònyre: —Aòkõre, ariteònyòtyhy jiarỹ. Kaibohole tahe aõ tamy bidiwahinybedenyke. ¹⁷ Jiarỹboho kỹny diwatxiònyreri iruyre orotxu-di, utura inatxire. ¹⁸ Tai tahe Jesuisi narybede: —Bidiwahiny wadee. ¹⁹ Jesuisi tahe ibutumy iny asityre-ki ronykemy risỹnyre. Orotxu in-aubiòwa, utura inatxi rỹire, utura-wana rimyre tahe ritehere biu-txi àlàna Deuxu-ò riwahinyre. Idi tahe paõ riyreyrenymyhỹre teòdu mahãdu-ò riwahinyre. Idi rare iny sòwehekỹ-ò. ²⁰ Ibutumy iny riroxirenyre ihãre rihydyre. Kia iuhe-di iery-dỹỹna mahãdu 12 weriri ritỹxinyre. ²¹ Hãbumy 5000 òsana rỹimyhỹre. Ihãre tahe uladu-di rariaòhyre hãwyyboho-di.

²² Tahe Jesuisi taerydỹỹna mahãdu riteònyre aho kanawe-ribi ijà-ò reuròrenykemy hãwò-di. Jesuisi tahe rarire iny sòwehekỹ mahãdu rirybedỹỹmy. ²³ Jesuisi heka iny tahetoreny-ò riteònyremy rahudi tahe tii raòwònyre hãwãlò ratyy-ò ixitòedỹỹmy. Taihyyle idi bede roronyre ixi sohojihyyle. ²⁴ Kiaule hãwò ahotya-ki rare. Òbò nihikỹy-txi ixinalemy ratximyhỹre. Tiò tiò òbò riwelòrò riwelòròmỹ idi rehumyhỹ. Yhy deade txura-ribi. ²⁵ Rudile tahe Jesuisi biura-di heka rare taerydỹỹna mahãdu-ò, beratyredile heka rare. ²⁶ Iu Jesusile betyredile tamy rarau tahe, tiibohe heka ruberurenyre. Rirajuarenyre: —Worỹsỹ òsana inydee rareri. ²⁷ Tai tahe Jesuisi rarybere: —Aworeny bitamadỹỹnybenyke.

Jiarỹle watzireri. ²⁸ Tahe Pedro rarybere: — Wanyrỹ, inatyhymy kai atxiteriwana heka wadee manyarybeke betyre-ki arariakemy. ²⁹ Tahe Jesuisi tamy rarybere: —Manake wahe. Aõwesele tahe Pedro hãwò-ribi ròhònymy reare, Jesuisi-ò rakemy. Betyre-ki rariare. ³⁰ Yhylemy tahe robure. Tii urile ruberure. Tai ijirahakỹlemy riwisỹnyra berahatxi-ò. Tai tahe Pedro rarybere: —Biwatakewa Wanyrỹ. ³¹ Tahe Jesuisi rimyre: —Ainatyhynakỹny ibutelemy atxiteri. Aõherekibo heka tiwatyhynyõteri. ³² Idi hãworo-ò wiwana rorukurenyre. Yhy ruhure. ³³ Ierydỹỹna mahãdu Jesuisimy reàlære. Inatyhymy heka kai Deuxu Riòretyhy tate.

³⁴ Tai tahe reuròrenyre Kenesare bedè-ò. ³⁵ Ibutumy iny kowa Jesuisi rieryrenyre. Ti ibutumy webinadu mahãdu-ò relyyrenyre Jesuisimy. Tahe hãwã ikõkõ-ribi ritelenymy didydenyde. ³⁶ Tahe Jesuisi-ò rarybere. Ixinamy watyky-ò rerike, awimy relerenykemy. Ibutumy tamy rerire heka reytère.

15

¹ Jerusalẽ hãwã-ribi bedè ywina bedè erydỹỹna mahãduõ dehemynyde Jesuisi-wana rarybekemy. Tiiboho-wana tule fariseu mahãduõ dehemynyde. Tiiboho heka Jesuisi-ò rỹraxyrenyre: ² —Aõherekibo aerydỹỹna mahãdu tebòreny risuhòkòreri roxiko-ki. Inydeereny kia bedè ywina rare. Aõherekibo rityhynyõreri ihetxiu lahi rybe. ³ Jesuisi rirawyònyre yỹraxina-di: — Aõherekibo kaiboho Deuxu rybe tetyhynyõteri

kaiboho lahirybele tetyhynytenyte. ⁴ Deuxu bedede ywina kawesemy rarybere:

—Boo adi-wana ibutumy heka bityhynybenyke. Inyō rybebina tadi-ō tyby-ō rarybekeki. Tii tahe ruruke, tuu bedede ywina rybe wahe.

⁵ Kaiboho tahe kawesemy tebedeerynytemy tewitxiranyte: Inyō tadimy tybimy rarybekeki Wanieru Deuxu-ō wahisidỹnyamy. ⁶ Tai tahe inieru-ei tyby tadi-wana riwiōhenanyōre kia bedede ywina witxira tewinymahāte. Deuxu bedede ywina rityhynyōreki. ⁷ Kaiboho itxerenadu mahādu atxitenyteri. Isaia inatyhymy umy rarybereu:

⁸ —Kia mahādu wadee rybe-di riwadealānanyrenyre. Wowydyna wadee riwahinymyhỹrenyre. Inatyhymy aōkō heka kai tarybemahāte. Arayky dori Deuxu-ribi irehemy ratximyhỹre. Teertyhyōlemy heka atximahāte.

⁹ Iwowydyna heka wadee aō aōkō rare. Wabede ywina ribedeerynyōtyhy. Texibedeerynymahātenyte abede ywinarenydile.

¹⁰ Jesuísí rexidelenymy ribedeerynyre: — Boholabeny warybe-ō. ¹¹ Brebuna roxina-di biroxibenykeki, aō adeereny ibinaōtyhy aō aryrenymy ralōmyhỹre aōkō heka ibinare. Ryribi ròhōmyhỹre heka ibinare, arybe wahe. ¹² Tai tahe Jesuísí erydỹny mahādu Jesusiko rarybere: —Fariseu mahādu kỹny tamy awiōre kia wiji tuu tarybeta wahe. ¹³ Tahe Jesuísí rarybere: — Aōhere aōkō rare. Timyre aōkō rare. Ixinamy tuu raryberenyre. Iorutere-di nohōtirenỹmy.

Kia fariseu bedeeryna lòbòròna wese rare. Waha ribòrònyõre. Ibutumy waha ribòrònyõre suribi mahādu ritakre. ¹⁴ Inatxi hābu rueta wídee ryò ritȳnynymyhȳre wese. Hāwāry-ribi wiwanale hāloo-txi resekre. Tiiboho ixinamy biribenyke. ¹⁵ Tahe Pedro Jesuisi-ò rȳȳraxire: — Wakoreny inihe biditynynyke, roxina brebuna ijyy wahe. ¹⁶ Kaiboho ibutu wese atxitenyteri. Teeryõtenyte. ¹⁷ Ibutumy iny aõ rirȳsȳmyhȳre weryri-di ramyhȳre tahe ròhònymyhȳre. ¹⁸ Tahe inyõ rybebinamy rarybemyhȳre. Tii iwo ibinare, irayky ibutumy ibinare tai wahe. ¹⁹ Raykywydyna binahakȳ-ribi heka òtaòtana, rubuna, wasina, ruina ujõmo inyry-ribi ròhònymyhȳre. ²⁰ Kia aõmydȳȳnana iny risurisumyhȳre, inydee ibinare. Tahe roxinako-ki iny tebò risuhòmymhȳré, kia tahe aõ aõkõ rare, ibina aõkõ rare.

²¹ Iribi tahe kia-ribi ròhònyreu tahe Jesuisi rare irehetytymy Tiro hāwā-ò Sidõ hāwā-ò. ²² Kana bede hāwyyõ tamy nade. Tahe tamy rexitòenyre: —Wahĩ, Davi riòkòre, biwaruxetoenyke hewa. Waritxòre heka tykytyby bina-di iwoku-ki ratximyhȳre. Anohòkȳmy heka idi rotȳkȳnymyhȳre. ²³ Tahe Jesuisi aõmy rarybeòhyre tamy. Taerydȳȳna mahādu tahe rarybere: —Biteònyke hewa. Inyboho dori riixiranyrenyteri. ²⁴ Jesuisi tahe rarybere: —Jiarȳ Deuxu riwateònyre judeu mahāduòle, tabudoeni mahādu iõre mahādu wese wahe. ²⁵ Hāwyy ixityre nade. Tatiowotimy resere. TAhe ixityre tamy rarybere: —Biwawikòhenanyke hewa, Wahĩ. ²⁶ Jesuisi rirawyònyre: —Awiòhedȳȳna kia wese

rare aõma hãbuõ тариòre-ribi rỹsỹna riwyrta tahe idi rehura ijòròsaòle. Kiawese rarekre, jiarỹ arawiòhenanykeki. ²⁷ Hãwyy rarybere: —Inatyhy rare. Kuladu-ribi ano rỹsỹna resemyhỹre bedetxi, tiki tahe itxòròsa ritxòre idi riwyy reakamy riròmyhỹre. ²⁸ Inatyhymy Jesuisi rirawyyònyre: —Kai ainatyhyna sòwere. Adee ariwinykre aõmybo textitòenyteri. Iule iriòre reytemy rare.

²⁹ Tahe Jesuisi ròsere ixityre Kalileia ahohokỹ-ò. Raòwònymy rare hãwãlò-ò. Iratytyre ronyre. ³⁰ Sòwemy heka iny webinadu didyde: itiere mahãdu, iruetà mahãdu, irybeò mahãdu, aõ ikòkò heka bina bina witxira witxira idi rare. Jesuisiko-ò heka ritidirenyreki ibutumy riteytenyre. ³¹ Iny ruetà rỹira mahãdu itxeretyhymy riwinyre. Rarybekòmy rỹira mahãdu, rarybemy rỹimyhỹ teysamy. Itiere rỹira mahãdu, rariamy rỹimyhỹ. Tai ibutumy iny ribedeòtiidỹnyre heka tahe judeu mahãdu Deuxu-ò wowydyna riwahinyre.

³² Jesuisi rarybere taerydỹỹna mahãdu-ò kanakemy. Tahe tamyreny rarybere: —Jiarỹ kỹny rewotòenyteri kainy mahãdu rỹireridi. Inataò txumy bedetiera waki. Aõ heka ihokòre rirỹsỹrenykemy. Iòwedỹỹkòlemy ariteònykeki heka ijò reseke ryrowetyakile. Rama riatyke. ³³ Tai tahe ierydỹỹna mahãdu rarybere: —Inyboho bederahy-ki, titxibo heka rỹsỹna arimykreyre iny sòwehekỹ-ò ariwahinyrenykremy? ³⁴ Tahe Jesuisi tamyreny ritỹỹraxinyre: —Tiwesebo roxina-di atxitenyteri. Tahe rirawyyònyre: —Debò inatxi reurò orotxu sòmo sòmomy idi watxireri utura deyre ijò rare. ³⁵ Jesuisi rarybere ibutumy iny

ronykemy. ³⁶ Tahe tíí rexitòenyre Deuxumy reàlàre. Orotxu, utura-wana riereerenyre tahe taerydỹỹna mahādu-ò riwahinyre idi rakremy. ³⁷ Ibutumy riroxire heka kia iny sōwehekỹ ta rihydyre. Tabyre rahudi tahe riarire ierydỹỹna mahādu. Tai tahe rahure tỹxihikỹlemy. Debò inatxi reurò weririmy heka ritỹxinyrenyre. ³⁸ Tahe 4000 hābumy riòwenyre, kia txuu wahe. Uladu, hāwyy-di rariaōhyre. ³⁹ TAhe Jesuisi iny-ò rarybere tasỹ-ò ròòsekemy ixyby. Iribi tahe Jesuisi hāwò-di reuròmý rare Magadã hāwã-ò.

16

¹ Fariseu mahādu saduseu mahādu nade Jesuisi-ò iurihixidỹỹmy riitxenanyrenykemy: —Aōbedeerydỹỹnabo heka biu-ki iribi rexitòenyre. Biwateòsinyke heka aōwiwihikỹ-di biu-ò jiarỹboho arieyrenykre, kai inatyhy tate wahe. ² Idi tahe Jesuisi rarybere: —Kaiboho heka awirenyre biuwetyky erysy-ki. Jesuisi rarybere: —Kia rybe tarybema hāte. Txiorotxumy heka biuwetyy isòhòkỹra-ki, biurasòmý tahe awimý txu kedeakre. ³ Biurasou ibede lyby lybýmý txu-di kedeakeki tahe biu ròahyyhy bedé txu rariakre. Myhe tarybema hāte. Kaiboho heka iwitxira aōhebo rotỹỹnykre heka teeryteny kōlemahātenyte. ⁴ Iny kamahādu heka ibutumy ibina binare. Tiu heka rityhynyōhyymyhỹrenyre. Rexitòenymyhỹrenyre heka biu-ò rityhynykemy. Tahe riwahinyōtyhy heka aōma bedeerynaō. Kia Jonasi-ò bedeeryna rareōle tahe tamý rakre heka. Tahe Jesuisi rexitamý rare iribireny.

⁵ Idi tahe aho weribiijà-ò reuròrenyreu tahe, tōhōtirenny rosare tarỹsỹnarenny-ribi. ⁶ Jesuisi tamny rarybere: —Fariseu mahādu, saduseu mahādu iurina-ò bexiebenyke. ⁷ Ierydỹỹna mahādu tahe widee rarybere: —Tii kia rarybere inny orotxu diwyōdeki. ⁸ Jesuisi roholare aōmybo raryberenyyre tahe tamnyrenny rarybere: —Aityhynarenny urihimyyōre. Aōherekibo orotxumny jiarỹ rarybererimny tahōtinytenyyte? ⁹ Tiu kaiboho bierybenyōtyhy. Iruyyre orotxumny remyyre. Idi 5000 hābumny reōwenyyre. Ihāre tahe weriri txỹxi tỹxihikỹlemny rỹimyhỹre rauhenyyre. Itxi aōbo ōhōtirenny reakōmyhỹre. ¹⁰ Ixityreu tasỹ 4000my reōwenyyre, debō inatxi reurō orotxu-dī. Ixiyrubule rauhenyyre. ¹¹ Jiarỹ orotxumny rarybeōre. Fariseu mahādu, saduseu mahādu urina-ribi bexiebenyke. ¹² Tai ierydỹỹna mahādu rieryrenyyre aōmybo rarybemyhỹmny Jesuisi heka fariseu saduseu bedeerydỹỹnamny rarybereri.

¹³ Idi tahe Sesaria Filipi hāwā iōhōmny rehemnyyyre. Jesuisi rỹỹraxire taerydỹỹna mahādu-ò: —Inny wamny rarybereri. Mobo heka jiarỹ raremny heka wadi rỹireri. Jiarỹ Hābutyhyhykỹ rare, Deuxu Riōre wahe. ¹⁴ Ijō kỹny rarybemy rỹireri: —Kai riki heka Joaō Sebedỹỹdu atxiteri. Ijō riki Elia atxiterimny adi rỹireri. Ijō tahe Jeremiamny adi rỹireri. Ijō heka Deuxu rybeduō riki heka atxiterimny adi rỹireri. ¹⁵ Tai tahe Jesuisi rỹỹraxire taerydỹỹna mahādu-ò: —Mowexe watxirerimny wexe wadi tahōtinytenyyteri. ¹⁶ Simaō Pedro heka rarybere: —Kai Kristu atxiteri Deuxu deōdỹỹna heka tate. Kai heka Deuxu Riōre tate. ¹⁷⁻¹⁸ Tahe

Jesuisi rirawyònyre Pedro-ò: —Inatyhymy Pedro tate, Waha, biu-ki Mana ani rare. Boholake, ratximyhỹrele kia adee riteòsinyre. Iny aòkõ kia adee riteòsinyre. Wadohodỹỹna mahãdu kia mana tyre-ò ariwinykre. Rubu dori heka tiu ituedeõna. ¹⁹ Waiòlõna rayna heka adee ariwahinykre. Kabede-ki aõwidỹỹ adee binakeki tule biu-ki ariijõnykre. Aõtxiletxibo aõwidỹỹmy burukre tasỹ biu-ki tule adee ariwinykre. ²⁰ Jiarỹ inatyhymy Deuxu deòdỹỹna rare. Tuu ijyyrenyõmyke.

²¹ Iribi tahe Jesuisi itỹny relymy taerydỹỹna mahãdu-ò. Rurukremy heka relyre: —Arakre heka Jerusalẽ-ò. Tai heka matuari mahãdu, õnosõna bedeeryna mahãdu, xiwena wahidỹỹdu mahãdu-wana riwarubunykre. Inataõ txu-di tahe ixyby rubu-ribi adexixakre. ²² Idi tahe Pedro heka Jesuisi ridyre ijõ erydỹỹna-ribi tahe tamy rarybere: —Aòkõre, Wanyrỹ, tiu heka tiiboho ararubunyrenyõtyhy. ²³ Tahe Jesuisi rarybere Pedro-ò: —Waribĩ bexihitxinyke. Kai heka Satanasi weselemy atximahãte. Iwese kai taraykynymahãte heka aõ Deuxu deewinamy aòkõ tuu tahõtĩnymahãte hãbudeewile rare. ²⁴ Idi tahe Jesuisi rarybere taerydỹỹna mahãdu-ò: —Inyõ wawananomy rurukeki, ixi-ribi heka tõhõti rosake. Nomy rurukeki heka taitxeò rimyke idi tahe wahemy kanake. ²⁵ Inyõ wahemy rariakemy ixi-di rõhõtĩnyhyke wana heka irumy inonana irehemy ixi-di ratxikeki heka tii ihãrele ruruke. Inyõ taumy riõnonykeki waòraru-ki tai tahe tii ròtake. ²⁶ Inyõ heka ibutumy aõna aõna bede-ki ributunykeki. Tahe ihãrele heka tii ruruke. Tule

umytuedeõna riõnonyre. Aõ tarasana tamy aõ aõkõ rare. Iny iruna riõwynyõhyymyhỹre, ixiyby tamy kanake wahe. ²⁷ Jiarỹ, Deuxu Riøre, Hãbutyhyhykỹ dori kanakre wana aõwesele. Taỹju loosõna-ki tii kanake.

Iny ibutumy ariõwynykre bibutunymy aõbo iny riwinymyhỹré heka aõwiwihikỹ aõbina bina.

²⁸ Iu jiarỹ, Deuxu Riøre, Hãbutyhyhykỹ, kanakeu tahe inyõ kaibohoõ tuu robikre, Iòlòmý kanakreu.

17

¹ Reare heka debò sohoji reurò txumy. Tahe Jesuisi ridyre Pedro, Txiau, Joaõ-wana. Joaõ tahe Txiau seriøre rare. Tahe raòwònyre tii-boho-wana hãwâlò ratòòhòkỹ ratyy-ò. Inyõ heka tii wana raõhyyre. ² Ikoreny-ki tahe Jesuisi rexi-witxiranyre. Iòsana heka roosøre. Txuwese-hekỹle relere iòsana heka ratỹrỹrỹnyre. Ityky tasỹ rauranyhỹkỹre. Tahe roosõna itoosònadihikỹre. ³ Iu tahe tuu robire Moisesi rubu, Elia rubu, Jesuisi-wana widee rarybemyhỹreny. ⁴ Tahe Pedro tamy rarybere: —Awire, Wanyrỹ, kawese watxirenyrerì kaki. Adeë wikeki hetomy ari-winyrenykre ijõ adeekre, ijõ ta Moisesiõkre, ijõ Eliaõkre. ⁵ Iu Pedro rarybereriule tahe biuwe-tyky urahakỹ relere. Iyribile rybeõ narybede: —Kia heka Wariøre waluu heka rare. Boholabeny irybe-ò. ⁶ Idi tahe ierydỹỹna tamy roholareu, tahe ruberure. Tahe reserenycre iòsanareny bede-ò. ⁷ Jesuisi tamyreny nade: —Breburenyõmyke hewa bodorukubedenyke heka. ⁸ Reteherenyre tahe Jesuisi sohojile tai rỹire.

⁹ Iribi tahe diberenydenyde hãwãlò ratyy-ribi, Jesuisi narybede: —Uritere waijyyõmyke inyko wiji tuu tabitimy. Iu jiarỹ, Deuxu Riòre Hãbutyhyhykỹ, rubu-ribi riixixanykreu tahe tuu belyykre. ¹⁰ Tahe ierydỹỹna mahãdu Jesuisi-ò rỹỹraxire: —Aõherekibo tarybetenyteri —Elia juhUU kanakemy ako-ò juhUU kanakemy. ¹¹ Jesuisi rirawyònyre: —Inatyhy rare tii juhUU kanakre. Ibutumy heka bedede riywinykre. ¹² Tule ararybekre kiamy: —Elia nade tahe ihãrele heka iny rieryõhyyre. Aõhõkỹmy risỹnyre. Iwese Elia aõhõkỹmy risỹnyre wesele tahe Deuxu Riòre Hãbu heka aõhõkỹmy risynykre, jiarỹ wahe. ¹³ Tai tahe Jesuisi erydỹỹna mahãdu rieryrenyde aõmybo Eliamy tii raryberemy Joaõ Sebedỹỹdule tahe Jesuisi rarybere.

¹⁴ Iribi tahe dòòsedenyde iny sõwemy riraõmy rỹimyhỹre. Hãbu-ò nade Jesusiko-ò tatiowomy resere: ¹⁵ —Wanyrỹ, ruxetõena wariòre-di bi-wahinyke. Irayky awimy aõkõ ratximyhỹre. Bera-txi resemihỹre. Heòtyru-txi resemihỹre. Ibutumy aõna aõna riwinyrerimy ihỹre. ¹⁶ Aerydỹỹna mahãdu-ò heka adidyde tahe tiu riteytenyõtyhy. ¹⁷ Jesuisi rirawyònyre tamyreny: —Kaiboho isira mahãdu atxitenyteri. Aõ heka inatyhyna heka akireny ijõkõre. Tiwese bedede dỹỹnana bohe araòludunyrenykre. Bedese inihe bididy uladu wadee. ¹⁸ Tahe Jesuisi rarybere kia uladuwo-ki ratximyhỹò: —Iribi wa bohonyke! Tahe uladu reytemy reare.

¹⁹ Idi ierydỹỹna mahãdu Jesuisiòle rarybere: —Aõherekibohe jiarỹboho tyytybybina iribi reteònykõreri? ²⁰ Aõmareki kiehe ainatyhyna

ibutetyhyreki òwòrutu sòmowesele ainatyhyna dikeki heka kai aõwiwihikỹ biwinyke. Kai hãwãlò-ò marybeke: —Iribi bexitake! Tai tahe hãwãlò rexitake iwitxira suò. Aõ aõkõ adee isirake, ainatyhyna direki wahe. ²¹ Kia tyytyby bina iwitxira rare. Isiratyhyre heka. Kaiboho bexitòenybenykeki, binarehebenykeki, ixiery tyytybybina biteònybenyke.

²²⁻²³ Kalileia bedeki Jesuisi taerydỹna mahãdu-wana ributunyre. Tai Jesuisi rarybere tany: —Jiarỹ, Deuxu Riòre Hãbu, rare. Tai inyõ riwahinykre hãbubina-ò warubudỹmy. Inataõ txu-di tahe rubu-ribi adexixakre. Tai tahe ierydỹna mahãdu rabadewo nihikỹre.

²⁴ Iu tiiboho heka Kafanaõ hãwã-ò ritehemynyreu, inyõ Pedro-ò nade. Tii dohodỹna òwy butudỹdu rare. Tahe rarybere: —Awedu aõbohe tii rexiòwinykekõ. ²⁵ Pedro rirawyònyre: —Tii riòwynymyhỹre. Tai tahe Pedro rakemy reare. Iu Pedro tuu Jesuisi-ò rarybekemy hetowo-ò raloreu, Jesuisi juhuu rarybere: —Moribibo iòlò rexitòenymyhỹre òwydỹnamy. Mynydu mahãdu-ribi aõbo ada ta taijoiribile aõbohe rotamyhỹre. ²⁶ Pedro tahe rirawyònyre: —Mynydu mahãduòle rexitòenymyhỹre. —Inatyhy rare, Jesuisi rarybere. Iijoi mahãdu òsana riòwynyòhykymyhỹre. Jesuisi rarybere: —Ihãre tahe ròkòòwydỹkre. ²⁷ Òbitimy rakaòwònyrenykre. Kia Templo heto òwymy. Ibinamy kia iny-ò ariwinyòtyhy. Kai heka makre ahohokỹ-ò awaxi-di behukre. Juhu utura kanakrele heka bidimykre. Idi iry biraynykre. Tai nieruò-ki mahake. Iribi bidityamy tahe makre iny òwydỹmy.

18

¹ Iule tahe Jesuisi erydÿÿna mahâdu tamy rehemynyre rÿÿraxire: —Mobohe Deuxu Iòlòna-ki nihikÿmy rarekre. ² Jesuisi heka ratximyhÿ uladuô ibire-ki. ³ Idi tamy rarybere: —Kai uladu weseleômy mabeôkeki, Deuxu Iòlòna-ò malòbenyôtyhy ⁴ Uladu wese maraykynybenykeki heka, tii tahe Deuxu Iòlòna-ki inatyhymy rÿirakre. ⁵ Kai waôraru-ki uladu kawesemy biwiôhenanykeki tiwawiôhenanymahâte ⁶ Kai uladuô ôraruna-txi resekemy risÿnykeki, kai abinatyhymy atximahâte. Inyô ôy ritakamy reroti-di aratakemy heka inyô adi rehuke bera-txi. Tii tahe awityhyre adee.

⁷ Sôwemy heka aôna aôna rÿira wary-ribi iny riatykemy. Tii adee ibinatyhyre. Tiiemy heka tuhy rarekre. Inydee heka ibinakre heka. Wary-ribi riòlòdÿÿnymyhÿre heka tamy ibinakre. ⁸ Ebò ôraru-ki tahe wainatyhyry-ribi bexitakeki, ebò biòròmy idi behuke. Awityhyre heka adee Deuxu Iòlòna-ò malòkre sohoji ebòdile. Inatxi ebò-di heòty bedebina-ò malòkeki, awiôre heka. ⁹ Tule arue sohoji ôraru-ki kia ôrarunamy beseke lau, urile bitake idi behuke. Arue wiò-di heòty bedebina-ò malòheny arue-di wiòle. Biu bedewihikÿ-ò malòke tahe awire heka arueyremy. ¹⁰ Iny nihikÿ ityhy iny yja mahâdu heka tuuôre. Uritere heka iweserenyômy atxibenyke kaiboho bexiijebenyke tamy. Iny aôkô mahâdu dori tii iÿju dire heka. Iÿjureny heka Deuxuko tii ibutumy relyymyhÿre tureny. Idi ôhôtireny-ribi bosabenyôke. ¹¹ Jiarÿ Hâbutyhyhykÿ rare, Deuxu

Riòre wahe. Ityhydỹ̃dukõdu mahãdu ibutumy ar-itakemy anade. ¹² Rakawesenanykre heka kaijyy wesemy. Rakarybekre heka kahãbu 100 budoeni ijõdire wesemy. Sohoji heka iõre iy-ribi. Kia hãbu idi itxeredu tahe iy-ribi iõre rakre ijesemy. Iuhe tahe hãwãlò-ki riroximy ririre. ¹³ Tai rahakre wana heka teysamy ratxikre. Kia sohoji òrarukile reysakre. ¹⁴ Iwesetyhylemy taheka inyõ iõõtyhy Waha-ribi. Tamy dori kia ibinare.

¹⁵ Inyõ adee rexiòrarunykeki tahe tamy makre rybemy. Uritere inywitxirako-txi rybeõmy tuu. Tahe tamyhyylemy marybeke. Aityhydỹ̃du seriòre heka arybe-ò roholakeki, tahe ixi-txi tõhõti reake wana, ixi dee ibinamy rõhõtinyra wana, tai tahe kai ixyby tii-wana ityhydỹ̃du seriòre biòwamy beleke. ¹⁶ Aõhe wana tahe arybe-ò roholaõhykre, tahe ixityre make inyõ wana rexibiòwanymy.

Iny inatximy ixihe-ki bidyke. Tii tahe arybe-ò ijohonaduke inatyhy raremy arybera-txi resekemy wahe. Iu dohodỹ̃na-ki rarybekreu, tai tasỹ tii rarybeke teòsamy aõkõ ratximyhỹrelemy rarybeke. ¹⁷ Tii irybereny-ò roholaõkeki, tai tahe dohodỹ̃na mahãdu-ò belyyke. Tii irybereny-ò roholaõkeki, tai tahe biteònyke. Tii iwese òrarudu mahãdu heka adee rarekre, bedede dinodu-ò nieru wydydu wese wahe. ¹⁸ Iwese kaiboho waityhydỹ̃du mahãdu kabede-ki rõhõtinyre wesele, tule araykywesetyhyle Deuxu biu-ki rõhõtinykre. Aõbo adee kabede-ki aõwidỹ̃ ibinare ada awire heka tule biu-ki ibinamy rarekre, awimy rarekre. Arybe riwitxi-

ranyõtyhy kowa biu bede-ki. ¹⁹ Iwixiraõmy adeereny ararybekre: —Ijõ titxibo inatxi ada inataõ ityhydỹdu seriõre wiweselemy raraykynykre. Waha-õ rexitõenymyhỹreki iwese rexitõenyre wesele heka tamy riwinykre biu-ki. ²⁰ Titxibo waniõraru-ki inatxi, inataõ wii ributunykre heka, jiarỹ taile watxireri.

²¹ Tahe Pedro rỹrãxire Jesuisi-ò: —Bede erydỹdu! Waityhydỹdu seriõre heka wadee rexiõrarunyekeki, tiwesebo sõwe ariixãwididỹnykre ixi-ribi debò inatxi reurò, my aõbo? ²² Jesuisi rirawyðnyre: —Aõkõre, debòinatximy aõkõre, 490 wesemy wahe. Ixityre ixityre biixãwidỹnykre. ²³ Deuxu Iòlòna kawesemy rare: —Iòlòõ heka teòdu mahãdu kia contamy robikemy idi ratxireri. Tiwesebo inieru-di rasiranyre wesemy wahe. ²⁴ Sohoji teòdu juhoo dehemynyde. Sõwemy heka tevedỹna ratximyhỹre, 1000,000 womati tỹrỹrỹhỹkỹ nieru wahe. ²⁵ Inieruõre heka iòwydỹna wahe. Idi rohonykemy heka iwedu riteðnyre deòdu mahãdu wesemy. Tariõre-wana tahãwyy-wana ibutumy deòdumy roirekemy. Aõbo tai rỹimyhỹ heka ibutumy idi rohonyre. ²⁶ Tai kia deòdu heka tatiowotim� resere kia iòlòko-txi: —Waiòlòreny, txiòinihe biwaraðkre ariòwynykre ibutumy. ²⁷ Tai tahe iòlò riwotðenyre aõma ixinahykylemy ritusanyre. ²⁸ Tai tahe kia hãbu he rare kia urihim� tamy radevenymyhỹò heka rexinohõtidỹnyre. Tai tahe hãbu lòtikile rimy. Rierenymy resere ribòtòrarytxynyre: —Bidiwaðwynykre kỹnyhe wijityhyle. ²⁹ Tai tahe tatiowom� resere, rarybere: —Txioke inihe

ariòwynykre ibutulemy. ³⁰ Tai tahe rirutyre ròtenawo-ò idi riòtenyre. Riwoòdenyreòhyyre. ³¹ Itxeredu mahādu heka rabadewore tai tahe ibutumy relyyre iòlòko. ³² Tai tahe ixityre tamy rarariòwyre tamy rarybere: —Aòherewe, deòdu binahakỹ, jiarỹ araixāwididỹnyre ibutumy inatyhy? Kai dori ixitòedỹna wadee tewinyta. ³³ Aòherekibohe aleina kia adee nadevenymyhỹde kia teixāwidinyòta, iwese jiarỹ araixāwidinyre wese. ³⁴ Tai tahe tii rimyre reburere itere iòlò, tai imynymy riteònyre rotenawo-ò riòwynykre xiery riòlòdỹnykremy. Tai aòhòkỹmy rotỹnyymyhỹre. ³⁵ Jesuisi rexihura narybede: —Kiawesele heka adeereny rarekre. Ityhydỹdu seriòre taseriòre riixāwidinyòkeki heka iwesele heka waha adi riwisỹnykre.

19

¹ Jesuisi ibedeerydỹna-ribi rexihureu, Kalileia bede-ribi ròhònyre. Bero Jordaò weribiijà-ò reurore, Judeia hāwā bede kanawe-ribi ijà-ò rehemynyre. ² Tai tahe sòwemy iny webinadu mahādu rỹire. Idi tahe ihemy rare. Ibutumy riteytenyre. ³ Fariseu mahādu imynymy idi riwisỹnymyhỹre aòbinamy rarybekeki rimykeny. Tai tahe tamy dỹraxyimy namyhỹde aòsirahakỹmybo: —Iny bede ywinareny tahāwyy riteònymyhỹre urirybelemy, wiribi resekemy. ⁴ Jesuisi dirawyònyde: —Ritidỹnyamy aòbo tariaòmyhỹte idi? —Deuxu ibutu widỹdu heka juhūu hābu hāwyy-wana riwinyre. ⁵ Idi tahe rarybere:

—Hābu heka tybyboho-wana tadiboho-wana wiribi rexihitxinymyhỹre tai tahe tahāwyywanale wii ributunymy rỹira.

⁶ Inatxi heka sohoji weselemy rarekre, hābu tahāwyy-wana. Deuxu heka hābu tahāwyy-wana ributunyre, inyō heka tiu rihitxinyōtyhy. ⁷ Tahe ijōmy fariseu mahādu ritỹyraxinyre: —Aōherekibo Moisesi kawesemy juhūu rarybere:

—Hābu tahāwyy riteōnykeki juhūu urile tyyriti tamy riwahinyke riteōnykekoki.

⁸ Tahe Jesuisi kawesemy rarybere: —Kaiboho heka ieryna urihimyōlereki aō isirareki heka kia riwinyre. Juhūu tahe kawese aōkō rỹire. ⁹ Aōmale tahe ixinamy riteōnyke ixi-ribi ōta ōtadule heka aōwaxiny tuu riteōnyre ixi-ribi. ¹⁰ Tai tahe ierydỹyna mahādu rarybere Jesuisi-ō: —Tahe kiawesekeki heka uritere heriōmy hāwyyōmy, hābuōmy.

¹¹ Jesuisi tahe dirawyōnyde: —Kaa bedē erylina heka aō ibutuhukỹ-ō aōkō tureri aōma Deuxu bedē erylina tamy riwahinymy hỹreōle heka tureri.

¹² Aōtxi-ki tahe tuu hābuō rỹira hāwyy my heridumy aōkō rỹira. Ijō hābuō tahe tiemy tunodumy rỹirerimy ihỹre. Iwixira hābu-ō rexiwahinymy rỹireriki heka tuu rỹirerimy ihỹre. Ijō tahe tuu rỹirerimy ihỹre aōma Deuxu aōmysỹdỹyna ōraru-ki wahe. Kaa rybe tahe inyō tahe rityhynykeki tii inatyhymy rityhynyke.

¹³ Inyō didyde uladuō Jesuisi-ō tamy rexitōenykemy tebō iraty tyre-ki roirerilemy. Ierydỹyna mahādu tahe uritere iixiradỹỹōmyke.

¹⁴ Tahe Jesuisi rarybere: —Ixinamy kanamy hỹke uladu wadee. Uritere itinysỹrenyōmy. Uladu

wesemy dori Deuxu Iòlòna ròtedu mahādu ratximyhyre. ¹⁵ Jesuisi tahe iratytyre tebò ritidire tamy rexitòenyre. Idi tahe Jesuisi rare.

¹⁶ Aõu tahe hābuõ Jesuisi-ò nade: —Erydỹỹdu, aõhebo arotỹỹnykre. Aõma, timykibo umytuedeõna aritakemy wahe. Aõwidỹỹ wiwihikỹbo ariwinykemy. ¹⁷ Jesuisi rarybere: —Aõherekibo wadee aõwihikỹmy widỹỹ tỹỹraxiteri? Iny sohojile awi rare, Deuxule wahe. Kai bede ywina ibutumy bityhynyke, umytuedeõna hakỹ-ò molokre. ¹⁸ Aõbedeywinabo arityhynykre? Tahe Jesuisi rirawyònyre:

—Rubudỹỹõmy, Òta òta widỹỹõmy, wasiõmy, ruiõmy,

¹⁹ Adi boo-wana bityhynyke, iwese ixiluure wese heka abireludu mahādu luuke.

²⁰ Hābu rarybere: —Kia heka aõu aõu jiarỹ retyhynyre. Aõijõmybo arotỹỹnykre? ²¹ Jesuisi rirawyònyre: —Kai òbitimy mabekekile aõmydỹỹna-di ibutumy. Kia idi bohonyke òwy tahe biwahynyke urimynodu mahādu-ò. Tai sōwemy aõna aõna biu-ki ahõrõmykre. Iribi tahe biwaheludunyke. ²² Iu hābu kia roholareu tahe rabadewonihikỹre inieru sōwereki heka rabadewore.

²³ Tai tahe Jesuisi taerydỹỹna mahādu ribedeerynyre: —Isiratyhyre heka biu bede-ò ralòke aõma ityhy nihikỹkeki. ²⁴ Isirare heka aõma kamelo tyy rurena òtumy ralòke heka isirare, inatyhy? Tai tahe aõma ityhy mahādu ralòke tarasanamy reake heka isirare. ²⁵ Jesuisi erydỹỹna mahādu ribedeòtiinyre kai-ò roholareu. Tai tahe rōhõtinyre: —Aõkõre isiratyhyre tuu ròte. Inyõ

tarasanamy reaõtyhy. ²⁶ Jesuisi tamyreny retehere tahe rarybere: —Inatyhy rare hãbu-ò isirare. Deuxu dee tahe isiraõle rare. ²⁷ Tai tahe Pedro rarybere: —Jiarýboho ibutumy aõmydýñnareny adiridenyde. Araheludunymy watxiwãhãre. Aõma ritarenykre? ²⁸ Jesuisi tahe dirawyõnyde: —Kiamy heka adee ararybekre. Jiarý Deuxu Riòre Hãbu tyhyhyký wahe. Kaiboho heka tule borukubenyke aiòlònaryna-ki iu ibutumy ratýmyrakreu. Kaiboho iny sohoji sohojimy judeu ijoio biywisidýñnanybenykre, waijoi waòinatxi reurò mahãduõ wahe. ²⁹ Inyõ kia ibutumy aõbo waòraru-ki ririmyhýre iwese taheto ririmyhýre waòraru-ki, taseriòre, tadi, tyby, uladu, taoworu, ririmyhýre. Kia sohoji sohoji-ribi heka aõ sohoji sohoji òwymy 100 ritakre. Tule umytuedeõna ijõmy ritakre. ³⁰ Inyõ nihikýmy ityhymy ratxirerimy ihýre, tii iyjalemy relekre, aõma aõkõ tai relekre. Tule iyja nihikýmy relekre. Sõwemy urimynodu kaki rýirerimy ihýre tahe biu-ki inihikýmy rarekre.

20

¹ Jesuisi tasý riteòsinyreri ijyyõ timyrebo Deuxu Iòlõna. Hãbu aõmysýdýñdu heka oworu widýmy heka riteranymy tamy rarybemyhýre: ² —Aõmamy araòwynykre, sohoji prata womati nieru, iwese ibutumy raòwynymyhýre wese, sohoji txuòwy wahe. Tai tahe tii raaõmysýdýñre uva oworu-di raaõmysýdýñmyhý. ³⁻⁴ Idi tahe tii reare 9 horau tule, txutyau tule, titxibo iaõmysýdýñna rýireri titxibo hãbu teaõmysýdýñmyhýò. Tahe tuu robire urile ratximyhýmyhe idi retehemyhý. Tai tahe tamy rarybere: —Maaõmysýdýñke

hewa, waoworu-ki. Ikonana txu heka òbitihyky araòwynykemy adi watxireri. ⁵ Tiiboho raaòmysÿdÿÿre tule. Txutye tasÿ ixiyrubule ijò riteranyre aõma iwese kia juhuu ijò-ò rarybera wesele. ⁶ Txuinyòbira-ò ijò rimyre, tule ijò txiorotxure. ⁷ Iruyre hora-ò ijò tasÿ riteònyre. ⁸ Tahe txiorotxumy ròhònyra tahe kia iòwydÿÿdu tamy ryryre. ⁹ Tahe 1 womati nieru tamy riwahinyre, sohoji hora raaòmysÿdÿÿre mahādu wahe. ¹⁰ Tahe txusohojimy raaòmysÿdÿÿre tahe iratyre ròtakremy ixi-di ròhòtinyre. Tahe tule riòwynyra iwese ijò riòwynyra weselemy, 1 womati nieru, sohoji sohoji wahe. ¹¹ Tai tahe rimyre nieru urile tamy rexibinanymy rarybere: ¹² —Kowa heka sohoji horale raaòmysÿdÿÿhārele heka 1 teòwynyta. Jiarÿ boho tahe txuhyy raaòmysÿdÿÿra, bedede tòtee-ki wahe. ¹³ Tahe iweddu rarybere: —Wabiòwa, adeereny rarybera. Wiji 1 womati nieru ariwahinykremy heka inatyhy? Tuheka adeereny rewahinyre. Aribi rawasinyora. ¹⁴ Boibenykre heka ibutumy araòwynyneri. Wiwesetyhylemy heka araòwynyrenyneri, iwese rarybere wese. ¹⁵ Hora sohojilemy raaòmysÿdÿÿraò sohojimy wanieru ariòwynykre inatyhy. Tamy wanieru ariwahinykemy ixideewimy, aõhe inatyhy? Aõherekibo tebureteri? Jiarÿ urihimyo raaòmysÿdÿÿraò wawiremy tarybetenyteri wahe. ¹⁶ Jesuisi tahe rexihure kia rybe-di, kiamykre bedede: —Ikoludu heka ihewoludu-ò resekre. Ihewoludu tasÿ iko-ò resekre.

¹⁷ Tai tahe Jesuisi ròwònyre Jerusalē hāwā-ò. Iny-ribi tawaò inatxi reurò mahādu rihitxinyre.

Tamy relyyre timybo aõhebo rotỹnykremy Jerusalẽ hãwã-ki: ¹⁸ —Jiarỹ, Hãbutyhyhykỹ adee ararybekre: —Inyõ riwawahinykre aõma-ò Xiwena wahidỹdu wedu mahãdu-ò. Tule diwatyhenykre judeu wedu mahãdu-ò. Tahe riwarubunykemy heka tiiboho wamy rarybekre ijõ iny-ò. ¹⁹ Tii heka riwamykre tahe riwawahinykre Roma iòlò-ò, judeukõdu mahãdu iòlò wahe. Ibinatyhymy aõhebo riwasỹnyny riwahetenyre. Itxeò nihikỹ-ò riwatamadỹnykre. Tahe txu inataõ-di rubu-ribi areixixanykre.

²⁰ Zebedeu riòrese Jesuisi-ò nade. Tatiowotimy resere tahe rexitòenyre aõmybo Jesuisi-ò tariòre-wana nade. ²¹ Jesuisi tamy rarybere: —Aõbo rare hãwyy rarybere: —Waritxòre inatxi hãbu rare. Tikiboho kỹnyhe, aikòlònykuna rynana-ki ronykre awana. Ijõ aruruna-txi, ijõ ahywe-txi wahe, kai aikòlòkuna-kò malokreku wahe. ²² Jesuisi heka iriòre-ò rarybere: —Kaiboho aõmybo texitòenyteri teerykõleteri. Kai Txiau, kai Joaõ, teerytenyte aõbo aõhebo wadi rotỹnykre arurukre dori jiarỹ kaiboho tulekre? Tiiboho dirawyònyde: —Tulekre. ²³ Tahe Jesuisi rarybere: —Inatyhy rare kaiboho tule aõhõkỹmy botỹnybenykre. Tahe mobo warora-txi ada waruruna weribi rynana-txi ronykre. Jiarỹ reerykõre. Wahale heka rieryre. Tiile tamy riywinyre. ²⁴ Idi tahe debòwiò ierydỹna mahãdu kia rieryre aõmybo Txiaku Joaõboho rexitòenyrenyrá. Tai tahe tiiboho rakyarananyrenyre. ²⁵ Tahe Jesuisi ibutumy taerydỹna mahãdu tamy kanakemy rarybere:

—Iny iòlò iruru dire. Ibutumy dinodu tahe kia weselere —taijoi mahādu riteònymyhÿre. Teòdu mahādu riteònymyhÿre. ²⁶ Tahe aō tuukre aōkō heka rare ayreny-ki. Inyō dinodumy ixidikre heka deòdumy rarekre. ²⁷ Kia iny nihikÿmy xixi-di rexinohōtinyreri tasÿ aō aōkō tii rarekre. ²⁸ Iwese jiarÿ riwinyre wesemy heka rarekre. Hābutyhyhykÿ aō dinodumy aōkō anade. Iwese deòdu rÿira wesemy heka nade waumy riwahinykremy rubu-ò kabede-ki. Tai sōwemy iny ritakre.

²⁹ Iu Ijeriò hāwā-ribi ròirenyreu, tahe sōwemy iny riheludunyre. ³⁰ Inatxi iruetāmy heka ronymyhÿ iu Jesuisi ibire-di rareu. Tiiboho roholarenyre kia Jesuisi raremy. Rexidelenyre ryryre Jesuisi-ò: —Davi riokore, wadee hewa ruxetòena biwahinyke. ³¹ Tai tahe iòhòmy iny iribi rÿimyhÿ rarybere: —Txioke inihe, biyryke! Ixityre ryryre tarurutyhy: —Inynyrÿ Davi riokore, Biwawotòenyke hewa. ³² Jesuisi tamy rarybere: —Aōwexe adeereny ariwinykre. ³³ —Wanyrÿ, Kai wa bidiwaruenykre warue biraynykremy. ³⁴ Tahe Jesuisi riwotòenyre iruebmy reare tebò-di. Aōwesele tahe ruòmy reare. Tai tahe Jesuisihe riheludunyre.

21

¹ Jesuisiboho tahe rehemynyrenyre Jerusalē hāwā iòhòmy. Betabaji hāwā-ò heka rehemynyre. Kia Oliveira hāwālò-ribi irehemy aōkō ihÿre. Tahe Jesuisi inatxi iny riteònyre hāwā-ò, taerydÿÿna mahādu wahe. Tamy rarybere: ² —Juhu hāwā dele-ò malokreule aōma bobikre, jumenta tariòre-wana. Tahe bitaanalawekre ta bididykre

kaò. ³ Inyõ aratỹỹraxinykre wana, tai tahe kiamy bisỹnykre aõma: —Wawedu hewa idi ratxikemy rõhõtinyreri. Tai ki tahe ahemy kiditeònykre. ⁴ Kia ihetxiu ritidỹỹna tuheka relemý roimyhỹre. Kamy rarybere: ⁵ —Marybeke heka Jerusalẽ hãwã-ò:

—Deuxu Iòlòna heka kanakre adeereny wahe. Tii inihikỹ wesemy aõkõ kedehemynymy, jumenta tyre-ki heka kedehemynykre.

⁶ Tahe ierydỹỹna mahãdu riwinyre iwese Jesuisi rarybere weselemy. ⁷ Didyde tahe jumenta tariòre-wana. Ihetyreny jumenta tyre ritidire. Jesuisi ityre ronyre tahe idi rare. ⁸ Tahe inyõ sõwemy-ribi tahetyreny-di rehumyhỹre iryko-txi idi rariakemy ityre-di. Ijõ tasỹ hereru-di iryko-txi rehure iryube hetymy ityre-di rariakemy. ⁹ Sõwemy tai iny rirajuamy rỹimyhỹ iko-ò, ihewo-ò:

—Iòlò Davi riokore heka sõwemy iny wowydyna tamy iny riwahinyreri. Tii Deuxu Riòre Hãbu rare. Deuxu deysana heka tamy biwahinyke!

¹⁰ Jesuisi hãwãy-ki rehemynyreu, ibutumy iny ribedeòtiidỹỹnyre: —Mohãbuwe kia ralòreri Jerusalẽ hãwã-ki wahe? ¹¹ Tai tahe iny mahãdu rarybere: —Aõkõre, kia Deuxu rybeduõ rare. Jesuisi inire Kalileia bede-ribi Nazare hãwã-ribi dehemynyde.

¹² Tahe ralore Deuxu dohodỹỹna heto-ò. Tai kia aõna aõna-di rohonyreri heka riteònyre. Kia aõma nieru wiuròna iòwòruwebese tahe riatyre. Kia aõma bòtòe dohodỹỹdu ryna ibutumy ritxiwire riatyre. ¹³ Tahe Jesuisi rarybere: —Deuxu Tyyrity rarybere:

—Dohodỹña heto heka waha heto rare,
ixitòedỹña heto rare.

—Kaiboho heka inywasidu mahādu-di
tetỹxinytenyta. ¹⁴ Sōwemy iny itiere, iruetà,
nade Jesuisi-ò dohodỹña heto-ò. Jesuisi taile
riteytenyre. ¹⁵ Tahe xiwena wahidỹdu wedu
tuu robire. Tule judeu bedede ywina bedede erna
mahādu robireu tahe, aōma uladu templo-ki
ryrymy rỹimyhỹ aōma: —Davi riokore heka
Deuxudeewina rare. Tai tahe kia rybe-ò
reburerenyre. ¹⁶ Tiiboho tahe raryberenyre
Jesuisi-ò: —Kai aōbo taholate aōbo rarybereri.
Jesuisi rirawyōnyre: —Kohe, raholare. Kaiboho
teeryōtenyte:

—Uladu dori wowydyndy tamy riwahinykre. Tiu
aōbo tariatenyōhyymahāte kia Tyyriti-ki.

¹⁷ Tahe Jesuisi iribi rōhōnyre Betỹnia hāwā-ò. Taile
tahe ruu idi rỹire.

¹⁸ Biurasò txumy tahe tii dòòsede Jerusalē-ò.
Tahe rama risare iu. ¹⁹ Òwòruō tai rỹire. Tai
tahe diaride figoraty-ò. Tahe iratyōre, txirule
rỹire. Tai Jesuisi rarybere òwòru-ò: —Tiu
heka kai maratynyōtyhy aōwesele tahe irade
rairuxỹrure. ²⁰ Tai tahe ierydỹña mahādu heka
ribedeòtiidỹnyre: —Timykibo heka aōwesele
rairumyrōmy reareri. ²¹ Tahe Jesuisi tamy
rarybere: —Kai ainatyhyna ijōdikeki heka iwesele
biwinyke. Iratyre biwinyke. Kaiboho heka
bitxiōnyōkeki kaa hāwālò-ò dori marybekre
kiamy: —Iribi bexitake tahe aho-ò boikre.
Tai hāwālò-ò aōwesele heka ahoro-ò roikre.
²² Aōtxile kai bexitōenykre heka adee ijō rỹikre.

Bityhynytyhykeki, tahe ibutumy bitake.

²³ Tai Jesuisi dehemynyde Deuxu dohodỹna heto-ò. Tai tahe ròbedeerydỹmy ratximyhỹ. Tahe xiwena wahidỹdu mahādu, tule judeu bedewina erydỹna mahādu tule tamy dỹraxyimynade. Tai tahe Jesuisi-ò rỹraxyire: —Morurudiboheka kai aōmydỹnana tewinymahāte? Moboheka arateranyre kia biwinykemy. ²⁴ Tai tahe Jesuisi tamy rarybere: —Kai aōbo myraxyikeki wadee tai ako tuu arelyykre. Kai dỹraxyinaōmy bidiwatỹnynykeki tahe, adee tuu arelyykre.

²⁵ —Joaō Sebedỹdu heka morurudibonade morybekibo tuu tadiwinymahāte wesemy. Morybekibo Joaō iny risebenymyhỹre. Deuxu Rybe-ki aōbo ada iny rybe-ki aōbo. Tai tahe widee rarybe raryberenyre: —Aōma Deuxu Rybe-ki tuu ròsebedỹmyhỹre. Mykeki rakarybenykre taheka: —Aōherekibo tetyhynytenyōte myle tii risỹnykre.

²⁶ Aōmamy rikisỹnyrenykeki: —Iny rybekile tii tahe nade. Myỹ rikisỹnyrenykeki tasỹ kia ijoi inydeereny rakyarananyke. Joaō Sebedỹdu dori ibutumy iny rityhynyrenyre moma tii Deuxu deòduō ratximyhỹre heka. Rakarybenyōkre tahe.

²⁷ Tai tahe Jesuisi-ò raryberenyre: —Aōkōre, reeryrenyōre heka irawyòdỹ titxiribibo irurunade. Tahe Jesuisi rirawyònyre: —Tule jiarỹỹraxyina adeereny aritỹnyrenyōtyhy. ²⁸ Ijō Jesuisi relyyre: —Timybo maraykynybenykre ka iyyymy arelyykre. Hābuō heka inatximy iriōre raremyhỹ. Tariōre dela-ò rarybere: —

Dàà, maaōmysỹdỹkre waoworu-ki, wiji wahe.

²⁹ Tahe tamy dirawyònyde: —Waha, araōkre

hewa. Ihārele tahe tawo rirahòrere rakremy. Tahe rare. ³⁰ Idi tahe tyby rarybere helỹỹna-ò: —Kai tule makre waaõmysỹdỹỹna biwinykremy: —Dei wahe, arakre araaõmysỹdỹỹkre. Ihārele tahe tii raòhyyre. ³¹ Adeereny inihe araỹraxikre. —Tibohe weryrybò aõma tybyrybe rityhynyre? Tai tahe dirawyònyde: —Juduludule irybe rityhynyre. Tai tahe Jesuisi tamy rarybere: —Iny òrarudu tyhy heka wydena-wana ralòkre biu bede ròtena-ò. Ihārele tahe kaiboho birònybenyòtyhy. ³² Joaõ Sebedỹỹdu dori adeereny rarybere. Ihārele tahe kaiboho ixitxireny aòrarureny-txi òhòtirenny reakemy Deuxu bityhynykemy. Kaiboho heka teramy tekoamahāte tahe sòwemy òrarudu mahādu wydena mahādu rityhynyrennyre. Kaiboho tuu tabitenyete ihārele teerytenyčkòte.

³³ Ijõ ijyymy arelyykre:

—Hābuõ heka uva oworuhukỹle ritòbrònyre. Tahe òtityna riwinyre. Tai tahe utà riwinyre yrubudỹỹdu mahādu itxerenamy.

Tai tahe rihuòtere oworu wahe hābu mahāduõ-ò. Tii tahe rabetỹĩnyny rare taheto-ribi. ³⁴ Iu uva bederaty kia siredenamy bede reareu, riherehe txuramy ixidee ritxuakemy wahe.

³⁵ Tai tahe huòtedu mahādumy heka teòdu mahādulemy raòhòtere. Ijõ tahe rirubunyre ijõ manadile tamy rehunanymy rỹĩmyhỹ. ³⁶ Iribi tasỹ teòdu mahāduõ didyde sòwetyhymy juhuna ludu ratyre. Tahe ixybyle tuu raòhòtere juhūu iwese tuu rotỹỹnyra wesele. ³⁷ Tahe iwedutyhy ròhòtynyre: —Aõma wariòrele kòri ariteònykre. Tai tahe wariòre rityhynykre heka. Tahe tariòre diteònyde. ³⁸ Tahe huòtedu mahādu weryrybòmny

robireu, tahe wideereny rarybere: —Kaa heka iwedu riòrele rare. Aõma iwedu rurukreu iaõna aõna, ioworu heka ixideereny rikimyrenykre.

³⁹ Tahe rirubunyreny re iumy-di rehurenire oworuro-ribi. ⁴⁰ Tahe Jesuisi rarybere: —

Adeereny araỹraxikre aõbo iwedu tamyreny riwinykre huòtedu mahãdu-ò iu tii rehemynykreu wahe. Timybohe tii riwinykre? ⁴¹ Tiiboho dirawyònydenyde: —Kia rirubunykre ibutumy hãbu bina. Inywitzira-ò huòtenamy ele elemy wijuramy riatykre-ò riwahinykre. ⁴² Tahe Jesuisi tamy rỹỹraxire: —Kaiboho aõbo Ryberiti-di tariaõletenyteri:

—Mana-di heka heto widỹỹdu rehumyhyre kia manale heto hàtxi-ki ritidimy roimyyhyre. Jiarỹ kia mana wese rare. Inynyry Deuxu kia riwahinyre. Tai awi heka rare. Ijõ riwiòhenanyre, mana wahe.

⁴³ Tahe Jesuisi tamyreny rarybere: —Tule jiarỹ adeereny ararybekre: —Deuxu lòlòna heka aribi ritakre. Tahe inywitzira-ò aribi riwahinykre. Inyõ txura wylemy riwahinykremy Deuxu-ò.

⁴⁴ Kia iny mana tyre resemyyhykre heka tii heka wiòròmy ixòdumy rare. Mana inytyre resekeki tasỹ iny risurusurunyke. ⁴⁵ Inyõ roholakeki kia aõbo aõma xiwena wahidỹỹdu mahãdu roholamy rỹimyyhy tule fariseu mahãdu. Tule rexierymyyhyreny re tiiboho Jesuisi turenyle rarybereri heka rierymyyhyreny re. ⁴⁶ Tai heka tii mahãdu rymykemy idi riwisỹnymyyhy tahe iny sòwehekỹ lau ruberumyyhyreny re. Iny mahãdu dori idi rōhõtiny tii Deuxu rybeduõ ratximyyhyremy.

22

¹ Jesuisi heka rexidelenyre ijyymy relyykremy:
² —Timybo Deuxu Iòlòna rare ijyymy heka relyykre. —Iòlòõ heka tariòre herinamy worana bedehesi riywinyre. ³ Iaõmydỹỹnana ròrarukõmy rỹidi tahe teòdu mahãdu iòrysmy roire. Rexihumy rỹireriki iaõmydỹỹnana, kanakremy wahe. Tahe òrysna noderamy reare. ⁴ Ijõ riteònyre teòduõ iny ritobinykremy. Aõhere tahaka, wabroreni kỹnyhe rerubunyre heka. Ibutumy heka waaõmydỹỹna rehumy rỹireri. Tahe kedeake kedeake heka kòdòidenyke heka. ⁵ Tahe timy heka irybe rityhynyrenyõhyre. Iny sohoji sohoji tatyyresi-di ijohona-ò, ijõ taaõmysỹdỹỹna-ò rea reare, ijõ taoworu-ò reare. ⁶ Ijõ lobidỹỹna reburere teòdu mahãdu dee. Tii teòdu dee heka rawobinare. Ijõ aõbina bina heka ritxienyre ijõ rirubunyre dori. ⁷ Tai tahe iòlò reburere lobidỹdỹna mahãdumy bina bina raòhòtedỹỹnyre, rirubunyre. Ihãwã ritoonyre. ⁸ Tai iòlò rarybere teòduboho-ò: —Waworana bedehesi rexihumy rỹireri ibutumy. Kia iny mahãdu ijoj juhuu retobinyra heka aõ ibina heka roire. Urile riòmysanymhỹrenye. ⁹ Tai tahe ibutumy boibenykre hãwã-ò ibutumy iny-txi bekoabenybekre heka bitobinybenybekre ibutumy waworana bedehesina-ò kedeake kedeakremy. ¹⁰ Tai tahe didyde iny wiwihikỹ, iny ityhy iny bina mahãdu. Hetowo tahe ritỹxire tỹmyra mahãdu-di. ¹¹ Tahe iòlò ralore hetowo-ò kia iny mahãdu dee rybemy. Tahe tii robire hãbuõmy kia worana bedehesi kia tykyõmy ratxirerimy. ¹² Tai tahe tamy iòlò rarybere: —

Waliiny, aõherekiwe worana bedehesi kia tyky-di aõkõ atxiteri? Kia tahe hãbu rybeõmy riijere. ¹³ Tai tahe iòlò aõma rarybere teòdu mahãdu-ò: —Bimybenyke kaa hãbu. Waa bitaataabenyke imy behubenyke tahe idi diòlòdỹmy idi rehukre luruhukỹ-ò. Tai Aõhõkỹmy dỹnana-ki tai txuraruti rikyikyiny. Tai rahinykre. ¹⁴ Tai tahe Jesuisi rarybere: —Sõwemy iny heka kidirahukre tahe ibutemy kanaarikre.

¹⁵ Tai tahe fariseu mahãdu ròhònyre wii rotyre. Aõbinamy Jesuisi rarybekeule heka rimykemy idi rỹimyhỹ. ¹⁶ Kia aõma fariseu ijoioõ heka riteònyre Jesuisi-ò. Tule Herodi ijoi mahãdu riteònyre. Rỹraxire Jesuisi-ò: —Erydỹdu, kai heka hãbuwi tate, hãbu òbiti. Kai heka tòbedeerydỹmahâte Deuxu deewinamy. Awire aõbo ariòwynyrenykre Roma hãwã mahãdu dinodu-ò. ¹⁷ Kai heka ixinamy aõma adee iny rarybererimy ihỹre. Timybo iny raraykynyrimy ihỹre. Iny bede ywinareny aõbohe ixinamy nieru aõna aõna òwydỹnamy ròhònyke aõbohe awire? ¹⁸ Tai Jesuisi heka rierymyhỹ aõma awimy aõkõ tai rahareri heka rexierymyhỹre: —Kaiboho òbitimy aõkõ toite. Aõherekibo heka kai biwaitxenanybenykemy wamynomy wadi atxitenyteri? ¹⁹ Timybohe nieru-ki rakaharenkyre aõna aõna òwydỹnamy. Biditeòsinyke kia-ò arierykre. Tai tahe tamy riteòsinyre womati nieruõ. ²⁰ Tahe Jesuisi ritỹraxyre: —Motyytybybo koa rỹire. Monibo ityre-ki koa roire? ²¹ Tai tahe rirawyònyre: —Roma hãwã iòlònile tai roire. Tai tahe Jesuisi rarybere: —Tibo Roma hãwã iòlò nierubo heka tamy biwahinykre. Tibo Deuxu nierule tasỹ tamy

biwahinykre. ²² Tai tahe urile ribedeòtiidỹnyre. Tai ririrenyre ròirenyre.

²³ Tahe kia txule saduseu mahãduõ heka dòidenyde Jesuisi-ò. Rityhynyõhyymyhỹre kia aõma rubu-bibi ixixana heka rityhynyõhyymyhỹre, saduseu mahãdu wahe. ²⁴ Tamy rarybere: —Erydỹdu, Moisesi tyyriti heka kawesemy ribedeerynyre:

—Aõma hãbumy hãwyy heridumy roiukeki aõbohe timykibo hãwyy uladu-di ratxikeki. Hãbuõ iriòrekõ-di rurukeki tai tahe iseriòre heka iriòrese tyby-wana roiuke. Tai heka kia hãbu rubuweleu, kia deròwmy heka uladu rity-bienyke.

²⁵ Aõu heka debò inatxi seriòremy kaki rasỹnmy raremyhỹ. Telareny heka roire hãwyy tahe iriòrekõlemy rurure. Tahe ihãwyytybyhe kia iseriòrewanale roire. ²⁶ Ihelỹna sỹ tule rurure. Kia heka ibutumy debò inatxi reurò tii-wana roihyre iriòrekõule. ²⁷ Tahe hãwyy heka tule rurure. ²⁸ Tai tahe kia ruru-ribi rexixakreu tahe, tiwexe ihãbukre? Ibutumy dorihe tii-wana heka roilehekỹlera. ²⁹ Tai tahe Jesuisi rirawyònyre: —Kaiboho teerytenykõlemahãtenyte timybo Tyyriti-ki roimyhỹre. Deuxu ruru tule teeryòte.

³⁰ Tiu iny rubu-ribi rexixakreu iwitxiramy rexixakre. Ýju wesemy ronykre. Timy heka hãbumy hãwyy roiòtyhy. ³¹ Kaiboho heka tetyhynytenyõhyymahãtenyte rubu-ribi ixixana. Idi heka tariatenyõhyymahãtenyte timybo Deuxu rarybere? ³² Kiamy heka rarybere: —Jiarỹ heka Abraõ Deuxu rare. Ijai Deuxu rare. Ijaò Deuxu jiarỹ rare. Tii heka iru mahãdu Deuxu

heka tii ihÿre rubu mahãdu Deuxu aõkõ wahe.
³³ Iu iny sõwe ribedeerynyreu, tahe urile iny ribedeòtiidÿÿnyre.

³⁴ Fariseu mahãdu doidenyde Jesuisi-ò wii rotyrenyde. Roholareki wahe aõma saduceu mahãdu ribedeòtiidÿÿnyrenydeki. ³⁵ Bede ywina erydÿÿna mahãduõ rÿÿraxire heka aõmybo Jesuisi-ò. Tii rimykeny heka idi riwisÿnymy kia rybebinaõmy rirawyònykeki rimykeny.
³⁶ Tahe rÿÿraxire: —Erydÿÿdu, tibohe aõbo bedede ywina kia-ribi aõnityhymyhewe bededeòtiidÿÿnamy ratximyhÿre. Wakoreny inihe tuu bedelyykre. Tibo kidiòtiidÿÿnamy ihÿre. ³⁷ Tahe Jesuisi dirawyònyde: —Iny Deuxureny iny iòlòreny luuke heka. Ibutumy awo-ribi heka iluuke, ibutumy aruruna-ribi, ibutumy arayky-ribi luuke heka. ³⁸ Tii heka inatyhy bededeòtiidÿÿna tyhymy ratximyhÿre ibutu bedede ywina-ribi. ³⁹ Ijõ ihelÿÿna tahe iwesele heka rare: Iwese ixiluure wese heka ibutu luuke. ⁴⁰ Ibutumy Moisesi bedede ywina heka juhoo rare. Tule Deuxu rybedu mahãdu erydÿÿna heka iribile rare. Kia bedede ywina inatxi-ribi heka ibutumy iny bedede eryna ròhònyre. Kia inatxi bityhynymy bohonykeki iuhe heka tetyhynmahâte.

⁴¹ Iu fariseu mahãdu iweroramy rÿimyhÿò tahe rÿÿraxire Jesuisi tamy: ⁴² —Mobo Deuxu deòdÿÿnamy ihÿre, Kristu wahe? Moriòrebo tii ihÿre. Tai tahe tiiboho rirawyònyrenyde: —Moma Davi riokore òsana. Tahe ijõ Jesuisi rÿÿraxire:
⁴³ —Tai tahe aõherekibo Davi heka Wanyrÿmy rininire Deuxu Tyytybytyhy irybe riwiòhenanyreu

wahe. Davi dori kawesemy rarybere: ⁴⁴ Deuxu wawedu-ò rarybere.

—Bodonyke warurunawe-ribi, jiarỹ heka aòludu mahãdu-di arawo-txi.

⁴⁵ Davi tawedumy Kristu rininirehãre, timykibo Kristu iriokore riokorekre. ⁴⁶ Tahe inyõ heka Jesuisi rirawyònyõhyyre. Tai tahe ruberumyhỹre tamy rỹraxike lau.

23

¹ Jesuisi heka iny sõwe nihikỹ ribedeerynymyhỹ taerydỹỹna mahãdu-wana. Tii rarybere: ² — Judeu bedeerydỹỹdu mahãdu heka Moisesi bedeywina bede erydỹỹna mahãduõ rare. fariseu mahãdu tule bede ywina riwinymyhỹrenyre. ³ Iwese ribedeerynyre wese tahe bityhynykre. Uritere iwese tii riwinymyhỹre wese uritere iwidỹỹõmy. Aõwidỹỹmy rarybemyhỹrenyrehehãre tahe aõwitxira heka riwinymyhỹrenyre. ⁴ Tiiboho heka atyrereny riòðònyihikỹmyhỹre bede ywina. Ihãre tahe rityhynyrenyõhyymahãrenyre. ⁵ Aõma òbitimy ratxike sỹny heka iny tamy roholamyhỹre ixi-di ratxirerimy ihỹre. Aõma walabu riòreõ heka rỹimyhỹre axiò-ki bede ywina heka ritidimy roimyhỹre ityky ijeti retydyna bede ywina-txi tõihti reakemy tuu riwinyrenyre. Sõwemy heka iretydyna riwinyrenyre. ⁶ Ronymyhỹreu heka ikoòhòkỹle ronymyhỹre, worana bedehesina rỹi-wana wahe. Dohodỹỹna heto-ki heka tule ronymyhỹre, iko-ò tuu rexisỹnymyhỹ. ⁷ Hãwãy-ki iny tamy ryrymyhỹre: —Waerydỹỹdu, Habimy, kia tahe irybe-ki bede erydỹỹdu rare. Tii tahe tamyreny awire. ⁸ Tai tahe Jesuisi tamyreny

rarybere: —Kaiboho heka uritere Habimy inyõ adeereny iry kõmy ihỹke. Deuxu sohojile bede erydỹỹdu heka rare. Ibutumy kaiboho seriõre wesemy atximahãtenyete. ⁹ Kasu-ki taheka inyõ heka tiu wahamy inyõ widee rarybeõtyhy Deuxu biu-ki ratximyhỹrele tuu bininibenyke heka. ¹⁰ Uritere Wawedu myỹ inyõ kia nidỹỹõmy. Deuxu deõdỹỹnale heka awedu ratximyhỹre Mesia wahe. ¹¹ Anihikỹmy ixi-di mohõtinykeki tahe, kia iny biwiõhenanyke. ¹² Kia ityhy rare ixi-di rõhõtinymyhỹre, tii heka ihewo-ribi rabadewokre. Ihewo-ribi tahe aõma aõkõ relekre. Kia iaõkõmy ixi-di rõhõtinykre tahe nihikỹmy heka relekre. ¹³ Belàhàxe! Kaiboho itxenadỹỹluku. Ibina adeereny kanakre, kai bede erydỹỹna mahãdu, fariseu mahãdu. Kaiboho uritere iny ròtedỹỹrenyõmy Deuxu Iòlõna-ò. Kaiboho birõnybenyõtyhy tule iny ròtedỹỹ-ò biebenyke. Kaiboho bexisỹnybenyke òbitinamy. ¹⁴ Aixitòedỹỹna rehereheki wahe hãwã ube-ki. Kaiboho urile iny teitxenanyamahãtenyete. Aõma wytese urimynodu heka iheto-ribi teteònymahãtenyete kaiboho heka abinarenre. Tai heka kaiboho yla aõkõ aõhõkỹmy botỹỹnybenykre. ¹⁵ Belàhàxe! Kaiboho ibutumy iny aratyhynyrenykemy ixi-di tahõtinymahãtenyete. Tai heka iny tesỹnymahãtenyete òrarudutyhymy wahe ixiratyre heka teijiradỹỹnymahãtenyete. Aòraru-ki heka aõhõkỹmy botỹỹnybenykre. Iny-di atxikemy heka tahõtinymahãte. ¹⁶ Kaiboho ruetà mahãdu wesemy kai ahãte. Kaiboho heka kia wesemy tebedeerynytenyete. Inyõ heka Deuxu bede eryna heto riwawiõhenanykeki heka aõna aõna ariwinykre. Myỹ marybebenykeki, heka

aõ aõkõ heka rare. Deuxu dohodỹỹna heto womati tỹrỹrỹhỹkỹ-di marybekeki heka, tii heka rityhynyhy. Ibutumy heka kia bede ywina òta òta tewinymahãtenyte. ¹⁷ Kaiboho heka bede erydỹỹdu bede erytyhykõ mahãdu atxitenyteri dohodỹỹna heto kia-ò ralòkeki. Aõbo bedeòtiidỹỹna tyhyre womati tỹrỹrỹhỹkỹ aõbo ada dohodỹỹna hetole aõbo teeryõte, Deuxu Dohodỹỹna heto wahe. ¹⁸ Kaiboho tule tebedeerynyte kawesemy. Inyõ tarybe inatyhy-di rarybekeki, tai heka kia xiwena wahidỹỹna-di rarybekeki, tai tahe tii rityhynyõkeki, awira. Tahe tii xiwena wahidỹỹna tyre-ki rarybekeki tahe, tii òbitimy heka rarybeke. ¹⁹ Kaiboho ruetà mahãdu wese, kaiboho heka erydỹỹnakõdu mahãdumy toite. Aõbo awityhyre? Xiwena wahidỹỹna aõbo ada ityre-ki wahidỹỹna roimyhỹre aõbo? ²⁰ Wahisidỹỹna heka wiwesele rare. Aõma xiwena tyre-ki roire wana tule wiwesele rare. Aõma xiwena tyre-ki roiõre wana wahe heka aõ aõkõ rare. Xiwena utàle heka rierymyhỹre inatyhy rare. Myheka kai mararybekeki heka tai tahe kai heka xiwena utàlemy tarybeteri. Ibutumy iny ityre-ki rỹire bohomy tule heka tai tuu tarybeteri. ²¹ Deuxu dohodỹỹna heto òraru-ki kai koityhyxemy marybekeki heka tai heka kai dohodỹỹna hetomy tarybeteri hãre tahe Deuxu iwo-ki ratxirerilemy tuu tarybeteri. ²² Biu òraru-ki ka koityhyxenyteri marybekeki, Deuxusỹmy tarybeteri. Tii dori tarynana-ki ronyreri. ²³ —Belàhàxe! fariseu mahãdu! Kaiboho heka itxenadỹỹdu mahãduõ toite. Tule bede ywina bede erydỹỹdu mahãdu. Adeereny heka ibinamy ratxikre. Arỹsỹna uri

juraõ heka kai Deuxu-ò tewahinyte, hortelã, erva-doce, cominho wahe. Kaiboho heka aõninihikỹ tetyhynytenyõhyymahãtenynte. Iwese òbitina, ruxetòena, inatyhyna kia-ribi heka òhõti losamyhỹre ibutumy. Aõmydỹỹna jura wahisidỹỹna heka awi rare. Tahe tule uritere òhõti losaõmyke aõwitzira-ribi wahe. Aõbo bededòtiidỹỹnare beded ywina-ki. Kaiboho heka beded erydỹỹdu toite hãre tahe teerytenyõte. ²⁴ Belàhàxe! Kai hãbuõ wese rare. Tiiboho imona berareny-ribi ohoruxõmo riarimahãre. Ihãrele tahe tiiboho iròdu nihikỹ rirỹsỹmyhỹre. Iwesele kaiboho tule terỹsỹmyhỹtenynte. ²⁵ —Belàhàxe fariseu mahãdu, beded ywina beded erydỹỹna mahãdu. Amona deoreny tesuhòmahãtenynte iwe. Iwo tahe ka isuhukỹlemy rỹimyhỹre. Itxenadỹỹna rỹire. Aõma aumy weselemy heka kia ratximyhỹre. Aõma aumy heka webòròsityy tyrare heka. Araykywo-ki tahe ibutu itxenadỹỹ heka tai rỹimyhỹre. ²⁶ Belàhàxe fariseu mahãdu! Kaiboho taruetà mahãdu. Kai mona hynawo bisuhòke heka biòtinyke. Aõma bisuhòke ihỹre tahe arayky bityranykre. Tahe ibutumy heka aumy ryranykre. ²⁷⁻²⁸ —Belàhàxe fariseu mahãdu! Kaiboho heka koityhyxenyteri. Rubu heto wiwihikỹ ixideereny tewinymahãtenynte. Kaiboho heka iwesetyhylemy toite. Aõma webòròsitylydu heka iruxeramy idi toite. Aõma aworeny-ki tahe aõma iny rubu idi ròhòkỹdileka atxitenyteri mahãtenynte. Ibutumy aõbina bina awo-ki arayky-ki idi atxiteri mahãtenynte. Aumyreny-ki heka tykywihikỹ texitykyny mahãtenynte. Aõma hãbu wihikỹwesemy. Hãbu òbitimy matxibenyke myheka iny adi

rõhõtirenykemy heka tuu texitykynymahãtenyte. Araykywo-ki tahe arimyrenywo-ki tahe ibutu itxenadỹĩna-di heka toite, òrarudu mahãdu toite. ²⁹ Belãhãxe! Tai heka kaiboho Deuxu rybedu mahãduõ rirubunyre. Kaa nohõtĩ ijaranamy tuu tewinymahãtenyte. Awabederenywo-ki heka noijasa ruxerahakỹle tetidite. ³⁰ Kaiboho heka tarybimahãtenyte. —Tiu wahareny riwinyre wese heka ariwinyrenyõtyhy. ³¹ Kiamy tarybeteu heka hãbu bina riòremy texininite. Bowesele toite. Iriòre toite. ³² Iwese juhũ ibinamy riwinyre wese heka iwesetyhyle aõhebo tatỹĩnymahãtenyte. ³³ Iwese hemylala deborehekỹ wesemy heka kaiboho atximahãtenyte. Boreny tule iweselere. Timybo heka kaiboho heòty bede-ribi mahenybenyke? Kaiboho heòty bede-ò boibenyke. ³⁴ Adeereny ariteònykre aõma Deuxu rybeduõ hãbu erydu, tyyriti erydu wahe. Kaiboho bidirubunybedenykre. Ohodỹĩna heto-ki ijõ bidihetenymahãtenyte awaru hetenaõ-di. Itxeòtyre-ki ijõ bidirubunybedenykre. Ijõ heka biheludumykre hãwã hãwã-ò tamy ibinamy riwinykremy. Aõhõkỹmy dỹĩnana heka tamy biwahinybenykre ijõ hãwã-ò rakreu. ³⁵⁻³⁶ Kia heka hãbu ibutumy rurure tyby òraru-ki wahe. Dohodỹĩna hetowokile rirubunyrenyre. Kaiboho Abeli juhũ terubunytenyte ikonana tahe Zacaria, Barakia riòre wahe. Òbitityhy juratya-ki heka tuu tewinytenyte. Wijinabòdu mahãdu tai aõhõkỹmy rotỹĩnykre. Ibutumy ibinamy kai atyre-ò kedeseke. ³⁷ Jesuisi ikonana tahe rarybere: —Jerusalẽ hãwã mahãdu, kaiboho heka

terubunyenye Deuxu rybemy rybedu mahādu. Jiar̄y heka aramykemy adi rewis̄nyreri wariōre wesemy tahe waderarenye kaiboho. Iwese hānieō iriōre ridyre wese idewo-ki. ³⁸ Aheto heka ixisohojilemy r̄yimyh̄yre. ³⁹ Kaheka ararybekre adeereny: —Wamy heka bobiōtyhy ixityre. Kai heka Deuxu deōd̄ȳna bidykreule wamy bobikre. Iu rarybereu, Deuxu deysanamy, wamy bobikre.

24

¹ Iu Jesuisi rōhōnyreu dohod̄ȳna-ribi, ieryd̄ȳna mahādu tamy rarybere dohod̄ȳna heto itxeremy rōikemy, eleri-ō wahe. Tai tahe Jesuisi dirawyōnyde: ² —Inatyhy rare, awi heka rare. Urile tahe kidiixāwidid̄ȳnykre heka. Timy heka manaō wityre-ki roiōhykre. Ibutumy bedē-ō idi rehukre. ³ Iribi tahe Jesuisi rehemynye Oliveira hāwālō-ō heka ronyre. Tai tahe eryd̄ȳna mahādu tii rit̄ȳraxinyre iny sōwe-ribi: —Tiubohe ibutumy kedeixixāwidid̄ȳnykre. Tiuboho ibutumy bedē konanad̄ȳnamy reakre. Timybohe rikieryrenykre kai bedehemynyke aōma bedē ibutumy rexihukre. ⁴ Tahe Jesuisi tamy rarybere: —Uritere inyō aitxenad̄ȳōmykre. ⁵ Sōwemyhe iny itxenad̄ȳnamy r̄yirakre. Jiar̄y Kristu rare, Deuxu deōd̄ȳna heka jiar̄y rare, myheka adee kanarybekre. ⁶ Kaiboho heka boholamy mabekre iny aōbina rōhōnymyhykre: boholamahākre. Ihāre tahe iny rarybekre aōma: —Karibi heka aōbina urihimyō rōhōnykre. Myhe rarybemahākre. Ihārele tahe kōdōōseōkre aōma ikonana urihimyō. Ibutumy heka kia wesemy relekre. ⁷ Aōma kia wesemy heka bedē roimyh̄y

rarekre aõbo iny witxira witxira heka ibutumy iòlòna heka riteranymyhỹkre. Aõbinamy. Tai heka raaõbinanymy rỹirakre. Aõma rama ijara reakre. Bede ibutumy ramytatakre hãwãõ-ki. ⁸ Kia heka iwese hãwyy uladu dese wesemy robumyhỹre wese tukre. ⁹ Adeereny heka aõhõkỹmydỹñnana tiiboho riwahinykre aõma wani òraru-ki wahe. Ijõ kaibohoõ heka ararubunyrenykre. ¹⁰ Sõwemy heka iny riatymyhỹkre wary-ribi heka riatymy ririmyhỹkre. Wii rityhenymyhỹkre. Widee rakyarananymyhỹkre. ¹¹ Rybebina rybeduõ heka sõwemy kedehemynykre tahe kia heka sõwemy iny riitxenanyrehỹkre. ¹² Iu heka òraru nihikỹ iu ròhònykremy roimyhỹre. Sõwemy heka luuna-di rỹiramyhỹ katahe wiji ixãwikre heka ihomy aõkõ relekre. ¹³ Kia idi hyy rỹirakre ikonana-ò. Tii mahãdu tahe tarasanamy reakremy rỹira. ¹⁴ Ibutumyhe kia iny-ò rybe tỹnydỹñnamy reakremy rỹira, Deuxu Rybewihikỹ Tỹmyra wahe. Ibutu iny witxira witxira heka roholakre rybe wihikỹ-ò. Kia rahudi hikỹle heka taheka kedehemynykre heka ikonana. ¹⁵ Aõbinahakỹ tyhybohe ibinatyhy rỹikre. Tii heka rỹikre heka aõma Deuxu ubetyre-ki, Deuxu isỹ-ki, kiaweselemy heka rỹikre. Bieryke aõbo kia rare. Bieryke aõbo kia rare Danieli heka Deuxu rybeduõ ihetxiu kiamy heka rarybere:

¹⁶ —Judeia mahãdu bederibi tahe kia bihenybenyke. Ibutumy heka bõibenykre hãwãlò bede-ò biòturònykre.

¹⁷ —Kia bededỹñnanau heka tiu aõ bimyoñtyhy ahetowo-ribi. Tiiemy heka ròhònyhykyle

rakre aõwesele wahe.

¹⁸ Iu bedero raaõmysỹdỹkreu heka tiu kòdòòseõtyhy tatyky itxemy. ¹⁹ Tule aõma hãwyy bõtòmy rỹira kia bedeu aõhõkỹmy rotỹỹnykremy rỹira. Kia tohouã-di ratxireri tahe tamy isirakre heka itybiedỹỹ idi rakeò heka isirakre. ²⁰ Bedejutytykõkemy heka bexitòenyke ahena mahenykeu. Tule sabado txu aõkõkemy bexitòenyke. ²¹ Tiu heka aõhõkỹmy dỹỹnanamy iny rotỹỹnyõhyymyhỹre kaa aõhõkỹmy dỹỹnana nihikỹmy. Tule tiu tuu robiõhyymyhỹre. ²² Kia Deuxu irokorehemykre wana heka ibutumy iny ituekre. Kaa urihimyòlekcre wana tahe kai Deuxu hõrõ mahãdule tuukre. ²³ —Aõma Mesia heka kowa-ò rehemynyra, Deuxu deòdỹỹna wahe. Ihãre tahe kai heka inyõ adee rarybekeki tahe tetyhynyõhyyte heka. ²⁴ Kia iu kedehemynykcre tahe aõ Kristu tyhy aõkõ heka rarekre. Aõma rybedu itxenadỹỹdu heka tule aõna aõna wiwihikỹ riwinykre. Aõma ityhydỹỹdu dori riitxenanykemy idi riwisỹnykre: ²⁵ Boholake, juhuu dori adee relyyreri ibutumy aõhebo rotỹỹnykre. ²⁶ —Aõma arateòwarinyre dori tuu. Kia Mesia, Deuxu Deòdỹỹna heka ròòsereri. Beteheke bederahy-ki, tule hetowo-ki. Iu tahe timy heka tamy itxeremy raõtyhy inatyhy aõkõreki. ²⁷ Iu jiarỹ Deuxu Riòre Hãbutyhyhykỹ arehemynykcre ibutumy heka rierykre loosòna delaana wesele heka wadehemynyna heka rarekre biu ibutumy ritỹxinykre. ²⁸ Iwese aõ rubu roimyhỹre, rara heka tamy rabutumyhỹre. Kaiboho rierykre iu rehemynykcre. ²⁹ Iu kia bedede dỹỹnanamy reakreu tahe txulyby heka

kòdòhònykre. Ahãdu tule rybynykre. Taina tule ixewesehekỹle kanakre. Ibutumy ramytatakre biu-ki. ³⁰ Iule tahe kia wadehemynynamy iny robikre. Sõwemy heka hinana ibrunana bedede bedemy rỹirakre. Ibutumy heka iny robikre wadehemynynamy biuwetyky-ki, jiarỹ dori, Deuxu Riòre, Hãbutyhyhykỹ rare. Loosòna ruruna sõwekreu, tahe arehemynykre. ³¹ Tule wajuròna-di, ŷju aditeònykre iu, ajuròna wodỹỹhỹkỹ-di. Tahe ibutumy wahõrõ mahãdu he ixidee aributunykre bedede bede-ribi, ibutu rehetyhy-ribi wahe. ³² Jesuisi tule relyyre: — Ijyyõmy heka ako arelyykre. Kai heka ibede erynamy bimykre. Iu kia figueira òwòru hãbu wiji tybiehekỹ. Kia aõma iruru tỹmyra rurunymyhỹré. Tule aõma txirubò tỹmyra ròhònykre. Tiu tahe bierykre. Kai iòhòra bohe wyra. Myhe tamy besekre. ³³ Iwesetyhyle taheka kai heka bierykre. Aõma wadehemynyna ròhòny relekre wahe aòbitikre wadehemynyna iu, aõhòkỹmydỹỹnana wahe. ³⁴ Tiu kia bededỹỹnanaule heka bedekõnyna rexihukre. ³⁵ Biu heka bedede-wana ituekre warybe tahe aõu aõu heka rỹihyymy rarekre. ³⁶ Inyõ heka rieryõhyymyhỹre. Tiubo txuu ruu kai konany rỹimyhỹre wahe ŷju dori tiu rieryõhyymyhỹre. Aõma, jiarỹ Deuxu Riòre dori rieryõre. Aõma Waha Deuxule tahe rierymyhỹre. ³⁷ Noe bededỹỹnana wesemy heka rỹimyhỹkre iny risinykre kia bedeu. ³⁸ Ibutumy heka worana bedehesi rỹikre kiau. Lisisò tahe rỹikre. Herina lisina aõma hãwyymy herina. ³⁹ Tahe Noe bededỹỹnana wesemy heka reakre. Iu heka

beòra rariare. Tahe rityyhynyõhyyre tiiboho. Tahe heka raòwònyre rariare ibutumy ituere. Iwesele tii heka rarekre heka, wadehemynyna Deuxu Riòre Hãbutyhyhykỹ wahe. ⁴⁰ Inatxi hãbu heka oworu-ki raaõmysỹdỹkre. Ijõ heka rakre dynamy reakre. Ijõ tahe rarikre. ⁴¹ Tule inatxi hãwyy heka raaõmysỹdỹkre heto-ki ratxikre mai risyrenykre. Ijõ heka dynamy reakre ijõ heka rarikre. ⁴² Tai heka iny rexiywinymy rỹimyhỹkemy rybe roimyhỹre awedureny kanakreki. Tiubo rehemynykre, teeryõte. ⁴³ Aõma hãbuõ kanakeki heka tiu aõma hãbuõ itxeredumy ronykeki heka, tiu hãbuõ iribi rawasinyõtyhy. ⁴⁴ Bexiywinymy heka wadehemynyna biijemy bonyke, jiarỹ Deuxu Riòre Hãbutyhyhykỹ wahe. ⁴⁵ Ijõ Jesuisi relyyre: —Inyõ tadinodu deòdutyhymy ratxikeki, tii aõmysỹdỹỹna riwinyhyy ronymyhỹke tamy. Iheto riywinyhyyke. Teòdu mahãdu txuõ txuõlemy riywinymahãke. ⁴⁶ Kia riwinykeki, deysamy rarekre teòdu rehemynykreu. ⁴⁷ Inatyhymy ararybekre: —Kia deòdu tadinodu aõmydỹỹnana ibutumy idi riywinykre, riyrubunykre. Tii ibutu wedu rarekre. ⁴⁸⁻⁴⁹ Ibinamy tahe tii rõhõtinykeki, kiawesemy riwinykre: Deòdumy raòhòtemyhỹ, lisilemy ronymyhỹ, riroximyhỹ momodu mahãdu-wana riõmyhỹ. Tii ixidee rarybekre: —Wawedu kedehemynyõtyhy, aõtxile ariwinykre. ⁵⁰ Iu rehemynyõkremy rõhõtinyreu, iwedu kiaule rehemynykre. ⁵¹ Tai tahe raòhòtebinakre. Heòty bedè-ò riteònykre, Iwese itxena mahãdu tii riteònykre wese. Kia-ò rahinykre, robukre, txuraruti rikyikynymy

aõhõkỹmy dỹỹnana òraru-ki.

25

¹ Jesuisi ijõ relyyre: —Kia txu heka Deuxu Iòlòna ka ijyy wesemy rarekre. Debòwiò ijadòma heka hãbumy herina riraòmyhỹrenyre. Iny sohoji sohoji heka toosòna riwyre iximynamyna. ²⁻⁴ Iruyrele tahe tõihti reare aõma adỹỹ-di ritỹxinkemy. Ihony tahe tõihti rosare iruyre wasỹ, ijõ tule ihyna-ki riwykemy. ⁵ Weryrybò rehemynyõre, tai tahe ijadòma mahãdu ele rihynymy rỹimyhỹ themynyna riiraòmyhỹrenyre. Iny sohoji sohoji heka toosòna riwyre iximynamyna. ⁶ Tai tahe rarybera: —Tỹmyra mahãdu-ò wahe rehemynyteri. Birybenybenyke ruwetya. ⁷ Tai tahe ijadòma mahãdu he rituranymy rỹimyhỹre. Toosò itỹnytyhymy rookemy. ⁸ Kia ijõ tahe tõihti rosare mahãdu tahe uritere riijere. Itoodỹỹmy idi riwisỹnymyhỹ. Aõma widee he rexitòenyre: —Urihimykò inihe wahõrõ-kò biditxiwike karihukòtekre. ⁹ Tai tahe kialemy risỹnyre: —Anokõre wadehunale dokuri rỹire. Bikòryke tahe ijõ itxe tahe. Maa. ¹⁰ Idi tahe ròireny iõbradỹỹmy. Tai titxi tai rohonymyhỹreò. Iòrysmy iõbradỹỹmy ròirenyra rookile tahe dehemynyde kia tỹmyra mahãdu wahe. Tahe rironyrenyre ibutumy riroxikemy. Riratòbònyrenyre. ¹¹ Tai tahe kia iruyre ijadòma iõbradỹỹmy rare tahe dehemynyde: —Wahĩ, itxòtòbòna wadeke bidirakynybedenyke! ¹² Tai tahe kialemy rirawyònyre: —Jiarỹ umyreny reeryõre. Kie riki ijyy. ¹³ Tahe Jesuisi rarybere: —Tai kaiboho bexiywinymy ahãbenyke

wadehemynyna biije beny. Teeryteny kōte dori tiubo adòòsekre.

¹⁴ Tii ijō rarybere: —Ijō ijyymy adeereny arabedeerynykre timybo Deuxu Iòlòna raremy. Inyō heka rakemy ratximyh̃re ijō bedè-ò rat̃inykemy. Tii tahe taaōmyd̃ỹnana ririre teòdu mahādu-ki. ¹⁵ Tanieru tahe tamy riwahinyre timykibo isiraōmy nieru ritamyh̃re myheka tamy riwahinyre. Ijō-ò 5000 riwahinyre. Ijō-ò 2000 riwahinyre. Ijō-ò 1000 riwahinyre. Idi tahe tii rare tabede t̃inyamy. ¹⁶ Kia iruyre ritara heka aōna aōna riōbranymyh̃re. Diwymyh̃re tas̃y idi rohonyrerimy ih̃re. Tai wylemy heka inieru rabuture. Ijō ixityre iruyremy ritxieny ireatyretyhy. ¹⁷ Kia ijō inatximy tamy riwahinyre tas̃y tulere aōwesele raaōmys̃d̃ỹre ta ròtare tule ijō inatximy ixityre. ¹⁸ Kia sohojimy tamy riwahinyre tahe urile riyrubunyre inieru hāloole riare tamy tahe riyrubunyky heka riare. ¹⁹ Sōwemy rabeded̃ỹnana-ribi tahe iwedureny dehemynyde. Tahe tamyreny rarariòwyre takòtareny riòbitinykremy. ²⁰ Iruyre riwyre heka debòwiò diwyde: —Beteheiny wawedu ijō iruyre anieru tyre rebutunyre. ²¹ Tahe tawedu sōwemy riwowydynyre iaōmys̃d̃ỹna wiwihik̃my ròhònyraki wahe. Kiamy heka tamy rarybere: —Òbitimy idi taaōmys̃d̃ỹteki heka. Sōwemy heka adee ariwahinykre riywinykemy. Aōwaxinyhe bitelenykre aōmys̃d̃ỹna. Kai heka wawana beysanihik̃kre. ²² Idi tahe kia inatximy ròtaré s̃y dehemynyde: —Beteheke, inatxi tas̃y inaubiòwa ixityre adee rewinyra. ²³ Tahe iwedu rarybere:

—Awityhymyhe taaõmysÿdÿÿta! Kai heka deòdu wihikÿ tate. Kai ibutedile sõwemy tewinyte tahe sõwemy ixityre adee ariwahinykre riwahinykemy. Kai heka wawana beysanihikÿkre. ²⁴ Kia sohojimy tamy riwahinyre tahe rarybemyhe retximyhÿ: —Kai heka hãbu nieru tarasaery heka tate. Aõ taaõmysÿdÿÿteri-ribi aõkõ heka nieru tetamahãte. ²⁵ Tai heka jiarÿ raberumahã alau watxireri. Tai heka rewore iny lau. Tahe tii sohojidile ratxireri. ²⁶ Iweddu rarybere: —Kai heka eoruxerere, awi aõkõ heka tate! Inyõ tehuòtekõta heka idi urihimyò ityre ròtakelemy wahe. Kai tiwaeryte wahe. ²⁷ Aõherekibo banco-ki aõkõ tetidite. Kia huòteòwy wanieru-ribi ritarerimy ihÿre. ²⁸ Bitabohe kia nieru-di atxitere, tahe kia debòwiò ritaraò wahe biwahinykre. ²⁹ Kia òbitimy raaõmysÿdÿÿra heka sõwetyhymy ròtakre. Kia òbitimy raaõmysÿdÿÿõmyhÿre kia heka ròõnodÿÿkre. ³⁰ Kia deòdu bimybemyke. Tii dorihe ibinatyhyre inihe bedede luruhukÿ-ò idi behubenykre. Tai heka tii aõhõkÿmy rotÿÿnykre rahinykre.

³¹ Jesuisi tahe ikonana rarybere: —Iu jiarÿ, Deuxu Riòre Hãbutyhyhykÿ, arehemynykreu heka Waiòlònary-ò aronykre. Arehemynykre waÿju mahãdu-wana. ³² Ibutumy heka bedede iny mahãdu wako-ki ributunykre. Iwese budoeni itxeredu heka tabudoeni, budòe-wana wiribi rihitxinyhÿre wese heka bedede iny mahãdu wiribi arihitxinykre. ³³ Wabudoeni heka warurunawe-ribi arisÿnykre. Budòe tahe wahywe-ribi arihitxinykre. ³⁴ Idi tahe waruruna

ludu-ò ararybere: —Manake hewa, beysabenyke. Waha Iòlòna-ò rokonykre. Myheka tamy ararybekre. Juhuu bedeu ihetxiu heka ywimy adireny kia rỹimyhỹre. ³⁵ Rama tahe riwasanyreu rỹsỹna wadee tewahinytenyete. Iu bemy rarureu, wadee tewahinytenyete. Jiarỹ heka tori rare asỹ-ò tiwadytenyete. ³⁶ Jiarỹ heka watykyhoho aõkõu, kaibohole wadee tewahinytenyete. Binamy rỹimy rarewãhã, waroramy tadòitenyete ròtenawo-ò. ³⁷ Tai tahe òbiti mahãdu rarybekre: —Wanyrỹ, tiu taheka ramamy heka wadeereny teate —Adee rewahinyrenyete? Tiubo heka bemy tarumy tatemahã adee rewahinyrenyete? ³⁸ Tiubo heka kai torimy tatemahã idi wahetoreny-ò aradyrenyete. Tiubo atykyõmy tatemahã-di, tyky adee rewahinyrenyete. ³⁹ Tiubo ròtena-ki tỹimy tatemahã-ò ada webinadumy tatemahã-ò, aroramy ròirenyete. Wanohõti atxi reaõhyymyhỹre. ⁴⁰ Tai Jesuisi rarybere: —Jiarỹ, Iòlò, tamy ararybekre: —Iu kaiboho waityhydỹdu seriòre mahãdureny-ò waòraru-ki tewinymy toitemahãu, wadeele tuu tewinytenyete. ⁴¹ Idi tahe kia wahywenawe-ribi ludu tamy ararybekre: —Boibenyke karibi kaiboho heka abinarenhyete heòty bede-ò ihyymy boibenykre ixi-di ariteònykre. Diabo tatyytybybinasỹ-ò idi boibenykre. Deuxu isỹ tamy riwinyete. ⁴² Tiu rama riwasareu rỹsỹna kaiboho wadee tewahinytenyõhyyte. Iu bemy rarureu heka ijõ wadee tewahinytenyõhyyte. ⁴³ Torimy rarewahãu, tiu tiwatobinytenyõhyyte. Tykyõ wadee tewahinytenyõhyyte. Binamy rãimy

rarewāhā rōtenawo-ki wororana webinadumy tahe tōiōhyte. ⁴⁴ Tai tahe kiamy rarybekre: —Wanyrỹ, tiubohe tuu rewinyrenyķōre. Wanohōti heka reaōhyymyhỹre aramamy rubuna-txi, abemy rubuna-txi, torimy tatemahāu, atyyķōmy tatemahāu, rōtenawo-ki webinadumy tatemahāu wahe. ⁴⁵ Tahe jiarỹ Iòlò tamy ararybekre: —Kaiboho heka waityhydỹdu seriōreō tewiōhenanyōmahātenyte tai heka tiwawiōhenanytenyōte. ⁴⁶ Tahe Jesuisi ikonanamy rarybere: —Tai tahe tii tiuhyymy rakre heòty bedè-ò, aōhōķỹmydỹnana-ò. Ōbiti mahādu heka umytuedeōna-ò rakre.

26

¹ Kia taijyy rahudi tahe Jesuisi taerymahādu-ò rarybere: ² —Ixityre inatxi txu-di tasỹ aōma Pascoa worana bedehesimy rỹķre. Kaiboho tahe kia teerytenyte. Iu iny riwatyhenyķre Deuxu Riòre Hābu wahe. Irahu-di tahe itxeònihikỹ-ò riwatamadỹnyķre. ³ Tahe aōwesele heka xiwena wahidỹdu wedu mahādu ributunyre heka judeu wedu mahādu-wana wahe. Kaifa heto wii rotyre. Xiwena wahidỹdu mahādu wedu wahe. ⁴ Wiwana heka raryberenyre: —Timybohe Jesuisi aōhebo rikisỹnyrenyķre aōma teburemy ijiranakōnahakỹle. Timybo rikisiraōnyrenyķre, rikimyrenyķre, rikirubunyunyķre. Urile iny tuu rieryķōre. ⁵ Pascoa worana bedehesi rỹireu tahe aōķōlemy idi rỹire. Kia worana bedehesiko-ki iny raaōbinanyķeki dori ibutuhukỹlemy heka raaōbinanyķe.

⁶ Jesuisi heka rare Betŷnia hāwā-ò hābu tykybinaō-wana heka isŷ-ò rare, Simaō heto-ò wahe. ⁷ Iu iheto-ki riroximyhŷreu tahe hāwyyō tamy rare aderōna lŷnyrehekŷō-di manaurahyna-ki. Tai tahe Jesuisi tyre ritxiwire, iratityre. ⁸ Ierydŷŷna mahādu heka urihimyò heka rebure riòre iòraru-ki. ⁹ Iòwy nihikŷtyhyre dorihe. Tai heka tanieru uriterehekŷle rahuraki heka tai rawobinamy. Idi rohonykewile heka rare aōma iòwy tahe iny aōkō mahādu-ò riwahinykewihikŷle tii rōhōtinyre. ¹⁰ Tahe Jesuisi rierityhymy aōmybo tuu raryberenyrerimy: —Aōherekibo kaiboho ibinamy tarybetenyteri hāwyy-ò. Aōwidŷŷnana wihikŷ wadee riwinyreri. ¹¹ Aōma kaiboho heka urimynodu mahādu-wana ihyy my boibekre. Ibutulemy awanareny jiarŷ watxiwāhāde. ¹² Tii heka wahāloodŷŷna riwaywinyra aderōna watyre ritxiwireu. Kia tahe wadee riwinyre. ¹³ Boholake, iny itxi tōhōti reahyy rŷirakre iòraru-ki. Rybewihikŷ Tŷmyramy ritŷnydŷŷmyhŷkre heka rierymy hŷkre bedede bedemy wahe.

¹⁴ Iribi tahe Judasi Isariò, tii waò inatxi reuròō rare, tii heka ròhònyre ierydŷŷna mahāduy-ribi. Tahe rare xiwena wahidŷŷdu mahādu wedu-ò. Tahe tamy rarybere: ¹⁵ —Adeereny Jesuisi ariwahikre wana heka tiwesebo biwaòwynybenykre? Kiamy tahe 30 prata womati nieru myhe tamy riwahinyre. ¹⁶ Judasi kia ribile rarunymy raremyhŷ dohodŷŷnaōmy Jesuisi tamy riwahinykremy. ¹⁷ Pascoa worana bedehesi rŷireule rexidelenyre, Paō iuridŷŷkō, kia txu rŷimyhŷ wahe. Jesuisi

erydÿÿna mahădu tai ritÿÿraxinyre: —Titxiwexe rikirÿsÿkre Pascoa worana bedehesi jiarÿboho dori ariwinyrenykemy? ¹⁸ Tahe Jesuisi rirawyònyre: —Hăbuô hăwăhăkÿ-ki ratximyhÿre tii riwaeryre. Tahe tamy marybekre: —Wawedu kÿny rarybereri aôma aheto-ki heka Pascoa worana bedehesina rirÿsÿkremy taerydÿÿna mahădu-wana. Ibededÿÿna dori iòhòre riki. ¹⁹ Tai tahe taerydÿÿna mahădu kia riwinyre idi kowa worana bedehesi rÿsÿna riywinyre.

²⁰ Bedesòmy tahe tai riroximy rorukumyhÿreny, taerydÿÿna waò inatxi reurò mahădu-wana wahe. ²¹ Aôma inyô heka riwatyhenykremy ratximyhÿre. Jesuisi heka tuu rarybere: ²² —Mowexe tii rarekre. Tiiboho rabadewomy roire, tai tahe widee rarybere: —Jiarÿ kôaôboka. ²³ Tahe Jesuisi rarybere: —Kia wawana pratoro tebò rearerile taheka tiikre. ²⁴ Iwese Deuxu Tyyriti-ki Rybe roire wese heka arurukremy jiarÿ Deuxu Riòre Hăbutyhyhykÿ watxiwăhăre. Kia hăbu riwatyhenykre tahe tamy heka ibinatyhykre. Ratybienykôre wana inihe awityhyre. ²⁵ Tai tahe Judasi ityhedÿÿdu rarybere: —Erydÿÿdu, jiarÿ aôbohe rare? Tahe Jesuisi tamy rarybere: —Kaityhy wahe tate. Kaile tarybeta.

²⁶ Tai tahe Jesuisi orotxu sohojiô rimyre ibutumy riroxireu, tahe riyreyrenymyhÿre tahe in-ysohoji sohoji-ò riwahinyre. Tai tahe tamy Jesuisi rarybere: —Kia biybenyke heka. Waumy wese heka kia ratxireri. ²⁷⁻²⁸ Idi vÿi monahynaô rimymy rexitòenyre Deuxu-ò. Idi tahe tamy riwahinyre iribi sohoji sohoji riôrenykemy. —Biôrenyke kaa

dori wahālubu wesemy ratxireri. Tai sōwemy iny biu-ò rahenykre Deuxu dee. Ibutumy òraruna ixāwididỹmy heka tuu ròhònyra. Wahālubu heka Deuxu, iny-wana wii riwoàxinykre rare. ²⁹ Tahe boholake warybe-ò. Awanareny heka ixityre vīī monamy ariōōtyhy. Kia Waha Iòlòna-ò dehemyny-nahykyle tahe awanareny ixyby tuu ariōkre.

³⁰ Idi tahe wiuõ rawiunyrenyre idi tahe Oliveira hãwãlò-ò ròirenyre.

³¹ Jesuisi tamyreny rarybere: —Wijiru heka ibutumy kaiboho biwaribenykre. Tyyriti-ki heka roire kiawesemy:

Budoeni-di itxeredu rirubunykre. Ibutumy bu-
doeni raubŷtŷkre bede bedemy.

32 —Waixixana k̄nyikreu tahe Kalileia bedeki awanareny aratxikre. 33 Pedro tahe rarybere: —Ibutumy ararirenykre wana tahe jiar̄y aōkōre. Ararirenyōthy. 34 Tai Jesuisi heka Pedro-ō rarybere: —Kai heka hānie dele robukōdile biwatxiō-ribi bexihukre, inataōmy wahe. Tuu wijiru rarekre. 35 Pedro dirawyōnyde: —Aōkōre wa, arurukre heka tahe urile aratxiōnyōthy. Tule ibutumy ijō ieryd̄ȳna tule Pedro wesele rarybere.

³⁶ Tahe Jesuisi ridyrenyre bederaty oworuõ-ò, aõma Kesemani ninadu-ò ridyre: —Kakile bonykre arakre dori ixitòedỹmy kowa-ò.

³⁷ Tahe Jesuisi heka Pedro ridýré ixi-wana. Tule Zebedeu riòre wiwana ridyrenyre. Tahe Jesuisi rabedeòtiidýýre aõhõkỹmy rotýýnyre bededeòtiidýý òrarukile. ³⁸ Tii tahe tamy rarybere: —Kaki wawanale atxibekre. Watyytyby heka tỹxihikỹlemy bededeòtiidýý-di ratxireri. Waki

bexiebekre. ³⁹ Urile tahe tako-ò rariareu tahe resere bedè-ò. Jesuisi tahe tyby-ò rarybere: — Waha, rubu mona waribi bitake adeewikeki. Aõkõkeki tahe ariõkre, arurukre adeewilemy aõhebo arotỹnykre. ⁴⁰ Idi tahe dòòsede kia ierydỹna inataõ tai rõrõmyhỹò heka ixyby dòòsemy nade. Jesuisi rarybere: —Pedro! Kai heka timy sohoji horamy adi bedè rỹiõtyhy wawana. ⁴¹ Bexixaruhyy atxibeke bexitòenymy. Aõkõkeki tahe òraruna kanamykre. Kai heka òbitimy matxikemy tahõtinyinmahâte. Aumy tahe ibinare heka arurukõre wahe. ⁴² Ixityre rare rexitòenykemy. Tahe Jesuisi rarybere: —Waha, adeewinale ariwinykre. Aõhõkỹmydỹnana monamy heka ariõkre. Kia mona waribi bitaõkeki ihãrele heka arurukre. ⁴³ Tai dòòsede tai rõrõmyhỹrenyõle heka nade. Tiiboho ixixamy rỹiõhyre. ⁴⁴ Tahe ròòsere ixybyle ikonanamy. Iweselemy rexitòenyre tyby-ò. ⁴⁵⁻⁴⁶ Idi tahe dòòsede taerydỹna mahãdu-ò rarybere: —Bexielehynybeny. Watyhedỹdu naderi. Rexihumyhe rare. Hãbubina mahãdu rehemynyre. Jiarỹ Deuxu Riòre Hãbutyhyhykỹ, wahe. Bexixabeny, rakakre watyhedỹdu dori rehemynyre.

⁴⁷ Tahe Judasi dehemynyde waòinatxi reuròò wahe. Jesuisi rarybereu, tii nade sòwemy hãbu-di mayrehe-di, òhòte-di tñori-di widotyde. Judeu mahãdu wedu tahe iteòdỹdure xiwena wahidỹdu wedu wana wahe. ⁴⁸ Juhuu Judasi tamyreny bedè riywinyre. Kamy rexirybenymy: —Iòsỹny-ò aru-wokrele heka tiikre. Tiile bimynykre. ⁴⁹ Tahe Judasi rarybere: —Rareri, Wawedu. Iòsỹny-ò

ruwore. ⁵⁰ Tahe Jesuisi rarybere Judasi-ò: —Iò, aõwaxiny aõbo biwinykre iwidỹmy tateri. Tahe Jesuisi imahãdu rimyre. Ritaataare. ⁵¹ Tahe Jesuisi mahãduõ mayrehe-di rimymy resere. Tai hãbuõ-ò reare. Tai tahe tõhõtyle rikòròmý idi reare, xiwena wahidỹdu wedu deòduõ wahe. ⁵² Tahe Jesuisi tamý rarybere. Aõkõre amayrehe birutyke irasirahanawomy. Kia dori inyõ maydese rimymy resekre heka tule rurukre mayde-selemy. ⁵³ Karibi ixitarasamy arurukeki dori wahaõle ararybekre. Tai tahe waha sõwemy ýju kiditeònyke, 12 aõbinadu ijoi mahãdu wahe. Kia teeryõtenyke. ⁵⁴ Ihãrele tahe ibutumy tuu bededỹnana relekre iwese ritidỹna-ki roimyhỹre wese. ⁵⁵ Tahe Jesuisi rỹraxire tamýreny: —Aõbo jiarỹ raremy wadi tahõtintenyteri. Wasidu aõbo. Kai dori waòrysmy themynyke maydese-di, tõnori-di. Aõherekibo wahe. Jiarỹ heka arabe-deerynyrenyre txuõ txuõlemy wahe Deuxu dohodỹna heto-ki. Aõherekibo taile tiwamytenykõte kowa watxiwãhãure. ⁵⁶ Kia ibutumy Deuxu Ritidỹna-ki roimyhỹre. Tai tahe tuu bededỹnana relekre iwese Deuxu rybedu mahãdu rarybere. Ibutumy aõna aõnamy rotỹnymy raremyhỹ. Tai tahe taryberahu-di. Ibutumy iery mahãdu iribi tahe robỹtỹre.

⁵⁷ Tiiboho heka Jesuisi ridýrenyre Kaifa heto-ò, xiwena wahidỹdu wedu wahe. Tai ibutumy judeu mahãdu wedu ributunyre bede ywina erydu mahãdu tule wahe. ⁵⁸ Pedro irehetyty-ribi riheludunyre. Iheto ube-ki tahe ronyre yrubu dỹdu-wana. Tahe rehere aõhebo rotỹnykremy.

59 Xiwena dinodu mahādu tahe ributunyre Jesusimy raruikremy heka riijemy. Aōma rirubunykre òbirele heka tuu rarybemyhỹ. 60 Tahe inyō-ki heka rahaōhyyre turybedu wahe. Iny sōwemy tahe relyyre. Ihārele rirubunyōhyyre. Iroona-ribi tahe inatxi hābu dehemynyde. 61 Tai tahe kiamyhe tuu relyyre: —Aōma Jesuisi rarybere: —Aōwesele heka Deuxu dohodỹna heto ariatymy idi areake. Inataō txudi tasỹ ixityre aditamadyỹke, ibutumy adiwinyke. 62 Tai tahe xiwena dinodu heka Jesuisi-ò ryyraxire: —Aōbo marybekre kia umy ijyy rohonyreriki? 63 Jesuisi tahe rybeōlemy ronyre roholare. Ixityre tamy rỹraxyre: —Kai heka inatyhy tyhymy Deuxu Riòremy kai atximahāte. Mesia aōbohe kai tate? Deuxu riwaeryre inatyhymy rarybereri. 64 Jesuisi dirawyònyde tamy: —Kaile kia tarybete. Ibutumy iny-ò ararybekre: —Kaiboho ibutumy bobibenykre

Deuxu Riòre Hābutyhyhykỹmy, jiarỹle wahe. Tii heka Deuxu rurunawe-ribi heka ronykre. Iribi tahe kanakre biuwetyky-ki. Jiarỹle wahe tiire.

65 Tai tahe xiwena dinodu tatyky riykare. Reburere kie: —Aōhere tahaka. Deuxumy heka ibinatyhylemy tarybemahāte. Ijō iny-ò aroholaōkre, rexihura! 66 Ibutumy kaiboho irybe-ò taholatenyteri, inatyhy? Aōbo rikiwinykre tii ibinatyhyre dori, rikirubunyunykre tahe. 67 Tahe iòsỹny-ò rarybexinyre. Rihetenyre. 68 Tamy ihetedỹdu rarybere: —Marybeke Kristu, mobo arahetenyra inihe.

69 Pedro tahe ube-ki rononymhỹ. Tahe ijadōma

heka deòduõ tamy rehemynyre: —Kai anõbo Jesuisi Kalileia ludu-wana atximahã. Kumymy rabire. ⁷⁰ Iny ibutuko Pedro rarybere: —Aõkõre, aõmybo arybe reeryõhykyrer. ⁷¹ Tai tahe rare ijò-ò. Ijõ ijadòma deòduõ rarybere kamahãduko: —Inatyhymy heka tiki Jesuisi Nazareludu mahãduno tiki rare. ⁷² Ixityrele Pedro ritxiõnyre: —Reerykõre wahe hãbu. Tiu heka rabiõwãhãre. Inatyhy rare. ⁷³ Idi hãbuõ heka narybede tamy: —Inatyhy rare. Kakỹny irybe weselemy tarybeteri, Kalileia rybe wahe. ⁷⁴ Tahe Pedro rarybere: —Jiarỹ reerykõrer, tuu heka rabiõwãhãre. Deuxu riwaeryre inatyhymy rarybereri. Iule taheka hãnie hãbu robumy reare. ⁷⁵ Tahe Pedro tõhõti itxi reare. Jesuisi rarybere weselemy heka tii riwinyra. Ritxiõnyre. Tai tahe Pedro ròhònymy reare heka rahinyhyre.

27

¹ Ijõ biurasò ruidile tahe rỹire. Xiwena wahidỹỹdu wedu ributunyre judeu mahãdu wedu-wana. Timywexe aõhe rikisỹnyrenykre. Rikirubunyrenykemy heka idi watxiwãhãre.

² Roma dinodu-ò òsana rikidyrenykre. Tahe tiiboho Jesuisi ritaataare idi ridyrenyre tamy, Pilato-ò.

³ Judasi heka rieryre. Tai tahe tii rabadewonihikỹre rityhenyreki wahe. Tai tahe raraykynyre tawo-ò raòhòrere. Tahe nieru òkesedỹỹmy idi ròhòtinyre. Tahe nieru diwyde, 30 prata womati nieru tahe riòkesedỹỹnykremy judeu wedu mahãdu-ò, Xiwena wahidỹỹdu mahãdu-ò. ⁴ Tahe Judasi rarybere: —Ixãwirahe,

jiarỹ raðrarunyra hãbu òbitityhymy ratximyhỹre
 retyhenyre heka. Tahe judeu mahãdu dinodu
 rarybere: —Jiarỹboho, kia aõ aõkõ rare.
⁵ Tahe Judasi nieru-di bedetyrele rihure.
 Tahe ròhònyre iribi. Tahe rare. Rerotihikỹ-di
 rexibòtòtaare. Rexirubunyre. ⁶ Tai tahe xiwena
 wahidỹỹdu wedu riwyre nieru bede-ribi: —
 Aõwexe kanieru rikiwinyrenykre? Dohodỹỹna
 hetowo-ò rikirutyrenyke heka aõkõre. Aõma dori
 rare rubuòwymy iwahidỹỹ heka rare. ⁷ Urile
 suõle rikiwyrenykre idi. Tai tamy wabede
 rikiwinyrenykre. Aõma tori kaki rurukreu tahe
 rikitoonyrenykre tamyle wahe. Tai tahe tiiboho
 riwyrenyre aõma butxi widỹỹna subede heka
 riwinyrenyre. Kia heka inire suni wahe. ⁸ Kia
 bedero tahe rininire aõma Hãlubu Bederomy heka
 rininire. Wiji tule ini rare. ⁹⁻¹⁰ Iwese Jeremia
 tyyriti-ki roire wesele heka tii riwinyre:

Tahe 30 —Womati nieruõ-di heka bedero riwyre
 butxiwidỹỹdu-ribi. Iwese kai riwateònyre
 wese. Kia iòwy rare judeu mahãdu-ò tamy
 riwahinyre wahe. Txiòdỹỹna òwy wahe.

¹¹ Jesuisi heka Pilato, bede dinodusỹ-ki ratximyhỹ.
 Pilato tahe tamy rỹỹraxire: —Kai aõbo judeu
 mahãdu iòlò atxiteri? Jesuisi dirawyònyde: —
 Kai tuu tarybeta. ¹² Xiwena wahidỹỹdu wedu
 heka tamy rarybere: —Jesuisi rirawyònyõhyyre.
 Judeu mahãdu wedu-ò tule rirawyònyõre. ¹³ Pilato
 tahe tamy rarybere: —Kai aõbohe rybe-ò
 taholate. ¹⁴ Tule tamy Jesuisi dirawyònyõhyide.
 Byy! Urile Pilato ribedeòtiidỹỹnyre. ¹⁵ Pascoa
 worana bedehesi bededỹỹnana tikiemy tuure.

Ròtenawo-ribi heka sohoji beòra beòrahyyle
 ixinamy inyõ rexideònymyhỹ, inysõwe rybe
 òraru-ki wahe. ¹⁶ Kia beòra tahe hãbu ibinatytyre
 ròtenawo-ki rỹire. Baraba inire. Ibutumy iny
 tuu rieryre. ¹⁷ Aõma Pascoa worana bedehesi
 rỹireu ibutumy iny ributumy. Tahe Pilato
 rityỹraxinyre: —Tibohe ixinamy ariteònykre
 Jesuisi Kristu aõbo ada Baraba aõbo? ¹⁸ Tahe
 iny heka ibutumy urile Jesuisi Kristu luure heka.
 Tai tahe judeu dohodỹỹdu wedu mahãdu tahe
 aõkõ tamy waritimy rityhenyreny. Pilato
 kia rieryre. ¹⁹ Iu tabede ywina dohodỹỹna-ki
 Pilato rỹireu, ihãwyy tamy tyyriti riwahinyre.
 Kawese heka rarybere aõma: —Ixinamy Jesuisi
 biteònykre. Anobinatytymybo dokuri rarasino
 txu wadi reakareri. Jikarỹ anohõkỹmy dỹkỹnana
 sõwemy ratỹkỹnyre Jesuisi kòraru-ki wahe. ²⁰ Iny
 sõwehekỹ-ò heka xiwena wahidỹỹdu mahãdu
 wedu rarybere: —Kaiboho mararybebenyke: —
 Baraba ixinamy biteònykre. Tiiboho dirawyònyde:
 —Jesuisi birubunykre. ²¹ Iribi Pilato rarybere:
 —Tiwexe ixinamy ariteònykre? Tiiboho
 dirawyònyde: —Baraba biteònykre. ²² Pilato tahe
 rỹỹraxire: —Aõhebo tahe arotỹỹnykre Jesuisi-di,
 Kristu-di? —Itxeò nihikỹ-ki bitamadỹỹnykre.
 Birubunykre. ²³ Pilato tamy rỹỹraxire: —
 Aõbinahakỹ aõbo riwinyraki? Tai tahe ibutumy
 iny rirajuamy rỹimyhỹ: —Birubunyke kia
 bitamadỹỹnykre. ²⁴ Pilato iny sõwe-di aõ
 riwinyõhyre aõbinatyhy òsana ròhònykremy
 idi ròhòtinyre, tai tahe inyõ rarybere: —Bee
 kidiwykremy baciaro-ki. Tahe tebò risuhore

iny sōwehekỹko-ki. Tamy rarybere: —Jiarỹ kỹny waòraru-ki aõkõ heka rurukre. Kaiboho heka irubudỹỹ erydumyhe boibekre. ²⁵ Tahe ibutumy iny rarybere: —Awire, inyboho heka irubudỹỹdu erydumy rokoirekre, tule wariòrereny òraru-ki wahe ihālubu rejuxunykre. Soldado ridyre itxeò nihikỹ-ò ritamadỹỹnykremy rirubunykremy. ²⁶ Tai tahe Pilato heka Baraba riteònyre ixinalemy. Iribi tahe Jesusimy raòhòtere.

²⁷ Pilato soldado mahādu urile idi juhu risinyre, soldado tyamy ritidire. Pilato heto-ò ridyre. ²⁸ Ityky iribi ritare tahe aõma tykysò-di ritidire heka juhu rihetynyre. ²⁹ Iòdỹỹmy tahe idi ede lòrilòrihikỹ irati-ò ridekremy. Òwòruò tebò-ò ritidire. Tai iko-ò resere tatiowotimy. Raryberenyre: —Awire, kai judeu Iòlòtyhy. ³⁰ Ityre rarybexinyre. Òwòru rimyre tahe iratimy tuu raòhòtere. ³¹ Iribi ritarenyrenyrene ihòrõ itykyle ixityre rirutyre ityre-ki. Idi tahe ryò ròirenyre.

³² Iu ròhònyreu, hābuõ Sireni bedeluduõ-wana witxi reare. Tamyhe rarybere Jesusi itxeò riwykemy.

³³ Tahe Kòkòta hāwālò-ò rehemynyre. Aõma, rubu ratityby wesemy heka rare. Tai tahe Kòkòtamy heka rininimyhỹrenyrene.

³⁴ Tii vỹ riurinyre bee ihyra-wana, idi tahe Jesu-isi-ò kia riwahinyre.

Iurihi-di teramy reare.

³⁵ Tahe itxeò nihikỹ-ki ritamadỹỹnyre. Irahu-di tahe ityy heka ritxuatxuarenyre wimy rarudeòsanyre tibo iwydydukemy.

³⁶ Idi tahe retehemy rorukumyhyrenyre. ³⁷ Irati tyre-ki tahe ritidỹnaõ roire:

—Kia Heka Jesuisi Rare, judeu Iòlò Mahādu.

³⁸ Tule wasidu brebunahakỹ tii-wana ritamadỹnyrenyre itxeò hòkỹ-ki, ijõ iruru-ribi, ijõ ihywe-ribi. ³⁹ Iny ibire-di reamyhỹ idi risinymyhy kamy rexyrybenymy: ⁴⁰ —Kai inihe bexitake, kai Deuxu Riòre tateki. Bodobeheke itxeò nihikỹ-ribi.

⁴¹ Kai heka arurudiremy iximy tarybemahāte. Dohodỹna biatykemy heka iximy tarybete tahe inataõt_{xu}-di heka biwinykemy tarybeta. Tule xiwena wahidỹdu wedu mahādu idi risinyre. Tii tahe rarybere: ⁴² —Tii heka iny iwitxira witxira aõbina bina-ribi ritamyhyre ihāre tahe taaõbina bina-ribi rexitaõtyhy. Tii heka aõ judeu mahādu Iòlò aõkõ rare. Myheka tuu rarybemyhỹ. Kia itxeòhòkỹ-ribi kedexiberesedỹnykekile tahe rikityhynyrenykre inatyhymy. ⁴³ Tii heka iximy rarybemyhyre Deuxu Riòre raremy, Deuxu rityhynymyhyremy. Reketeherenykre inihe aõbo Deuxu riwiòhenanykremy wahe. ⁴⁴ Wasidu mahādu kia itxeò nihikỹ rỹire iwesele heka tamy rarybere.

⁴⁵ Txutyeyu tahe bedede luruhukỹ bedede reare, tx-ioro tirehehekỹule bedede kamy reare. ⁴⁶ Kiaule tahe bedede ratỹnyre Jesuisi iu rryre:

—Eli Eli Lema Sabatani.

Kiamyhe rarybere:

—WaDeuxu, WaDeuxu, aõherekibo waribi õhõti rosare?

⁴⁷ Tai tahe iny sōwe mahādu irybe-ò doholade. Ijõ kiamy narybede: —Eliasi-ò hòwa rryreri.

⁴⁸ Kia ele elemy riwinyre noseõ. Idi tahe vỹõ rirymy tamy idi riteònyre. Teòrehemy riwinyre

bemy rimonykremy. ⁴⁹ Ijõhe raryberenyre: — Txiokre inihe inatyhymy aõbo reketeherenykre inatyhymy aõbo Eliasi iwiòhenadỹỹmy kanakremy aõbo inihe. ⁵⁰ Jesuisi ixityre rirajuare. Rurure. ⁵¹ Kia dohodỹỹna heto-ki heka ixiwòtenaõ rỹimyhỹre ierykõna. Tahe urile idi ixiwanale ruarymy reare iratyre-ribi bede-ò. Suuhe ramytatare. Mana rabòhòbòhònyre. ⁵² Wabede hãlooõ heka riraynyre. Deuxu hõrõ mahãdu sòwemy rubu-ribi rixixanyre. ⁵³ Wabede-ribi ròhònyrenyryre. Iu Jesuisi rubu-ribi riixixareu tahe Jerusalẽ-ò ròirenyre. Tai tahe sòwemyhe iny tuu robire. ⁵⁴ Tai heka soldado dinoduõ ratximyhỹ idi retehemy. Tule soldado mahãduõ tii-wana ratximyhỹre. Ibutumy tuu robirenyre. Tai tahe tabrebu-ribi narybedenyde: — Tii inatyhymy Deuxu Riòre heka rare. ⁵⁵ Hãwyyõ tule retehemy ratximyhỹre irehe-ribi idi. Aõma hãwyy Jesuisi riwiòhenanymy raremyhỹ heka idi retehemyhỹre. Tiiboho Kalileia bede-ribi doide. ⁵⁶ Marie Madalena, Marie Txiause Jyjese, Zebedeu riòrese tule tai ratximyhỹ.

⁵⁷ Bedesòmý Jyje rehemynyre. Tii ityhy heka rare Arimatea hãwã luduõ ratximyhỹre. Tii Jesuisi tyhydỹỹduõ ratximyhỹ. ⁵⁸ Tai Jesuisi umy rexitòenyre Pilato-ribi. Tai tahe Pilato rarybere: — Tamy biwahinykre. ⁵⁹⁻⁶⁰ Tahe Jyje linho tyky rirahananyry. Tai tahe aõma wabede tỹmyrahakỹ riamy roireriò heka rituunykremy idi rara. Idi mana nihikỹ ritidire txiò. Idi ròirenyre. ⁶¹ Marie Madalena ijõ Marie-wana taile retehemy ronyre wabede-ki.

⁶² Ijõ txu tahe fariseu mahãdu wedu tule xiwena wahidỹỹdu wedu heka Pilato-ò sexta feira rahudi

tahe, judeu mahādu elehyna txu wahe ituere. ⁶³ — Jesuisi irumy raremyhỹu tii rarybere:

—Rubu-ribi heka ariixixanykre inataō txu-di.

⁶⁴ Ruimy rare tahe ihārele tahe biyrubunye iwabede. Aōkōkre-wana tahe ierydỹỹna mahādu heka iumy riwykre. Tai tahe rarybere: —Tii rexiixixanyre. Tai tahe ibutu rityhynykre iru-ina. Kia ibinatyhymy rarekre. ⁶⁵ Tai tahe Pilato riteōnyre soldado mahāduō txiō-ki. Tamy rarybere: —Awimy biyrubunye! ⁶⁶ Kia bedē erylānāō heka tamy ritidire. Txiō-ribi resekreule heka rieryrenykre. Tahe soldado mahādu riyrubunymhỹre.

28

¹ Ijō txu rudile tahe Marie Madalena, Marieō-wana rare ihāloona-ō itxeremy, domingo, nobiutxu wahe. ² Aōwesele tahe iu suu ramytatare. Wanyrỹ ỹju heka dobehede biu-ribi iu. Tahe hāloo ijō-ribi mana ritamy ityre ronyre. ³ Iōsỹny heka urile ritoosōnyhỹkỹre. Ityky tasỹ iurahakỹre. ⁴ Idi itxeredu mahādu heka aōma ruberunihikỹrenyke. Urile rōhōtiberemy reserenyke. ⁵ Ỹju rarybere hāwyy-ō: —Uritere berebuōmyrenyke. Kai aōbo Jesuisi teijeteri, inatyhy? Aōma itxeō ritamadỹỹnyrenyke wahe. Reeryre kia. ⁶ Aōkōre kaki aōkō heka ratxireri. Tii dori rubu-ribi rexiixixanyre iwese tii iximy rarybere wese wahe. Beteheke inihe iherina tyby-ō tai juhu roimyhỹō. ⁷ Make karibi ele elemy ierydỹỹnako belyykre tii rubu-ribi rexiixixanyraki. Tii heka rara Kalileia-ō tamy wirotyreriō. Matahe, relyyra dorihe adeereny.

⁸ Tai tahe rakòrunyrenyire, hãwyyboho. Ruberumy ròirenyire tasỹ reysamy ròirenyire. Ierydỹĩna mahãdu-ò heka riijemyhỹre aõma ÿju rybemy ikoreny relyykemy. ⁹ Iu rakòrunyrenyraule tahe wii reòbynyra. Jesuisiwanale heka itxi rekoare. Idi tamy rehemynyire iòhòmy. Iwa rimyrenyire tahe riwowydynyire. Jesuisi tamy rarybere: — Toiteri aõbo! ¹⁰ Uritere breburenyõmyke. Boibeny tahe iyyymy waityhydỹĩdu mahãdu seriòre-ò heka Kalileia-ò aròirenykemy. Tai tiiboho-wana wii areòbynyrenykremy.

¹¹ Tai tahe tiiboho ròirenyire. Kiaule tahe wabede soldado itxeredu rehemynyire xiwena wahidỹĩdu wedu-ò wahe. Tahe ibutumy relyyre iko. ¹² Tai tahe nieruõ riwahinyire ruiõmy relyykemy. ¹³ Tamyreny raryberenyire: —Ierydỹĩna mahãdu heka ridyra watỹireny reòbylemy. ¹⁴ Tai tahe bedede dinodu rierykreu heka aõ adee beleõtyhy aõbinahakỹõ. ¹⁵ Tai tahe nieru sòwemy riwyrenymy tahe tuu ròirenyire ruimy. Wiji dori tuu iyyy rỹira. Ibutumy judeu mahãdu kia rybe-ò rityhynymyhyre.

¹⁶ Idi tahe ierydỹĩna mahãdu ròirenyire Kalileia-ò. Tiobo Jesuisi riteõnyrenyremy juhutyhy. ¹⁷ Jesuisimy robirenyreu tahe tiiboho bedede-ò reserenyire tahe riwowydynyrenyire. Ijõ mahãduõ riseõnylemy idi ròhòtinymyhyre. ¹⁸ Tai tahe Jesuisi iòhòtyhymy tamyreny relere kiamy tamy rarybere: —Waruruna heka ibutu ratyre ratximyhyre kabede-ki tule, biu-ki tule. ¹⁹ Tai kaiboho waha deòdumy boibenyke ibutumy iny bedede bedede mahãdu-ò, bedede bedede

konananahakỹ mahãdu-ò ihyy behemynybenyke.
Waityhydỹĩdumy heka bitxienybenyke.
Wahanimy, tule Deuxu Riòrenimy, tule Deuxu
Tyytybytyhynimy, tahe bòratisebedỹĩnybenyke
wadeòdurenymy, Waha, Ityytybytyhy, Iriòre
kaboho deròwymy wahe. ²⁰ Ibutumy aõbo wabede
ywina adee rewahinyredi bibedeerykre. Uritere
nohõti losarenyõmy awanarenyhyy dori ararekre
bededỹĩnanahyy rekehemynykre.

Deuxu Rybe Tyyriti **New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Karajá

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

PDF generated using Haiola and XeLaTeX on 11 Nov 2022 from source files
dated 29 Jan 2022

55ce0bcd-101e-52a3-984e-847027efe150